

Wedau Mark



The Gospel of Mark in the Wedau Language of Papua New Guinea

Wedau Mark
The Gospel of Mark in the Wedau Language of Papua New Guinea
Buk Mak long tokples Wedau long Niugini

copyright © 2010 Wycliffe Bible Translators, Inc.

Language: Wedau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-30

PDF generated using Haiola and XeLaTeX on 28 Dec 2024 from source files dated 31 Aug 2023
aa19f3e3-98fb-51fa-9c53-3906edc75f11

Contents

Mark	1
Apasol	38
Psalm - Wela ma Pari	95

Mark Riwana Aiaina, Mark i girugirumia

Pariverena

Wei lamna God Natuna Iesu Keriso Messiah Riwana Aiaina karena. Rava wei bukana i girumi, wavana ega ita riweta. Wate tauviararamana e ririwa da Mark i girumi. Mark, lamna ega Apasol, wate tauviararamana maqamaqau i notai da tauna, Peter maiteni au Rome i mae. Ma Peter, Iesu ana kaua ma ana viararamana maqamaqau Mark i riwei. Anina ma Mark wei riwana i girumi da tauvitumaqana au Rome ita aramanei, Iesu aiwai i kuae.

Riwa karena i girugirumia e viviegeta da wei lamna Iesu Keriso Messiah God Natuna Riwana Aiaina. Aubaina, wei au bukana ta inainai Iesu awarina rewapana da kaua maqamaqau ita kuae. Wei kauai tana inanai maranai: e viviararamana; ma arua-apoapoei e viviagagana-opunei; ma rava doridoriai e vivilawani; ma go'apoapoe e notanota tawanei. Mark, Iesu ana nola ma ana kaua i girumi ma ega ana viararamana ita girumaguratei. Mark i viegeta menanare Iesu au korosi i raqe da rava anatapui ita vilawanai ma God menanare, Iesu iraqalei i vovaimairini.

John Tababataito, Iesu ana aninae i vovokaukauei

(Matthew 3:1-12; Luke 3:1-18; John 1:19-28)

¹ Wei lamna Iesu Keriso Messiah God natuna Riwana Aiaina karena.

² Wariaqa peroveta Isaiah i girugirumia nanare:

*"Ona rautanigan! Au peroveta au naom ana paritawanei
da am aninae ina vokaukauei."*

(Malakai 3:1)

³ ⁴**"Peroveta au mutulua e viviogregore:*

*"Taumi BADA ana aninae ona vokaukauei,
ana eta ona vovai-jijimani!"*

(Isaiah 40:3)

⁴ Ma taupariverena John i nei au mutulua da rava i bababataitoi ma God riwana i jimejime i pa, "Ami go'apoapoe ona voterei, ma ona mae-taviremi God awarina ma ami go'apoapoe ina nota-tawanei ma ana babataitoimi."

⁵ Ma rava anatapui Judea au paratana ma au Jerusalem i nae da John ita rautaniganai. Maranai ai go'apoapoe i rupeni, John, tau i bababataitoi au waira Jordan.

⁶ Ma John, *kamel* aparana metametanana i oteoteni ma ana tairoro gamogamo opina. Ana lam kapau ma manigewa.

⁷ Ma tauna, rava i ririwei i pa, "Rava au muriu e nenei i getelara, ega me tau. Ega tagotagogiu da ana ae uma guravana ana rupeni.

⁸ Tau wairei a bababataitoimi, wate tauna, Arua Vivivireinei ina bababataitoimi."

John, Iesu i bababataitoi

(Matthew 3:13-17; Luke 3:21-22)

⁹ Lamna maranaina Iesu, Nasaret, Galili i netawanei ma i nei ma John au waira Jordan, tauna i bababataitoi.

¹⁰ Ma maranai Iesu wairei i gegetai, i nana da mara i wanatawanei ma Arua Vivivireina me gabubu i gairai.

* 1:3: Isa 40:3

¹¹ *Ma God ponana marei i opu ma i riwa i pa, “Tam, tau natu au nuavaina ma u vinuaiainiu.”

*Satan, Iesu i raelari
(Matthew 4:1-11; Luke 4:1-13)*

¹² Ma lamna au murina God Aruana Vivivireina Iesu i paritawanana-opunei au mutulua.

¹³ Ma au pom 40 au mutulua i mae. Ma Satan, tauna i raelari. Ģamoġamo ġaiġaiawai nai au dobuna i mamae ma God ana anela marei tauna i paini.

*Iesu, lebalebaġai ruāġa ma ruāġa i raukwatuei
(Matthew 4:12-22)*

¹⁴ Ma gulau Herod, John i pani. Ma muriai Iesu i nae au Galili da rava awarrii God Riwana Aiaina i jimei.

¹⁵ Ma Iesu i ririwa i pa, “God ana mara vinevinena i ġetai. God ana vibadana vouna rava aubai, lamna i turiai. Ami ġo’apoapoena ona rupeni ma ona mae-tavirem ma Riwana Aiaina ona vitumaġanei!”

¹⁶ Mara tagogi Iesu Galili topana au gerana i bababara nae. Ma lebalebaġai ruāġa i ’nanai, Simon* ma ana tevera Andrew au topa i raraugida.

¹⁷ Iesu i riwei i pa, “Ona nei ma ona votaġotaġoiu. Ma me marina iana o tutuarui; nanare, ana viararamanimi da rava ona tuarui da ina vitumaġaneu!”

¹⁸ Ma maratogogi ai agida i voterei ma Iesu i votaġotaġoi.

¹⁹ Ma taui au gera i verau-nae. Iesu, Zebedi natunatuna i ’nanai, James ma John ai au waga ai agida wanawanarorona i vokaukauei.

²⁰ Ma maratogogi taui i ġorei, “Taumi ona nei ma ona votaġotaġoiu!” Ma taui amai Zebedi† ana taunola maiteni i voterei ma Iesu i votaġotaġoi.

*Iesu, arua-apoapoena rava awarina i viaġaġana-opunei
(Luke 4:31-37)*

²¹ Iesu ana Tauvotaġotaġo maiteni i nae au Capeniam.‡ Ma au Sabat, Iesu i rui au pari numana ma God Riwana Aiaina, viararamanana i vikarei.

²² Tauna ana rewapanana i viararamana eġa me mai Jew ai tarawatu babadai § nanare. Ma taurautaniġana ana viararamana i baiei.

²³ Maranai Iesu pari au numana i viviararamana ma oroto arua-apoapoena orana i rrurinia i garara

²⁴ i pa, “Iesu Nasaretei, aiwai e ġoegħoei awariai. Tam weka u nei da ma viapoapoeniai bo? Tau a aramanei tam aiai. Tam Vivivirem Godei!”

²⁵ Ma Iesu riwa bagibaginei i riwei i pa, “Ma genuana! Nai orotona ma opu-tawanei!”

²⁶ Ma arua-apoapoena orotona i viaikwajiei ma ponana i rata, i garara ma i opu-tawanei.

²⁷ Ma rava anatapui i bana-kauei ma taui ava i vitarapiri, “Wei aiwai? Wei viararamana vouna ma ana rewapanana maiteni! Wei ravana awarina rewapanana e mamae da arua-apoapoena i riwei ma tauna i vovoteletelei!”

²⁸ Iesu nolana, maratagogi i tua Galili au anatapuna.

* **1:11:** Gen 22:2; Isa 42:1; Mrk 9:7 * **1:16:** Wavana ġelauna Peter † **1:20:** Eng. Zebedi.

‡ **1:21:** Eng. Capernaum. § **1:22:** Wariaġa BADA, ana Tarawatu Moses i verei mai Israel aubai.

*Iesu, rava mağamağau i vilawani
(Matthew 8:14-17; Luke 4:38-41)*

²⁹ Nai marana pari numana i opu-tawanei ma ana tauvotağotağō maiteni i nae Simon ma Andrew ai au numa. James ma John maiteni i nae.

³⁰ Simon poiana wavinena ini ǵugurana ana au animatave i matamatave ma maranai Iesu i ǵeta ma numa ravai, tauna i pariverei.

³¹ Tauna i nae wavine awarina, nimana i vojjini ma i voagui da i vomairi. Lamna maranaina, ini ǵugurana i voterei ma wavinena, taui i paini.

³² Ma au bigai madeğā i neulai au murina, rava, ai rava doridoriai ma aiavoi arua-apoapoei au orai maemae, i neiai Iesu awarina.*

³³ Ma rava anatapui nai au melagaina i vitagogiei numa au metaetana.

³⁴ Ma Iesu, mağamağau i doria nununai i vilawani ma arua-apoapoe mağamağau rava awari i viağagaña-opunei. Ma arua-apoapoena i aramanei da tauna anina God natuna ma lamna aubaina taui i viǵaei da i genuana.†

*Iesu au Galili i raugugula nae
(Luke 4:42-44)*

³⁵ Ubaubanai boiboǵi, Iesu i vomairi ma numa i opu-tawanei ma i nae gabu au genugenuanana. Ma kampa, God awarina i raupari.

³⁶ Muriai, Simon ana rava maiteni i nae da i baiei.

³⁷ Ma maranai Iesu i nelägai, ma i riwei i pa, "Rava anatapui e baibaiem."

³⁸ Iesu i paribelei i pa, "Tana nae taon ǵelaui au ǵereğere, ma kampa maiteni God Riwana Aiaina ana raugugulei. Tau weilamna aubaina a nei."

³⁹ Ma Galili au anatapuna i naeni ma pari au numai i raraugugula ma arua-apoapoei i viopuni.

*Iesu, oroto opi doriani i vilawani
(Matthew 8:1-4; Luke 5:12-16)*

⁴⁰ Anina ma rava awarina opi doriani, i nei Iesu awarina ma au naona i peu ma i raudune ma agu i vibaǵei i pa, "Mepa da ma ǵoei, anina da ma viaiainiu."‡

⁴¹ Ma Iesu nuabola orana i oai ma urana i viloloi da i vodadani ma i riwa i pa, "Anina a ǵoeǵoei, ma aii!"

⁴² Ma maratogogi opi-doriani, oroto i voterei ma tauna i aii me.

⁴³ Anina ma Iesu i riwana-guratei i pa,

⁴⁴ "Tam ma nae! Aiwai i tuputupua awarim, eǵa rava ma vieǵei! Ma jijimanina ma nae pirisi pulo tau apuna awarina ma vietataiana-melem ma viaiaina pulona Moses i ririweia ma kaei da ina vimataira taui awari! Pirisi pulo tauapuina ana vianina ina verei da tam u lawana."

⁴⁵ Wate orotona i nae ma aiwai awarina i tuputupua lamna melagai au anatapuna i babaniana-naiei. Ma lamna aubaina Iesu melagai anatapui i vorei ma mepa eǵa rava ita mamaelana kampa i nae. Wate rava mepa maemaei i nei Iesu awarina.

* **1:32:** *Madeğā ina neulai au murina* anona lauvitau ana mara damona. Mai Jew ai lauvitau ana mara au Friday madeğā e neneulai au murina e vivikarei da Saturday madeğā e neneulai au murina e vorororovei. † **1:34:** Iesu i aramanei, mepa da ita kaei da arua-apoapoei ita riwa da tauna Keriso; lamna rava tauna ita egari da sorodia ita vibadei ma ta viǵavia, me taui e vivinua-notenotei nanare. Jhn 6:15 ma inanai. ‡ **1:40:** Mai Jew ai Tarawatu e ririwa da rava lepeleperai, taui miramirai me dobu ǵela ravai - *Jentail*. Mai Jew amapo nai ravai eǵa ina vodadani. Rava miramirai eǵa maiteni ina vitaparoro bo au melagai ina mae. Lamna aubaina mepa da rava miramirana i lawana, tauna ina ai-me, God tauna ina vaimelei ma rava maiteni ina mae ma ina taparoro.

2

*Iesu, oroto gwağagwağana i vilawani
(Matthew 9:1-8; Luke 5:17-26)*

¹ Iesu ana tauvotağotaño maiteni i wanavira-melei au Capeniam. Ma au pom ruāga au murina, rava nolana i nonori da tauna i nememei au melagai.

² Ma rava mağamağau i vitagogiei au numa. Patara i rata guratana da numa i oai ma metaeta maiteni i mae-potai. Iesu, God riwana i raraugugulei.

³ Nelara ruāga ma ruāga, oroto gwağagwağana rasirasie i avarai da i neiai Iesu awarina.

⁴ Rava i mağau guratana ma eğə tagotagogina da ita neiai Iesu awarina, lamna aubaina da tetelei i amğena da au poewa ma gavogavo i bauni ma kampa gwağagwağana ana rasirasina i tere-ğairei Iesu au naona.

⁵ Ma Iesu, nai ravai i 'nanai da ai vitumağana i rata, lamna aubaina gwağagwağana i riwei i pa, "Natu, am ǵo'apoapoei, a nota-tawanei."

⁶ Anina mai Jew ai tarawatu babadai ġelaui kampa i kiakiala, au orai i vinua-notanota i pa,

⁷ "God ainelana ǵo'apoapoei e notanota tawanei. Aiwai aubaina wei ravana nanare e bababani? Tauna, God e vivijibogi ma e ririwa da tauna, God nanare."

⁸ Maratagogi, Iesu Aruanai ai nota i vaia ma i riwei i pa, "Aiwai aubaina wei kauai o vivinua-notenotei?"

⁹ Metauna i telatela: ġwağagwağana ata riwei, 'Am ǵo'apoapoe a nota-tawanei.' Bo ata riwei, 'Ma vomairi, am animatave ma vaia ma ma babara?' ¹⁰ A góei da taumi ona aramanei da Rava Natuna au dobu ana rewapania e mamae da rava ai ǵo'apoapoe ina nota-tawanei ma ina vilawani." Ma gwağagwağana i riwei i pa

¹¹ "A riwem, ma vomairi, am animatave ma vaia ma ma nae au numa!"

¹² Orotóna i vomairi ma maratagogi aravi i vaia ma i babara nae. Ma patara i raraubiga, i bana-kauei ma God i voepaepai ma i ririwa, "Tauai eğə melanai kaua wenanare ata inanai!"

*Iesu, Levi i kwatuei
(Matthew 9:9-13; Luke 5:27-32)*

¹³ Iesu, Capeniam i voterei ma Galili topana au gerana i bababara ana tauvotağotaño maiteni. Ma patara i nei awarina ma tauna God riwana viararamanana i vikarei.

¹⁴ Ma i verau-nae aburuna ma Apius* natuna Levi i 'nanai, ana bagibagi au gabuna i kiakiala ma tax i tamitami Rome gabemanina aubaina. Iesu i riwei i pa, "Ma votağotağoi!" Levi i vomairi ma i votağotağoi.

¹⁵ Tax tautami ma ǵo'apoapoei ravai mağamağau, Iesu ma ana tauvotağotaño i votağotağoi. Ma anatapui, Levi ana au numa i kiala gogona ma i amam.[†]

¹⁶ Tarawatu Babadai ġelaui lamna Pharisi, ma taui i 'nanai da Iesu tax tautami ma ǵo'apoapoei ravai maiteni i amam. Anina ma Iesu ana tauvotağotaño i riwei i pa, "Aiwai aubaina Iesu tax tautami ma ǵo'apoapoei ravai maiteni e amam?"

* **2:14:** Eng. *Alphaeus*. † **2:15:** Moses, BADA ana Tarawatu i girumi ma mai Pharisi wei Tarawatuna i votağotağ-kauei. Ma taui kaua waduboi amamai ġariei maiteni i vovoteletelei ma i riwa da aiavoi Tarawatu ega ita vovoteletelei lamna taui rava apoapoei, ǵo'apoapoei tau kauei.

17 Ma maranai Iesu wei riwana i nononori ma taui i riwei i pa, “Rava lawalawai, doketa ega ita goegoei ma rava doridoriai, doketa e goegoei. Tau a nei goapoapoei ravai aubai ma ega rava jijimani aubai.”

Uji vitaraviravirana

(Matthew 9:14-17; Luke 5:33-39)

18 Mara tagogi, John Taubabataito ma Pharisi ai tauvotagotaō i ujiuji. Ma rava ġelaui i nei Iesu awarina ma i vitara-virevirei, “Aiwai aubaina John Taubabataito ma Pharisi ai tauvotagotaō e ujiuji, wate tam am tauvotagotaō ega ita ujiuji?”

19 Iesu i paribelei i pa, “Taumi o notanotai da taui aiavoi i raukwatuei tavine ana au torela, ina mae lota bo? Egateni kaua! Maranai tavitavine vou orotona, taui maiteni e mamae, taui ega ina uji.

20 Wate mara ina ġeta maranai tavitavine vou orotona ina vaitawanei ma lamna maranaina ana rava ina uji.”

21 Ma riwa e mamae, “*Tau kaua vouna a neiai ega me taumi ami kaua wadubona nanare.* Ega aiai ravana, gara vounei gara au wadubona ina popo-ratui da gavogavo ina vopotai. Mepa da nanare lamna, gara vouna gara wadubona ina roroi ma gavogavo ina rata.

22 Ma nanare, ega aiai *wine* vouna ina vaini da *wine* aniterenana wadubona ġamoġamo opinei au orana ina iwagi. Mepa da ina kauei, lamna *wine* vouna ina dodo ma *wine* aniterenana wadubona ina viairoroi ma *wine* ma aniterenana ina wanabauni‡. Wate *wine* vouna, anina da *wine* aniterenana vouna au orana ina iwagi.”

Iesu ana riwa Sabat aubaina

(Matthew 12:1-8; Luke 6:1-5)

23 Mara tagogi au Sabat, Iesu ana tauvotagotaō maiteni, *witi* wapuna au orana i nenea. Ma ana tauvotagotaō *witi rovei* i vaini ma i amam.

24 Pharisi ġelaui i 'nanai wei kauana i kaukauei ma taui Iesu i riwei, “Ma inanai, ata Tarawatu e mamae da Sabat, lamna lauvitau ana mara. Aiwai aubaina taui e vovobagibagi?”

25 Iesu i paribelei i pa, “Me peroveta i girugirimia nanare. David ana tauvotagotaō maiteni am-iraġe ma aiwai i kauei? Taumi o iavi ma aiwai aubaina anona, ega ota vinua-notenotei?

26 ♦Pirisi Ġeġetelarana Abiathar ana au mara, David, God ana au numa i rui ma palawa vovivirana i vaia ma ġelaui ana tauvotagotaō maiteni i verei da i ani. Moses ana Tarawatu e mamae da pirisi ava palawana e aniani.”

27 Ma Iesu ana riwa au damona i riwa i pa, “God, Sabat i kauei da rava voaguna aubaina ma ega rava ita kauei Sabat voaguna aubaina.

28 Ona vinuanotenotei, tau Rava Natuna, lamna aubaina tau anina Sabat badana.”

3

Iesu, Oroto urana irairaġena i vilawani

(Matthew 12:9-14; Luke 6:6-11)

1 Mara ġelauna au Sabat, Iesu i naeme au pari numana ma oroto urana irairaġena i 'nanai kampa i kiakiala.

‡ 2:22: Wine e tuputupua ma puropurona wine ana aniterenana ina viaisikasikai 21:1-6

♦ 2:26: 1Sa

² Ma Pharisi ġelaui i ġoei da aiwaiei Iesu ita viwavui. Lamna aubaina i 'nana-taġoġaġi da oroto ita vilawani bo eġa au Sabat.

³ Ma Iesu, orotona i riwei, "Ma nei, au naoi ma mairi!"

⁴ Ma Iesu, ravai i vitara-virevirei i pa, "Sabat au marana, metauna i aii: Aiaina tana kaei bo apoapoena? Tana vilawana bo tana viraġena? Tarawatu aiwai i riwei?" Ma anatapui i genuana.

⁵ Iesu ana amloġaġaina i 'nana viravira ma i 'nanai da taui orai i bado ma nuanuana i bola-kauei. Ma orotona i riwei i pa, "Uram ma viloloi!" Ma i viloloi ma i lawana.

⁶ Ma Pharisi maratagogi i opu ma i nae Herod ana rava awarii* ma aioga i tarai da Iesu mena ita viräġenanei.

Iesu, Patara awari i babani

⁷⁻⁸ Iesu ana tauvotaġoġaġi maiteni, taui i netawanei ma i nae au gera da ita vilauvitau; ma mai Galili patara ġaġġena i votaġoġaġi. Rava maġamaġaui, Iesu aiwai i kaukaueia nolana i nonori ma mai Galili ma Judea, Jerusalem taon, Idumea ma taon ġelaui waira Jordan taon au babagelauna, Taia taon ma Sidon taon,† taui anatapui i nei Iesu awarina.

⁹⁻¹⁰ *Iesu, rava maġamaġaui i vilawani. Ma lamna aubaina doridoriai maġamaġaui i viviamdudu ma i ġoei da tauna ita vodadani. Lamna aubaina ana tauvotaġoġaġi i riwei da waga i vokaukauei.

¹¹ Maranai, arua-apoapoei rava au orai maemaei, Iesu i 'nanai ma au naona i peu ma i garara, "Tam God Natuna!"

¹² Ma Iesu taui i viġaei da avena ita vieġa da tauna aiai.

Iesu ana Apasol 12 i vinei

(*Matthew 10:1-4; Luke 6:12-16*)

¹³ Anina ma Iesu i ġae au ola ma ana ġoanei nanare, rava i kwatuei da awarina i ġei.

¹⁴ Tauna, nelara 12 i vinei da maiteni ita mae ma muriae ita paritawanei da ita raugugula. Ma i ġorei Apasol.

¹⁵ Ma i vovai-virewapani da arua-apoapoei rava au orai ina viopuni.

¹⁶ Taui i vinevinei 12 ai wava wenanare,

Simon i ġoreġoreiā Peter‡

¹⁷ ma Zebedi§ natuna James ma ana tevera John i ġorei Boaneges, anona waiparara natunatuna,

¹⁸ Andrew,

Philip,

Batolomeo,*

Matthew,

Thomas,

James, tauna Apius† natuna,

Thadeus,‡

Simon, tauna Ununurana,§

* **3:6:** *Herod ana rava* anona lamna mai Jew ai boru, taui aiavoi Rome gabemanina i vovoagui. Taui ai bada wavalatona Herod Antipas. Mai Jew maġamaġaui ma mai Pharisi maiteni, i notai da Herod ana rava taui tauvibabenam ai rava au oienā awarii. † **3:7-8:** Eng. *Tyre & Sidon*. Wei ravana eġa mai Jew. * **3:9-10:** Mrk 4:1 ‡ **3:16:** Anona ġaima. § **3:17:** Eng. *Zebedi*. * **3:18:** Eng. *Batolomeo*. † **3:18:** Eng. *Alphaeus*. ‡ **3:18:** Wavana ġelauna Judas - Luk 6:16 § **3:18:** Anona lamna taui mai Jew ma taui Rome e viviġavie.

¹⁹ ma Judas Iskariotei; * tauna, Iesu tauvibenabenameina.

Rava i riwa da arua-apoapoei Iesu e vivibadei.

(Matthew 12:22-32; Luke 11:14-23; 12:10)

²⁰ Ma Iesu ana tauvotağotağō maiteni i rui au numa. Ma patara i rieiai da taui ega tagotagogina da ita am.

²¹ Ma Iesu ana numa ravai nolana i nonori ma i riwa i pa, “Tauna i bua.” Lamna aubaina i nei da ina taravaini.

²² Tarawatu babadai ġelaui Jerusalemei i nei ma i riwa i pa, “Arua-apoapoei, ai bada Bielsibul,[†] Iesu au orana i rui ma lamnei arua-apoapoei e viviopuni.”

²³ Lamna aubaina Iesu, wei Babadai i ġorei ma awanainei i pa, “Satan amapo Satan ega ina viopuni.

²⁴ Mepa da dobu ravai ina viġavia vivira, lamna dobuna ita mae ava.

²⁵ Ma nanare dam ina viġavia vivira, nai damna ita mae ava.

²⁶ Ma Satan ita vomairi ma ita viġaviana-melei, amapo ita mae ava.

²⁷ Taudanene amapo ega rava virewapanana ana au numa ina danene, ega da au naona ravana ġuravei ina raġni ma muriae ina danene.

²⁸ Riwa kaua a ririwemi da God ami ġo'apoapoei ma ami vijiboġa anat-apui ina nota-tawanei.

²⁹ Wate aiai da Arua Vivivireina e vivijiboġi, God, nai ravana ana ġo'apoapoei ega melanai ina nota-tawanei ma ana ġo'apoapoe ina mae-nonoa.”

³⁰ Iesu wenanare i babani, aubaina rava ġelaui e ririwa, “Iesu au orana arua-apoapoei e mamae.”[‡]

Iesu ana dam oina

(Matthew 12:46-50; Luke 8:19-21)

³¹ Iesu alona ma varevareina i nei ma au doa i maimairi ma riwa i paritawanei Iesu awarina da ita nei.

³² Ma patara Iesu i kiala kwaviviroi, ma taupariverena i riwei i pa, “Alom ma novunovum ma varevareim au doa ma e ġoegħoem.”

³³ Iesu i paribelei i pa, “Aiai alou ma aiavoi varevareiu?”

³⁴ Anina ma taui i kiakiala i 'nanai ma i riwa i pa, “Ona inana! Wei taui alou ma varevareiu.

³⁵ Aiai God ana ġoana e kaukauei, tauna alou ma novu ma vareiu.”

4

Doa tapuna ma tapuna ai awanaina

(Matthew 13:1-9; Luke 8:4-8)

¹ Iesu, giu i raukarena-melei Galili topana au adana. Ma patara i riei da ita rautanigħanei. Ma patara i rata, da tauna au waga i geru ma i kiala ma waga i dudui da i virauopu au topei ma patara au gera i mae.

² Ma kaua maġgamägħau awanainei i giu ma i viararamana i pa,

³ “Ona rautanigħana! Taupaewa, ana wapu i vokaukauei ma pei i ravi awawri.

⁴ Pei ġelaui au eta i peu. Ma kiu i ġeta ma i ani.

* **3:19:** Iskariot, lamna Judas ana melagai wavana da auna lamna Iskariotei. † **3:22:** Eng. *Beelzebul*. Anona lamna, *nabugara ai bada*. ‡ **3:30:** Tarawatu tau girumi i parivajjjigei aubaina taui e ririwa da Arua Vivivireina ana nola lamna baravu da parauma. BADA ega melanai ai ġo'apoapoei ina nota-tawanei.

⁵ Ma pei ġelaui doa au ġaiġaimana i peu, doa au avavana. Ma lamna aubaina maratagogi i gogo.

⁶ Wate maranai madeġa i rarani, maratagogi i poi, anona warami eġa ita ġaira guratana doa au orana.

⁷ Pei ġelaui, modu donadonai au poui i peu. Ma modu donadonai i gogo ma pei i gogogo i lavani, ma eġa ita ua.

⁸ Ma pei ġelaui doa au aiaina i peu ma i gogo kaua ma i ua, ġelaui 30, ġelaui 60 ma ġelaui 100.”

⁹ Ma Iesu i riwa i pa, “Mepa da taniġami e mamae, riwa ona nonori!”

*Aiwal aubaina Iesu awanainei i babani
(Matthew 13:10-17; Luke 8:9-10)*

¹⁰ Maranai Iesu ainelana i mamae ma ana tauvotaġo 12 ma tau rautaniġana ġelaui i ġeta ma Iesu i vibaġai da awanaina anona ita riwei.

¹¹ Ma Iesu i paribelei i pa, “God ana vigulau ana kaua mamae govaġana; taumi i vieġemi ma rava au tano maemaei, taui aiwai anatapui awanainei e paripari-verei.

¹² Lamna ana kaei da wariaġa peroveta aiwai i girugirumia ina tupua:

‘Taui ina inana ma eġa ita inainanai.

Taui e raurutaniġana ma eġa ita araramanei;
ma lamna aubaina taui eġa ita nenei God awarina
da ai ġo'apoapoe ita notatawanei.’

(Isaiah 6:9-10)

Doa tapuna ma tapuna anoi.

(Matthew 13:18-23; Luke 8:11-15)

¹³ Anina ma Iesu i riwei i pa, “Wei awanainei a babani ma anona eġa ota aramaniei bo? Ma awanaina ġelaui menanare ona aramananei?

¹⁴ Taupaewa, God riwana, rava anatapui e paripari-verei.

¹⁵ Rava ġelaui orai i bagibagi me etanai. Riwa au tepana e raurauei, wate maratagogi Satan e nenei da riwa rava au orai e vaivai-tawanei.

¹⁶ Ma rava ġelaui orai me doa viġaiġaimana. Taui, riwa i nonori ma maratagogi ana nuaiai riwa e vaivai.

¹⁷ Wate warami eġa da eġa ita mamae guratana. Ma maranai nuabola bo rau-iviapoapoe e nenei taui awari, aubaina taui ai tumaġana God awarina e tereterei. Taui maratagogi e peupeu.

¹⁸ Rava ġelaui orai me pei, modu donadonai au orai e gogolana. Taui anina riwa e nononori.

¹⁹ Wate lawana ai nuabola ma mane ai nuavainana ma kaua ġelaui ai au nuaiai e ruirui ma God riwana e lavalavani da eġa ita uua.

²⁰ Ma ġelaui, taui me pei doa au aiaina i peu. Taui, lamna anina riwa e nononori ma e vaivai-kauei ma e uua: ġelaui 30 ma ġelaui 60 ma ġelaui 100.”

²¹ Iesu i riwei i pa, “Rava, eġa rampa ita neinei da iriga au gabaurina ita tereterei bo vatara au gabaurina ta pa? Rampa ana au anikiala e tereterei ta pa?

²² Kaua mamae govaġai, anataputapui a vieġai ma kaua govagovaġai nanarena ana vieġai.

²³ Mepa da taniġami e mamae, riwa ona nonori!”

²⁴ Iesu i riwa i pa, “Aiwal o nononoria ona rautaniġanana-kauei, ruva o ruveruveia, God nanare awarimi ina ruvai ma ġelauna ina tavipotoi.

²⁵ Lamna aubaina, mepa da riwau ona aramaniei, tau ġelauna ma ġelauna ana veremi. Ma taui eġa ita aramaniei, lamna aiwai aburuna i nononoria, ina vine-boai.”

Pei gogogona ana awanaina.

²⁶ Iesu e ririwa i pa, “God ana vigulau me rava, *witi* peina au doa ita raviawawai.

²⁷ Ma waguvvara e matamatave ma maratom e vovomairi ma pei e gogogo ma e rarata. Wate aiwaiei e gogogo, tauna e vivinuanaiae.

²⁸ Doa ana nuaina, pei me *witi* e vivigogoi ma e uua. Au naona e raraupairei ma muriai e roverove ma muriai anona e magumagura au tapina.

²⁹ Maranai i magura, rava petona e raraukarei. Tuaruta marana i ġetai.”

Pei aburuoina ana awanaina

(Matthew 13:31-32, 34; Luke 13:18-19)

³⁰ Iesu i riwi i pa, “God ana vigulau aiwaiei ana parivai-patepatei bo aiwai awanainei ana pariveremi?

³¹ Wenanare, wei aina peina, lamna me gaga peina, pei aburuoina au dobu ma au doa i paewi.

³² Ma peina i gogo ma i rata da ai muomuoi i ġetawanei ma raġarāġai ġaegħae i terei ma au ġoui, kiu ai noġi ita voai.”

³³ Ma Iesu, awanaina maġamaġaui, rava au matai i raugugulei da taui ai rau-taniġana ana au ruva nanare.

³⁴ Awanainei, rava awari i giugiu, wate ana tauvotaġotaġo ava awari kaua anatapui i vivieġġai.

Iesu, kojikojira i ravi-daumorai

(Matthew 8:23-27; Luke 8:22-25)

³⁵ Nai aubigaina Iesu, ana tauvotaġotaġo i riwei i pa, “Tana damana topa au baba ġelauna.”

³⁶ Anina ma taui patara i voterei. Ma anatapui Iesu, maiteni au waga i geru ma i damana, waga ġelaui maiteni.

³⁷⁻³⁸ Iesu, waga au murina unutana i terei ma i raunuavuru. Ma kojikojira ġaegħaena i tupua ma rabama, waga au tepana i rauruae ma waira, waga i oaoai. Ma ana tauvotaġotaġo, tauna i ravi-dagudagui ma i riwei i pa, “Taugiu, nuanuam e bolabolai bo eġa da tana iraġe?”

³⁹ Ma tauna i vomairi ma ive i viġġei ma i riwei i pa, “Ma genuanal!” Ma rabama i riwei i pa, “Ma mae-genuatau!” Ma ive i wanatuini ma daumora ġaegħaena i matave.

⁴⁰ Iesu ana tauvotaġotaġo i riwei i pa, “Aiwai aubaina o rovorovo? Taumi amapo da eġa ota vitumaġħana!”

⁴¹ Ma taui i rovo kaua ma i riwa vivira i pa, “Wei aiai ravana da ive ma rabama tauna e vovoteletelei?”

5

Iesu, arua-apoapoena oroto awarina i viaġaġana-opunei.

(Matthew 8:28-34; Luke 8:26-39)

¹ Iesu ana tauvotaġotaġo maiteni Galili topana au baba ġelauna i ġeta, mai Gerasa ai au dobu.

² Wei au dobuna, arua-apoapoena oroto au orana maemaena.

³⁻⁵ Eġa aiai tagotagogina da ita vovaiubai. Mara maġamaġauna, aena ma urana seinei i pani. Wate wei i viaituituini, ma eġa tagotagogina da seinei ita pani. Marai ma waguvvarai i nene-labalababa ma i garagarara ma ġaimei tupuana i boribori-melei ma au kokoaga ma au ola i raunuma.

⁶ Maranai Iesu wagei i opuropu, arua-apoapoei orotona i ruiruinia, ueia Iesu i 'nanai ma kokoagei i ruba ma Iesu au naona i mae-peu ma i raudune.

⁷⁻⁸ Iesu, ravana i riwei i pa, "Arua-apoapoa, wei orotona ma opu-tawaneii!" Ma orotona, ponana au aidamo ma i garara, "Iesu, God Aidamo Telarana Natuna! Aiwai awariu e āgoēgoei? God wavanei a vivibaǵaim da eǵa ma kovoǵiu!"

⁹ Iesu, orotona i vitara-virevirei i pa, "Tam wavam aiai?"

I paribelei i pa, "Tauai a maǵa, aubaina tau wavau lamna Gavia Patarana."

¹⁰ Ma arua-apoapoei, Iesu i vibaǵa-guratei da avena nai dobunei ita viopuna-tawanei.

¹¹ Ma poro boruna āgaaena au āgereǵere ola au adana i labalaba.

¹² Ma arua-apoapoei, Iesu i vibaǵai, "Ma paritawanelai poro au orai ana rui."

¹³ Iesu i vianina. Ma arua-apoapoei, orotona i opu-tawanei ma poro au orai i rui. Poro boruna 2,000 nanare olei i ruba āgaira da au topa i monu.

¹⁴ Ma poro taupainii i ruba nae au melagai ma au wapu; ma riwa i vibabarai. Ma rava i nei da ita inanai aiwai i tupua.

¹⁵ Ma maranai i nae Iesu awarina, orotona au naona arua-apoapoei patarai au orana i mamae; tauna i kiakiala, gara i oteni ma ana nota jijimanina. Ma taui i rovo kaua.

¹⁶ Ma aiwai i tupua orotona ma poro awari, taui i 'nainanaia, rava i riwana-naiei.

¹⁷ Ma dobuna ravai, Iesu i vibaǵai da dobuna ita oputawaneii.

¹⁸ Iesu au waga i gerugeru ma orotona, Iesu i vibaǵai i pa, "Tau maiteni tana nae."

¹⁹ Iesu i viǵaei ma i riwei i pa, "Ma naeme am au dam. Ma BADA kaua aiwai āgaaena i kaukaueia ma ana iviaiai tam awarim, taui ma pariverei."

²⁰ Ma anina orotona, Iesu i netawanei ma i nae au Dekapolis (melagai 10) da Iesu aiwai awarina i kaukaueia, rava i riwana-naiei. Ma taui anatapui i nononoria i baiei.

Iesu, Jairus natuna wavinena ma wavine doridoriania i vilawani.

(Matthew 9:18-26; Luke 8:40-56)

²¹ Iesu wagei i damana me topa au baba āgelauna. Maranai kampa i āgeta ma topa au adana, ma patara i rieiai.

²² Pari numana badana wavana Jairus i nei weka ma maranai Iesu i 'nanai, tauna Iesu au aena i mae-peu

²³ ma i vibaǵa-guratei i pa, "Natu guguinina e irairaǵe. Ma nei ma uram au inina ma terei ma ina lawana."

²⁴ Anina ma Jairus, Iesu maiteni i nae ma patarana i mae gariǵuruvi ma i votaǵotaǵoi.

²⁵ Wavine tagogi kampa patarana au orana awarina tara-doriana i mae da madeǵa 12 i kwa.

²⁶ Ana mane anataputapuna, dokedoketa maǵamaǵau awarii i tawanei ma eǵa tagotagogina ita vilawani ma amapo da ana doria i rarata.

²⁷⁻²⁸ Tauna, Iesu nolana ma ana babani i nonori ma au orana i vinuanotanota i pa, "Mepa da ana gara ava ana vodadani ma ana lawana." Ma tauna, Iesu murinei i nei ma ana gara i vodadani.

²⁹ Maratagogi, tara-doriana i wanatuini ma malana i vaia da i lawana.

³⁰ Nai maranaina, Iesu malana i vaia da ana rewapanana i opu-tawanei ma i mae-tavirei patara au poui ma i riwa i pa, “Aiai au gara i vodadani?”

³¹ Ana tauvotaḡotaḡo, tauna i riwei, “Ma inanai, patara i mae gariḡuvim! Ma menanare da u riwa ‘Aiai i vodadani?’”

³² Wate Iesu i ’nana viravira da ita inanai aiai i vodadani.

³³ Wavine i rovo kaua ma i sisisi, wate i aramanei aiwai awarina i tupua ma i nei ma Iesu au naona i raupari ma aiwai anatapui i vieḡei.

³⁴ Anina ma Iesu, wavine i riwei i pa, “Natu, am tumaḡana i vilawanim. Am doria i kwa, ana nuaubam ma nae!”

³⁵ Maranai i bababani ma rava ġelaui Jairus ana numei i nei ma i riwei i pa, “Natum ana mara i kwa. Eġa Taugiu ma visina-viravirai.”

³⁶ Iesu ai babani i nonora-tawanei ma Jairus i riwei i pa, “Eġa ma rovo, ma vitumaḡana!”

³⁷ Iesu, rava ġelaui i viḡaei ma Peter ma James ma ana tevera John maiteni i nae.

³⁸ Ma Jairus ana au numa i ġeta ma Iesu, patara i ’nanai; i toutou ma i taratarakwatu

³⁹ ma i rui ma taui i riwei i pa, “Aiwai aubaina o taratara-kwatu ma o toutou? Tevera eġa ita iraġe, tauna e matamatave ota.”

⁴⁰ Ma taui, Iesu i kakei, ma lamna aubaina rava i viopuni au doa ma tevera alona ma amana ma tauna ana tauvotaḡotaḡo tonuġa maiteni i rui mepa tevera i matamatave lana.

⁴¹ Iesu, tevera nimana i vaia ma i riwei i pa, “*Talitha koum!*” wei anona, “Kukuma, ma vomairi!”

⁴² Maratagogi i vomairi ma babara i vikarei (Tauna ana madeġa 12). Ma taui i ba kaua.

⁴³ Iesu, taui i riwana-guratei da eġa aiai ita vieḡei ma i riwa da ita viambagibagi.

6

Mai Nasaret, Iesu i parivirevirei

¹ Iesu ana tauvotaḡotaḡo maiteni nai dobuna i netawanei ma i naeme ana au melagai.

² Ma Sabat marana i ġeta ma tauna giu i vikarei au pari numana. Ma rava maġamaġaui i riei da i rautaniġanei. Taui anatapui i baiei ma i vitara-viravira vivira i pa, “Wei tauna nuaulaula ma aramanana mepa i vaia?” Ma, “Kaua aiwaiei e kaukauei?”

³ Anina ma taui ava i babani vivira i pa, “Tauna tauvoa. Mary ana nat-uevou ma varevarena James, Joses, Judas ma Simon ma novunovui weka e mamae tauna bo?” Ma lamna aubaina mai Nasaret, Iesu i parivirevirei.

⁴ Iesu, taui i riwei i pa, “Peroveta dobu au ġelaui e vivivirei, wate ana au melagai, ana rava ma ana dam oina, eġa ita vivivirei.”

⁵⁻⁶ Tauna i baiei da rava eġa tauna ita vitumaġanei. Ma eġa tagotagogina da kaua vivirewapanai kampa ita kauel. Tauna urana, rava ruāga ota doridoriai au tepai i terei ma i vilawani. Ma muriai, melagai nununai au ġereġerei i viararamana nae.

Iesu ana Apasol i paritawanei da ita viararamana

⁷ Ma Iesu, taui 12 i ġoreiai ma ruaruägei ava i paritawanana-opunei ma rewapanana i verei da arua-apoapoei ina viägaġana-opunei.

⁸ Ma riwa bagibaginei i riwei i pa, “Ami au vaḡai, eḡa aiwai ona vaia anina jiḡona ava; eḡa lam, eḡa autu bo mane au urami.

⁹ Ae uma ona oteni ma eḡa kwama ġelauna ona vaia.”

¹⁰ Ma i riwei i pa, “Metauna melagaina o ruiruiana ma i vianinemi. Numa tagoginina au orana ona mae da melagaina ona oputawanei.

¹¹ [✧]Mepa da au melagai o ġeta ma rava eḡa ita vianinemi bo eḡa ita rautaniġanemi. Nai melagaina ona oputawanei ma aemi pokauna ona rauabuabui da ina aramanei da taui ai wavu!”*

¹² Ma taui i opu ma rava awari i raugugula ma i riwei i pa, “Taumi ami ḡoapoapoei ona voterei ma ona mae-taviremi God awarina!”

¹³ Taui, arua-apoapoei i viaġaġana-opunei. Ma rava doridoriai maġamaġaui, olive oirana au kolai i buloi ma i vilawani.

John Taubabataito ana iraġe

¹⁴⁻¹⁶ [✧]Iesu nolana i nae da rava anatapui i aramanei ma tauna i babaniei. Ma rava ġelau i ririwa i pa, “Tauna, kaua vivirewapanai e kaukauei, aubaina tauna John Taubabataito iraġelei i vomairi me.” Ĝelau i ririwa i pa, “Tauna Elijah i nememei.” Ma ġelau i ririwa i pa, “Tauna peroveta variaġai nanare.” Ma gulau Herod,[†] nolana i nonori ma i riwa i pa, “Tau, John Taubabataito uana a borituini; marina i vomairi me.”

¹⁷⁻²⁰ John ana virarautua, lamna wenanare. Muriae da Iesu ana viararamana nolana ita vikarei. Herod, tuana Philip awana i kwalei ma i ravaġi. Wavinena wavana Herodias. Au murina John, Herod i riwana ġirigiriei i pa, “Tarawatu e mamae da eḡa vareim awana ma kwalei.” Ma Herod, riwa i paritawanei da John i pani da panipani au numana i terei. Herod ana nuaiaina, John i rarautaniġanei. Wate nuanuana i raġaraġa.

Ma Herodias, John awarina amlona i ġaġġai ma viraġenana i ġoei. Herod i aramanei da John, lamna rava jijimanina ma vivivireina ma i gagaloei. Herod, John i rovoei ma lamna aubaina wavinena eḡa tagotagogina da aiwai ita kaei.

²¹ Ma wavine, gavogavo i ’nanai, maranai Herod ana tupua marana i ġeta ma torela i vokaukauei. Ma gabemani babadai ġaġeġai ma sorodia ai babada ġaġeġai ma Galili babadai i raukwatuei.

²² Ma Herodias natuna wavinena i nei ma i ara. Herod ma taui maiteni i amam i vinuiaiñi. Ma gulau, guguini i riwei i pa, “Aiwai u ġoeġoeia ma vibaġai ma ana verem!”

²³ Ma i parivainuāġani i pa, “God au matana a ririwem da aiwai u vivibaġieu ana verem da au vigulau navanavana au paratana.”

²⁴ Ma tevera wavinena i opu ma alona i paridadanei i pa, “Aiwai ana vibaġe?”

Ma i paribelei i pa, “John Taubabataito kolana.”

²⁵ Ma maratagogi i vipaparana ma gulau awarina i rui ma i vibaġai i pa, “A ġoeġoei da marina John Taubabataito kolana ma vereu au aboma!”

* **6:11:** Act 13:51 * **6:11:** Wariaga mai Jew, tauvaġai e nenememei au Israel. Taui au aei pokau e raraabuabui maranai Israel ana au parata e ġeġeta, lamna taui orai e viaiaini. Ma Iesu ana tauvotaġo wei i kaei da melagai ravai ina notai, “Tauvotaġo ririwa da tauta orata apoapoena me tauta eḡa mai Jew.” * **6:14-16:** Mrk 8:28 † **6:14-16:** Herod Antipas, Galili ana Wavalatona.

²⁶ Ma gulau nuanuana i bola-kauei. Wate parivainuağana boibogi i kauie taui i amam au matai. Ma lamna aubaina guguini, aiwai i vivibağei anina i vjaninei.

²⁷ Ma tauvirağena i paritawanei ma i riwei da John kolana ita neiai. Ma i nae panipani au numana ma John uana i borituini.

²⁸ Ma kolana au aboma i terei ma guguini i verei ma guguini, alona i verei.

²⁹ Ma John ana tauvotağotağo, nolana i nonori ma i nei ma taubeuna i vaia ma au kokoaga i vimataveni.

Iesu, nelara 5,000 i viambagibagi

(Matthew 14:13-21; Luke 9:10-17; John 6:1-14)

³⁰ *Apasol* i ġeta memei ma aiwai anataputapuna i kaukuae ma i raraugugulei, Iesu i vieġei.

³¹ Lamna maranai, rava mağamağau i nenei ma i nenei da Iesu ana tauvotağotağo maiteni eġa gavogavo ita maemae da ita am. Lamna aubaina Iesu, taui i riwei i pa, "Taumi ava ona nei ma tana nae au mutulua da laumi ina tau mara aburuna."

³² Ma anatapui wagei i nae au mutulua.

³³ Wate rava mağamağau i 'nanai i nenei ma i aramanei taui aiavoi. Ma melagai nununai anatapui geraei i ruba gogona da au dobuna i aigeta.

³⁴ Maranai Iesu wagei i tuopu au gera ma patara ġaegħena i 'nanai ma nuanuana i bola-kauei. Taui me sипу ma eġa ai tauvipaipai. Ma Riwana Aiaina viararamanai i raukarei.

³⁵ Ma au biga e tuturiai ma ana tauvotağotağo i nei awarina ma i riwei i pa, "Wei mutulua ma madeġa e arearere.

³⁶ Rava ma paritawanei da ina nae au melagai ma au wapu au ġereġere da ai lam ina gimarai."

³⁷ Wate Iesu i paribelei i pa, "Taumi ona viambagibagi!" Ma taui i paribelei i pa, "Mepa 200 denarii[‡] tana vaia da wei patarana tana viambagibagi?"

³⁸ Ma Iesu i paridadanei i pa, "Palawa biaġa awarimi? Ona nae ma ona baiei!"

Maranai i nelägħai ma i riwa i pa, "Awariai, palawa five ma iana ruāga."

³⁹ Anina ma Iesu, patara i riwei i pa, "Boru nununai, gidagida au majimajigħai ona kiala nae."

⁴⁰ Ma taui ai au boru 50 da 100 nanare i kiala nae.

⁴¹ Ma Iesu, palawa five ma iana ruāga i vaia ma i ġoutata au mara ma God i viegħualuei. Ma palawa i vogimajimai ma iana i ġutai da ana tauvotağotağo i verei ma taui, rava i verei.

⁴² Ma patara i am ma i am-iaua.

⁴³ Ma ana tauvotağotağo, lam am tereterenai i tuarui da poa muomuo i 12, i vioai.

⁴⁴ Nelara 5,000 i viambagibagi.

Iesu, waira au tepana i babara

(Matthew 14:22-33; John 6:15-21)

⁴⁵ Anina ma Iesu, ana tauvotağotağo i egari da ita aidamana au Bethsaida.[§] Taui au waga i geru da i nenei ma tauna, patara i paritawanei.

⁴⁶ Patara i paritawanei ma tauna ava i ġae au ola da ita raupari.

⁴⁷ Ma waguvvara ana tauvotağotağo au waga au topa ma Iesu au alala.

[‡] **6:37:** 200 denarii. Denarius tagħi lamna tabagħibagi ai maia au pom tagħo nolana aubaina.

[§] **6:45:** Eng. *Bethsaida*.

48 Ma ana tauvotaḡotaḡo, lare i vovoguratei da ita ḡota wate ive i viraumatamatani. Ma maratomtom nanare, Iesu i nae awari. Tauna waira au tepana i bababara ma i ḡoei da taui ita tutelarei.

49-50 Ma maranai taui, Iesu i 'nanai topa au tepana i bababara ma i notai da tauna konāga ma i rovo kaukaua ma i vigaragararei. Ma maratagogi Iesu i riwa i pa, "Tepami ina tora! Tau, eḡa ona rovo!"

51 Ma au waga i geru ma ive i wanatuuii ma taui i bana-kauei.

52 Avena da kaua palawa awarina i kauei i 'nanai, wate ana rewapanā eḡa ita aramana-kauei. Taui orai i bado ma i vinuanaina.

*Iesu, rava doridoriai maḡamaḡau i Genesaret i vilawani
(Matthew 14:34-36)*

53 Taui, topa i damani ma au Genesaret i ḡota ma ai waga i raḡini.

54 Taui, waga i oputawanei ma rava, Iesu i 'nanai ma maratagogi i aramanei da tauna.

55 Iesu nolana, Galili provins anatapui i naeni ma i nonori da tauna mepa i mamae. Ma kampa, doridoriai rasiriasiei i vivaneiai.

56 Iesu mepa i nelanana, melagai ġaeġaei ma muomuoi ma wapu mepa rava e mamae lana. Ma rava, ai rava doridoriai nai au melagaina i neiae au deba. Ma i vibaḡa, da doridoriai, Iesu ana gara adana ava ita vodadani. Ma aiavoi Iesu ana gara i vodadani i lawana.

7

Amamami ai giu

(Matthew 15:1-9)

1-4 Pharisi ma Jew anatapui, magumagura ai giu maḡamaḡau i notanota-jijini. Taui, ai aniuma ma ai aniam anatapui e oḡaoḡai lamnei taui e viaiaina-melei God au matana. Ma maranai au maket da e nenei, urai ina oḡai ma ina am. Taui eḡa ina am da au naona urai ina oḡa kauei me ai magumagura ai giu nanare.

Maratagogi Pharisi ġelaui ma Tarawatu Babadai, Jerusalem ei i nei Iesu awarina da ita rautaniġanei. Ma taui i 'nanai da Iesu ana tauvotaḡotaḡo ġelaui, urai eḡa ita oḡai ma i amam.

5 Ma taui, Iesu i vitara-virevirei i pa, "Aiwai aubaina am Tauvotaḡotaḡo magumagura ai giu, eḡa ita votaḡotaḡoi ma ana ura miramirai e amam?"

6 Ma Iesu i paribelei i pa, "Taumi morumorumi ma o vikaua-aiaina-melemi. God ana peroveta Isaiah i riwa kaua maranai i riwa, i pa:

'Wei ravai ipiriei e vovoepaepai,
wate nuanuai aeueia.

7 Taui rava ai giu e viiararamani.

Lamna aubaina ai voepaepa anona eḡa.' *(Isaiah 29:13)*

8 Taumi, God ana Tarawatu o teretere-tawanei ma ami giu o votaḡotaḡoi."

9 Ma i riwana-melei i pa, "Taumi o aramana kaua da God ana Tarawatu o gedugeduaiei ma amamami ai giu o vovotaḡotaḡoi."

10 *God ana Tarawatu, Moses i girugirumia nanare: *Amam ma alom ma vivrei ma Aiai amana ma alona e enaena-boai, tauna ona viraġeni.*

11 Wate taumi o viararamana da aiai awarina mane bo purapura, amana bo alona ita voagui ma ita riwei, 'Awariu e mamae da ata voaguim; wate lamna *Corban* - a tereriei pulo, God aubaina.'

12 Wei viararamana, taui e viviġaei da amana ma alona ina voagui.

13 Ma wei taunei viararamana, rava awari o vividamani; ma God riwana o vivikwakwavi. Ma kaua mağamağau i ġelaui maiteni o kaukauei.”

Metauna kauai, rava orai e vivimirai.

(Matthew 15:10-20)

14 Iesu, patara i kwatuana-melei ma i riwei i pa, “Anatapumi ona rautaniğaneu ma aiwai a ririwemi ona aramanei.

15-16 Aiwai au tanoei au orami e ruirui, lamna eğä ita vivimiraimi ma aiwai da oramiee e opuopu, lamna e vivimiraimi God au matana.”*

17 Anina Iesu, patara i voterei ma i rui au numa. Ma ana tauvotağotağo, i vitara-virevirei da wei awanainana anona aiwai.

18-19 Iesu i paribelei i pa, “Taumi maiteni eğä ota aramanei bo? Kaua aiwai au tano, rava au orai e ruirui amapo eğä ina vimirai. Anona lamna wei kauai, eğä ita ruirui rava au nuapouna, wate au manawana da e opuopu.” (Wei riwanei Iesu, lam anatapui i viaiaini).

20 Anina ma i riwa i pa, “Aiwai, rava oranei e opuopu; lamna, rava e vivimirai God au matana.

21 Anina rava nuanuanei vinuanotanota apoapoei e opuopu me: viawawana labalababa, danene, virağena, awadanene,

22 ambo, rau-iviapoapoe, moru, erawa, unura, terevaideğä, maeğäe ma opa.

23 Wei kauai apoapoei anatapui oranei e opuopu ma rava e vimiramirai.”

Jentail wavine,[†] Iesu i vitumağanei

(Matthew 15:21-28)

24 Ma dobuna i voterei ma i nae Taia ana au parata. Ma i rui govağä au numa ma eğä ita ġoei da rava ita aramanei da tauna kampa, wate eğä tagotagogina da ita raugovağä.

25-26 Wavine tagogi, Iesu nolana i nonori ma i nei awarina. Tauna eğä Jew ma Jentail au Phonisia i tupua, Siria ana au parata. Arua-apoapoenä, tauna natuna wavinena aburuna i ruini; ma alona i nae Iesu au naona i mae-peu ma ma i vibağai da arua-apoapoenä ita viopuni.

27 Iesu i aramanei da tauna Jentail; lamna aubaina i riwei i pa, “Eğä ita ai da roaroa ai lam ata vaia da auou ata verei da au naona roaroa ina amiau.”‡

28 Ma wavine i paribelei i pa, “Bada, aiwai u riwei; lamna riwa kaua. Wate auou, roaroa ai lam momoğina, kepakepa au gabaurina e rauraua e aniani.”

29 Ma Iesu wei i riwei i pa, “U paribelana kaua, aubaina ma nae au numa. Arua-apoapoenä natum i opu-tawanei.”

30 Ma wavine i naeme au numa. Natuna wavinena i 'nanai i matamatave, arua-apoapoenä boibogi tevera i opu-tawanei.

Iesu, oroto taniğä-potapotana ma mena birebirena i vilawani

31 Iesu Taia ma Sidon ana parata i netawanei ma au babağela Dekapolis i verautuini ma i nae au Galili topana.

32 Orototaniğana potapotana ma menana birebirena i neiai Iesu awarina ma i vibağai da urana au inina ita terei da ita vilawani.

* 7:15-16: Giruma ġelaui Mark uranei i girugirumia wei riwai wenanare e mamae, “Mepa da taniğami e mamae, ona rautaniğana.” † 7:23: Rava eğä mai Jew. ‡ 7:27: Riwa roaroa wei au awanaina lamna mai Jew. Taui e notanotai da taui i ai guratana eğä me rava ġelaui. Lamna aubaina taui dobu ġelaui ravai e ġoreğorei auou.

³³ Iesu, oroto i taravaina-opunei da taui ava ma ura-gigina, oroto au taniġana i terei ma ura-gigina ġelauna i ovai ma menana i vodadani.

³⁴ Nuanuana i bolai ma i ġoutata au mara; i lavutu tawanana ma oroto i riwei i pa, "Ephatha!" Wei anona, "Ma wanatawanei!"

³⁵ Maratagogi taniġana i wanatawanei ma menana i vidagudagu ma i babani kaua.

³⁶ Ma Iesu, taui i viġaei da aiwai i tuputupua, avena rava ita vieġei. Iesu, rava i viġaei; wate taui eġa ita rautaniġana ma riwa i vituai.

³⁷ Ma maranai ravai wei i nonori, taui i bana-kaei ma i riwa i pa, "Aiwai anatapui i kauana-kauei. Tauna, rava taniġa potapotai e vivilawani da e rarautaniġana ma menabirebirei e bababani."

8

*Iesu, rava 4,000 i viambagibagi
(Matthew 15:32-39)*

¹ Nai maranai, patara ġaeġaena i riana-melei. Patara eġa ai lam. Ma Iesu, ana tauvotaġotaġo i kwatuei da i nei ma i riwei i pa,

² "Au pom tonuġa patara maiteni a mae ma ai lam eġa ma a rau-nuapoapoelei.

³ Taui ġelaui, uamei i nei. Mepa da ana am-iraġe ana paritawanei ai au numa, ma au etanai ina raumolaġau."

⁴ Ma ana tauvotaġotaġo i paribelei i pa, "Wei mutulua ma mepa lam tana vaia da wei patarana tana viambagibagi?"

⁵ Ma Iesu, taui i paridadanei i pa, "Awarimi palawa biaġa?"

Taui i riwa i pa, "seven."

⁶ Ma Iesu, patara i riwei da au doa i kiala. Ma palawa seven i vaia ma God i viegualuae ma i vogimagimai ma ana tauvotaġotaġo i verei da patara i verei.

⁷ Ma taui awari, iana muomuoi ruaġa ota. Iesu i vaia; God i viegualuae ma ana tauvotaġotaġo i verei da patara i verei.

⁸ Taui anatapui i am da i am-iaua. Ma lam am tereterenai i tuarui da poa ġaeġaei seven i vioai.

⁹ Rava 4,000 i viambagibagi. Ma muriae i paritawanei ai au numa.

*Pharisi, God ana mataira i vibagħi
(Matthew 15:39-16:4)*

¹⁰ Maratagogi, Iesu ana tauvotaġotaġo maiteni au waga i geru ma i nae Damanuta ana au parata.

¹¹ Pharisi ġelau i nei ma viparipariġai i vikarei Iesu maiteni. Taui i ġoei da Iesu ita raudadani da mataira Godei ita viatataiei.

¹² Iesu, Aruanei i lavutu tawanana ma i riwa i pa, "Wei kimta voui, aiwai aubaina mataira e ġoegħoei? A ririwana-kauemi, amapo mataira eġa ona inanai."

Iesu, ana tauvotaġotaġo I parivainotai

¹³ Anina ma Iesu, patara i netawanei ma ana tauvotaġotaġo maiteni au waga i geru me ma i damana Topa Galili au baba ġelauna.

¹⁴ Ma ana tauvotaġotaġo, nuanuai i vuru da ai palawa ita vaia ma palawa tagog i ava au waga i mamae.

15 Iesu, taui i parivainotai i pa, “Pharisi ma Herod ai giu ma ai viararamana morumoruna ona inana-kauei! Lamna me *yist*.^{*}”

16 Ma taui i babani vivira i pa, “Tauta ega ata palawa aubaina da e ririweta.”

17 Ma Iesu i aramanei ma taui i riwei, “Aiwai aubaina o bababani da taumi awarimi ega palawa? Taumi amapo da ega ota aramana ma o vivinuanaina? Orami i bado bo?

18 [◊]Matami e mamae ma ega ota inainana. Ma tanigamai e mamae ma ega ota nonora. Ma o vinuanotanota bo ega?

19 Maranai palawa five a vogimagimai rava 5,000 aubaii, lam am tereterenai o tami da poa biaga o vioai?”

Tau i paribelei, “Twelve.”

20 “Ma maranai palawa seven a vogimagimai rava 4,000 aubaii, lam am tereterenai o tami da poa gaegei biaga o vioai?”

Tau i paribelei, “Seven.”

21 Ma taui i riwei i pa, “Ma amapo da o vivinuanaina!”

Iesu, oroto mata apoapoena i vilawani au Bethsaida

22 Tau i nei au Bethsaida ma rava gelau, oroto matana apoapoena i neiae Iesu awarina ma i vibaaga-guratei da ita vodadani.

23 Ma Iesu, oroto matana apoapoena i raunimavoai ma melagaii i taravaina-opunei. Ma kampa matana i ovai ma urana au matana i terei ma i paridadanei, “Aiwai e inainanai bo ega?”

24 Ma i taepai ma i riwa, “Rava a inainanai ma taui me ai ita bababara.”

25 Iesu, urana i tere-melei oroto au matana. Ma matana i wanatawanei da aiwai anatapuna i ‘nana-kauei.

26 Iesu, tauna i paritawanei ana au numa ma i riwei, “Ega ma nae au melagai! Wate jijimanina ma nae au numa.”

*Peter i riwa da Iesu, tauna Keriso
(Matthew 16:13-16; Luke 9:18-20)*

27 Iesu, ana tauvotaago maiteni i nae melagaii Caesarea Philipai au geregerei. Maranai i nena ma Iesu, taui i paridadanei, “Rava e ririwa; tau aiai?”

28 [◊]Ma taui i paribelei, “Gelaui e ririwa da tam, John Taubabataito. Ma gelau Elijah. Ma gelau e ririwa da peroveta wariaagan tagogi.”

29 Ma Iesu, taui i paridadanei, “Wate taumi, mena o notanota-nei? O ririwa da tau aiai?”

Peter i paribelei, “Tam God ana Messiah - anona Keriso.”

30 Iesu, taui i vigaei da ega aiai ina riwei da tauna aiai.

*Iesu ana irage ma ana vomairi me i babaniei
(Matthew 16:21-23; Luke 9:21)*

31 Ma Iesu i raukarei da ana tauvotaago i giuni i pa, “Rava Natuna ina vinuapoapoe kaua. Ma dogadogara, pirisi babadai ma tarawatu babadai, tauna ina pari-geduaiei ma ina viraageni. Ma au pom tonuga au murina ina vomairi me.”

32 Iesu jijimaninei wei kauai i babaniei ma lamna aubaina Peter, tauna i taravaini au ririva ma enana i vikarei.

* **8:15:** Yist mai Jew awarii awanainei lamna aiwai da apoapoe, mira bova e vivitua bo e vivimaga. Weka Iesu mai Pharisee ma mai Herod ai lawana ma ai giu morumorui e babaniei, da ega ina tua.

[◊] **8:18:** Mrk 4:12 [◊] **8:28:** Mrk 6:14-15

³³ Wate Iesu i mae-tavirei ma ana tauvotaḡotaḡo i 'nanai. Ma Peter i eni, i pa, "Satan ma nae au muriu! Tam am nota eḡa Godei ita nenei, eḡa da ravei."

Iesu votaḡotaḡona anona

(Matthew 16:24-28; Luke 9:23-27)

³⁴ Ma Iesu, patara ma ana tauvotaḡotaḡo i raukwatuei ma i riwei, "Mepa da aiai ita votaḡotaḡoiu. Tauna ina boviana-melei ma ana korosi ina avarai ma ina votaḡotaḡoiu."[†]

³⁵ Aiai ana lawana e tatajijini, ina vine-boai. Ma aiai da ana lawana i verenei; Tau ma Riwana Aiaina aubaina. Tauna ana lawana ina vaimelei.

³⁶ Ana aii bo anona aiwai, mepa da wei dobuna lawanana ma vigu-launa ma vaipai ma am lawana maemae-nonoana ma vine-boai.

³⁷ Wate aiwaiei am lawana ma gimara-melei.

³⁸ Mepa da aiai: tau ma au viararamana ina vinimalei; ma i mae-puputeu; ma ana ġoanei kaua apoapoe ina kaukauei. Rava Natuna, tauna ina vinimalei maranaina ina nememei; Amana ana au boruma anela vivivirei maiteni."

9

¹ Ma Iesu, wenanare i riwei, "Taumi a ririwana-kauemi; rava ġelaumi weka o maimairi amapo eḡa ona iraḡe da God ana vigulau ona inanai ana rewapanana ina nei."

Iesu inanana i virai

(Matthew 17:1-13; Luke 9:28-36)

² Au pom six muriai, Iesu, Peter, James ma John i taravaini. Ma taui ava i ġae ola ġaēgaena au tepana. Ma kampa taui au matai, Iesu inanana i virai.

³ Ana gara i arapoira ma gamrina i vimata-kamokamota; eḡa me aiwai ġelauna au dobu nanare.

⁴ Ma kampa au matai, Elijah ma Moses i eḡa. Ma Iesu maiteni i bababani.

⁵ Ma Peter Iesu i riwei, "Tauviararamana, i aii da tauta weka. Ma vianinelai da numakweta tonuġa ana voai: tagogi tam aubaim, ġelauna Moses ma ġelauna Elijah aubaina!"

⁶ Ma taui i rovo kaua ma Peter eḡa ita aramanei da aiwai i latolatoni.

⁷ ⁸*Anina ma apau i eḡa ma taui i purui. Ma pona apauei i opu ma i riwa i pa, "Wei Tau Natu au nuavainana, ona rautaniġaneil!"

⁸ Maratagogi taui i 'nana viravira ma eḡa aiai ġelauna ita inanai ma Iesu, tauna ava.

⁹ Ma maranai olei i ġaiġairai ma Iesu, taui i viġaei da aiwai i 'nananaia eḡa ina vieġai da au naona Rava Natuna iraġelei ina vomairi me.

¹⁰ Ma taui, wei riwana i voteletelei ma i babani vivira i pa, "Iraġelei vomairi me anona aiwai?"

¹¹ Ma taui, i vitara-virevirei i pa, "Aiwai aubaina, tarawatu babadai e ririwa da Elijah au naona ina nei?"*

[†] **8:34:** Wei lamna awanaina. Anona lamna Iesu ana tauvotaḡotaḡo anina vinimala ma apoapoei ina nelāġai aubaina taui, tauna i votaḡotaḡoi. Tauna eḡa ita ririwa da ana tauvotaḡotaḡo au korosi ina iraġe me tauna. ^{*} **9:7:** Mrk 1:11 ^{*} **9:11:** Mai Jew i vitumaġana da Elijah au naona ina nememei ma Keriso muriai ita nei. (Mal 3:1, 4:5-6). Ma taui eḡa ita notai da Elijah rau-iviapoapoe ina nelāġai ana au nememei.

¹² Iesu i paribelei, “Riwa kaua Elijah au naona ina nei da aiwai anatapuna ina vokaukauei. Aubaina wariāga i girumi da Rava Natuna ina viruapoapoe kaua ma ina inana-geduaiei.

¹³ Wate a ririwana-kauemi da Elijah anina i nei ma rava, ai ġoanei tauna i rau-iviapoapoelei me i girugirumia nanare.”[†]

*Iesu, arua-apoapoena tevera orotona awarina i viopuni
(Matthew 17:14-21; Luke 9:37-43a)*

¹⁴ Iesu ana tauvotāgo tonūga maiteni olei i ġaira memei ai rava awari ma patara ġaġaena, taui i gariġuruvi. Ma Jew ai tarawatu babadai, taui maiteni i vivitarapiri.

¹⁵ Maranai patara, Iesu i 'nanai. Taui orai i auepai ma awarina i ruba ma i viegualaei.

¹⁶ Iesu, taui i vitara-virevirei, “Aiwai o vitarapiriei?”

¹⁷ Orot tagogi patara au poui i paribelana, “Tauviararamana, arua-apoapoena natu orotona au orana e mamae ma i kaei da eġa ita bababani, lamna aubaina a neiae awarim.

¹⁸ Maranai ana doria e ururu-melei, lamna arua-apoapoena: tauna au doa e tawatawanei; gamona e vivipropuro; ivona e utauta ġiriġiriei; ma inina e badobado. Am tauvotāgo a vibaġai da arua-apoapoena ita viopuni, wate eġa tagotagogina da ita kaei.”

¹⁹ Ma Iesu i paribelei, “Oo mara aiwai ona vitumaġana! Ta mae ġaġa ma ami vita ana 'vara ġaġalei? Tevera awariu ona neial!”

²⁰ Ma tevera i neiae Iesu awarina. Ma maranai arua-apoapoena, Iesu i 'nanai, maratagogi tevera i viaikwajiana-guratei da au doa i tonei ma i vitatauvira ma i vivipropuro.

²¹ Iesu, tevera amana i vitara-virevirei, “Wei teverana ana doria mara aiwai i vikarei?”

I paribelei i pa, “Maranai aburunai.

²² Arua-apoapoena mara au anatapuna, tauna ai au araratana ma au waira e tawatawanei ma i ġoei da ita viraġeni. Mepa da tam tagotagogina; ma raunu'apoapoelelai ma ma voaguiāl!”

²³ Iesu, tauna i riwei, “Menanare da u riwa, ‘Mepa da tam tagotagogina?’ Aiai ravana e vivitumaġana, God anatapuna ina kaei tauna aubaina.”

²⁴ Maratagogi tevera amana i garara, “A vitumaġana, wate au tumaġana eġa ita rata ma ma voagui da ina rata!”

²⁵ Iesu i 'nana da patara i rierieiae awarii ma lamna aubaina arua-apoapoena i egari i pa, “Tam arua taniġa-potapotana ma gumgum. Tau a egaegarim da tevera ma opu-tawanei. Ma eġa melanai au orana ma rui me!”

²⁶ Ma arua i garara ma tevera i viaikwajiana-guratei ma i opu-tawanei. Ma tevera inanana me taubeu. Ma rava maġamaġaui kampa i riwa, “Tauna i'rāġe!”

²⁷ Ma Iesu, tauna urana i vojjini ma i sinaepai da i mairi.

²⁸ Muriai Iesu, ana tauvotāgo maiteni i rui au numa. Ma maranai taui ava ma i paridadanei i pa, “Aiwai aubaina tauai eġa tagotagogina da arua-apoapoena ata viopuni?”

²⁹ Iesu, i riwa, “Arua-apoapoei me wenanare, pari ainelana ina viopuni.”

[†] **9:13:** Iesu lamna John Taubabataito i bababaniei da tauna Elijah (Mat 11:13-14, 17:10-13)

*Iesu ana iraġe i babaniana-melei
(Matthew 17:22-23; Luke 9:43b-45)*

³⁰ Iesu, ana tauvotaġo maiteni dobuna i netawanei ma Galili i verautuini. Iesu eġa ita ġoei da rava ita aramanei da taui mepa.

³¹ Aubaina tauna, ana tauvotaġo i viaramani i pa, “Taui Rava Natuna ina amverenei rava ġelaui au urai. Ma taui ina virāgeni. Wate au pom tonuġa au murina ina vomairi me.”

³² Wate taui eġa ita aramanei tauna aiwai i bababaniei. Ma paridadanana i rovoei.

*Tauvotaġo i vitarapiri vivira da aiai i ġetelara
(Matthew 18:1-5; Luke 9:46-48)*

³³ Iesu ana tauvotaġo maiteni i ġeta au Capeniam ma au numa i rui. Ma Iesu, taui i vitara-virevirei, “Au etanai aiwai o vitarapiriei?”

³⁴ Wate taui i genuana, aubaina au etanai taui i vitarapiri vivira da aiai i ġetelara.

³⁵ [†]Iesu i kiala ma Apasol 12 i raukwatuei awarina ma i riwei i pa, “Aiai e ġoegħoe da ina vibada. Tauna ina tereġairana-melei ma ina vimuri de-wadewa ma ina vitaunola rava aubai.”

³⁶ Ma Iesu, tevera i vaia ma au poui i vimairini. Ma urana au jiġona i teret-ġonei. Ma taui i riwei i pa,

³⁷ “Aiai ravana; tau wawaei, tevera wenanare i rauġorei. Lamna tau maiteni e raraugħoreiu. Ma aiai da tau e raraugħoreiu. Lamna tauparitawa-neu maiteni e raraugħorei.”

*Aiai eġa ata ġavia, lamna turata
(Luke 9:49-50)*

³⁸ Anina ma John, Iesu i riwei, “Tauviararamana! Tauai, oroto tagogi a inanai; tam wavamei arua-apoapoena i viviopuni ma tauna eġa turata. Lamna aubaina a viġaei da eġa ina kauana-melei.”

³⁹ Iesu i riwa, “Eġa ona viġaei! Eġa aiai au wavau kaua babai ina kau ei ma muriae ina parivai-apoapoenu.

⁴⁰ Aiai ravana eġa ata ġavia; lamna turata.

⁴¹ Tau a ririwana-kauemi. Mepa da aiai ravana, waira i veremi tau au wavau; aubaina taumi au Tauvotaġo. Taui ai maia eġa ina vine-boai.”

*Raelara babanina
(Matthew 18:6-9; Luke 17:1-2)*

⁴² Aiai ravana i kau ei da wei teverana ana tumaġħana Tau awariu i viapoapoeni da ġo'apoapoe i kau ei. Lamna i ai da ġaima ġaēgaena ravana au uatabana ina duri ma au boga ina tawanei aubaina God, tauna ina kovoġa-guritei. ⁴³⁻⁴⁴ Mepa da nimam i kauem da ġo'apoapoe u kau ei. Ma bori-tawanei! I aii da nimam tagogiava ma lawana mamae-nonoana ma vaia. Ma eġa ma kau ei da nimam ruāga aiai i ma nae ai au menamenana; mepa ai eġa melanai ita bobo.[‡]

⁴⁵⁻⁴⁶ Mepa da aem i kauem da ġo'apoapoena u kau ei. Ma bori-tawanei! I aii da sigesigem au lawana mamae-nonoana ma rui. Eġa me aem ruāga aiai i ma ai au menamenana ina tawanem. §

^{◊ 9:35:} Mrk 10:43-44 ^{‡ 9:43-44:} Wariaġa nimaiei i giruma damanei taui riwana tagogina me vs 48. ^{§ 9:45-46:} Wariaġa nimaiei i giruma damanei taui riwana tagogina me vs 48.

⁴⁷ Ma mepa da matam ina kauem da ġo'apoapoena u kaeui. Ma vaitawanei! I aii da matam tagogi ma God ana vigulau ma rui. Eġa me matam ruāga ma ai au menamenana ina tawanem;

⁴⁸ dobuna motamotana eġa ita irairāge ma ai eġa ita bobo.

⁴⁹ Au Tauvotaġotaġo anataputapui, ai araratanei ina bogai.

⁵⁰ “Nia i ai lam viaiainana aubaina. Ma mepa da i tomatoma, mena ma vidaganei. Nia au orami ina mae ma ona viturana vivira!”

10

Iesu, tavine vilamonana i babaniei

¹ Ma Iesu, dobuna i netawanei ma i nae Judea ana paratana. Ma Waira Jordan i damani da au baba ġelauna. Patara ġaegħena i riana-melei. Ma Iesu i viararamana, me mara patapatana i kaukuei nanare.

² Ma Pharisi ġelaui i ġoei da tauna ita waroi. Ma lamna aubaina i vitara-vireirei, “Tarawatu e mamae bo eġa da rava, awana maiteni ita vilamonei?”

³ Ma Iesu i paribelei, “Moses ana Tarawatu aiwai e ririwei?”

⁴ Ma taui i riwa, “Moses ana Tarawatu e ririwa da oroto *vilamona pepana ina girumi ma awana ina verei. Ma taui ina vilamonei.*”

⁵ Iesu i paribelei, “Taumi orami i bada. Au baina Moses wei Tarawatuna i terei.

⁶ [◊]Wate ona notai da au karena, maranai God rava i kauei *ma tauna oroto ma wavine i kauel.*

⁷ [◊]Ma lamna aubaina oroto amana ma alona ina netawanei

⁸ *ma awana maiteni ina vitagogi* da taui eġa ruāga me au naona ma tupua tagogi.

⁹ God aiwai i vitagogie, eġa aiai ina vilamonei.”

¹⁰ Maranai taui i naeme au numa, ma tauvotaġotaġo, Iesu i vitara-vireirei wei kauai aubai.

¹¹ Iesu i paribelei, “Mepa da oroto, awana i voterei. Ma wavine ġelauna i ravaġi. Lamna tauna, awana awarina i rauviapoapoe.

¹² Ma nanarena mepa da wavine, awana i voterei ma oroto ġelauna i ravaġi. Lamna awana, awarina i rauviapoapoe.”

Iesu, roaroa i viaiaini

¹³ Rava ġelaui, roaroa i neiai Iesu awarina da urana au tepai ita terei. Ma ana tauvotaġotaġo, ravai i viġiae.

¹⁴ Maranai Iesu wei kauai i 'nanai. Ma ana tauvotaġotaġo i eni ma i riwa, “Roaroa ona voterei da awariu ina nei. Ma eġa ona viġiae. Au baina God ana vigulau, lamna rava wenanare aubai me wei roaroai.

¹⁵ A ririwana-kauemi. Aiai, God ana vigulau eġa ina vaia me tevera aburuna nanare. Tauna, eġa God ana au vigulau ina rui.”

¹⁶ Ma roaroa i taravaini ma i rapai, urana au tepai i terei, i raupari ma i viaiaini.

Purapura ravana

(Matthew 19:16-30; Luke 18:18-30)

¹⁷ Ma maranai Iesu i vomairi da i nene. Oroto i ruba ġeta ma au naona i raudune ma i riwa i pa, “Taugiu vinualaulaunam. Aiwai ana kauel da lawana maemae-nonoana ana vibuderiei?”

¹⁸ Ma Iesu i paribelei i pa, “Aiwai aubaina, tau u vikaua vinualaulaune? God, tauna ava vinualaulaunana.

[◊] **10:6:** Gen 1:27 [◊] **10:7:** Gen 2:24

¹⁹ *Tam, God ana Tarawatu u aramanei, *Eğā ma virāgena!* *Eğā ma awadanene!* *Eğā ma danene!* *Eğā ma viwavu-moru!* *Eğā ma amkwalakwala!* *Amam ma Alom ma vivireil!*"

²⁰ Ma tauna i riwei, "Taugiu! Maranai tau aburueu da amadodo, wei tarawatui anatapui a voteletelei."

²¹ Iesu, tauna i 'nanai ma i vinuavainei ma i riwei, "Kaua tagogi e mamae ega uta kaukauei. Ma nae ma am purapura anatapuna ma gimarei. Ma manena, rava molamolakai ma verei. Ma au mara God, tam ina vimaiem. Ma ma nei ma ma votaḡotaḡoi!"

²² Ma maranai oroto wei riwana i nonori. Naona i peu ma ana nu-abolana i nae; aubaina tauna, purapura ravana.

²³ Iesu i 'nana viravira ma ana tauvotaḡotaḡo awari i riwa, "I piripiri kaua da purapura ravana, God ana au vigulau ina rui."

²⁴ Tauvotaḡotaḡo riwana i baiei maranai Iesu wenanare i babani. Ma Iesu i riwa me, "Natunatu! I piripiri kaua da purapura ravana,* God ana au vigulau ina rui.

²⁵ I telatela kaua da ġamoġamo ġaeġaena wavana kamel, īgoma au gavogavona ina rui. Ma i piripiri guratana da purapura ravana, ana lawana God ina verei. Ma God, tauna ina vibadei."

²⁶ Taui i vinuanaina ma ai nota i kwa. Ma taui ava i babani vivira i pa, "Mepa da nanare; amapo aiai lawana mamae-nonoana ina vaia?"†

²⁷ Iesu awarii i 'nana ma i riwei, "Rava awarii wei kauai i piripiri. Wate ega God awarina. God awarina aiwai anatapuna i telatela kaua."

²⁸ Ma Peter i riwei, "Ma tauai menanare? Tauai ai purapura a voterei ma tam a votaḡoim."‡

²⁹ Iesu i paribelana, "A ririwana-kauemi. Aiai da ana numa bo vare-vareina bo novunovuna bo alona bo amana bo natunatuna bo ana wapu ina voterei ma tau ina votaḡotaḡoi; tau ma Riwana Aiaina aubaina.

³⁰ Tauna ana maia ina rata kaua wei au dobuna. Tauna ana maia ina viaitepepani da ana numa, varevareina, novunovuna, alona, natunatuna ma ana wapu, anatapui ina maġa. Rava ina rau-iviapoapoelem; aubaina tam, tau au Tauvotaḡotaḡo da mara au murina tauna lawana mamae-nonoana ina vaia.

³¹ Wate maġamaġaui marina e vivinao; taui ina vimuri. Ma maġamaġaui da e vivimuri; ina vinao."

*Iesu ana iraġe babanina i vitonui
(Matthew 20:17-19; Luke 18:31-33)*

³² Iesu, ana tauvotaḡotaḡo maiteni i ġegħae au Jerusalem. Iesu, taui au naoi i nena. Tauvotaḡotaḡo i baiei. Ma rava ġelaui au muri i nenei i rovo kaua.§ Ma taui 12 i rauġorei au ririva ma i raukarei da kaua amapo da awarina ina tupua; taui i vieġei

* **10:19:** Exo 20:13; Exo 20:14; Exo 20:15; Exo 20:16; Exo 20:12 * **10:24:** Wei riwana buka ġelaui awarii e mamae ma ġelaui ega *purapura ravana*. † **10:26:** Mai Jew i notai da rava vipurapurai lamna BADA ana verena ana nuavaina matairana, taui e notai da BADA, rava vipurapurai ega ina gagaloei, tauna ravai ġelaui maiteni ega ina gagaloei. ‡ **10:28:** Peter i ġoie da ita aramanei da tauvotaḡotaḡo ai au iraġe maiana aiwai, ina vaia. § **10:32:** *Iesu i ġegħae au Jerusalem* ma rava maġamaġaui i viġavie i ma lamna aubaina ana tauvotaḡotaḡo i baiei da tauna tepana i tora da weka i nena. Rava ġelaui i votaḡotaḡo, taui i rovo kaua da aiwai awarina ina tupua maranai i ġeta au Jerusalem.

33 I pa, “Ona inana, tauta ta ġegħae au Jerusalem. Ma Rava Natuna ina verenei pirisi babadai; ma tarawatu babadai awarii. Ma taui ana iraġe ina vianinei. Ma Mai Jentail ina verei.

34 Ma tauna ina vijibogħi ma ina ovai ma ina kwapui ma ina viraġeni. Au pom vitonuina ina vomairi me.”

James ma John ai vibagħa

(Matthew 20:20-28)

35 - Zebedi natunatuna James ma John i nei Iesu awarina ma i vibagħai i pa, “Tauviararamana! Tauai ai ġoana a vivibagħei uta kauei.”

36 Iesu i riwa i pa, “Aiwai o ġoegħoi ana kauei aubaimi?”

37 Taui i paribelana, “Ma verelai da ana kiala, tagogi au oiem ma ġelauna au kelakelaum am au vigulau.”

38 Iesu i paribelei, “Taumi eġa ota aramanei aiwai o vivibagħei! Iniviara kelakana ana umai. Taumi tagotagogina da ona umai bo? Tagotagogina ona babataito me tau ina babataitoi?*”

39 I paribelei, “Tauai tagotagogina!”

Iesu i riwei, “Iniviara kelakana anina ona umai ma ona iraġe me tau ana iraġe.

40 Wate tau au rewapani eġa ita mamae da ana veremi da mepa ona kiala au oieu bo au kelakelau. God, rava i vinevine; taui ai gabu i vokaukauei.”

41 Maranai Tauvotaġo 10 ġelaui, wei riwana i nonori. Taui James ma John awarii i ġaiawa.

42 Ma Iesu, taui anatapui i ġorei da awarina ma i riwei, “O aramanei da jentail ai babada, dobu ġela ravai jentail awarii e mamae-ġaegħae ma e rarau-ivjapoapoele. Wate taui ai babada ġaegħaei, ai rewapani i ġetelera da ai rava e vibadebadei da ai ġoana e kaukauei.

43 ♦Wate au tauvotaġo eġa nanare. Eġa da aiai i ġoei da ina ġetelera taumi au poumi; tauna anina da ina vitaunola.

44 Aiai i ġoei da ita vinao. Tauna ina vitaunola rava anatapui aubai.

45 Ma nanare Rava Natuna eġa ita nei da tauna, tana nolei. Wate ita vitaunola rava aubai. Ma ana lawana ita verenei da rava maġgamaġħau ai lawana ita gimara-melei.”†

Iesu, rava mata-potapotana Batimeus i vilawani

(Luke 18:35-43)

46 Ma taui i ġeta au Jeriko. Iesu, ana tauvotaġo, patara ġaegħena maiteni dobuna i opuopu-tawanei. Ma oroto mata-potapotana, wawana Batimeias, Timaeus natuna au etanai i kiakiala ma i viamgħimana.

47 Maranai i nonori da tauna, Iesu Nasaretei; garara i raukarei i pa, “Iesu, tam David natuna! Ma raunu’apoapoeleu!”‡

48 Rava maġgamaġħau, tauna i rai ma i riwei da ita genuana. Wate tauna, garara i voguratei, “David Natuna! Ma raunu’apoapoeleu!”

49 Iesu i tumairi ma i pa, “Ona ġoreiħai!”

* **10:38:** ...babataito me tau ina babataitoi taui iniviara ma iraġe e babbanie, maranai Iesu au Gethsemani i raraupari muriai da ana iraġe tauna ana nuabola kelaka i babanie (Mrk 14:36). Iesu, James ma John i riwei da nuabola ina nelāġi. ♦ **10:43:** Mrk 9:35 † **10:45:** Iesu i vinuapoapoe ma iraġe aubaita me Isaiah i girugirumia nanare au Isa 52:13-53:12. ‡ **10:47:** Maranai oroto mata-potapotana Iesu i kwatuei David natuna ma mai Jew i aramanei Keriso - BADA ana vinevine i babanie. Mai Jew i aramanei da Keriso ai wavalatona me David wariaġa nanare. Ma i nei da rava doridoria ita vilawani me. (Sal 89:3-37 Isa 29:18-19 & 35:5-6 Jer 23:5-6 Ezk 34:23-24)

Anina taui, mata-potapotana i ġoreiai i pa, "Tepam ina tora ma ma vomairi! E ġoreġorem!"

⁵⁰ Tauna, ana puru i tawanei ma i vomairi laġilaġina ma i nei Iesu awarina.

⁵¹ Iesu i paridadana i pa, "Aiwai u ġoei ana kauei aubaim?"

Mata-potapotana i paribelei, "Tauviararamana! A ġoei da ana inana me."

⁵² Iesu i riwa, "Ma nae! Am tumaġana i vilawanim." Maratagogi tauna i 'nana me ma Iesu au eta i votaġotaġoi.

11

Iesu i rui au Jerusalem

(Matthew 21:1-11; Luke 19:28-40; John 12:12-19)

¹ Ma maranai Jerusalem i tuġereġerei ma i rui au Betphagi ma Bethani* au ola Olives. Ma ana tauvotaġotaġo ruāga i paritawanei,

² ma i riwei i pa, "Ona nae au melagai au naomi. Maranai o ruirui, kampa donki natuna ġaubo, raġiraġitana ona nelaġai. Tauna eġa aiai ita gerudanei. Ona rupeni ma ona neiae.†

³ Mepa da aiai ina paridadana, 'Aiwai aubaina wei o kaukauei?' Ona riwei, 'BADA e ġoēgoe i ma maratagogi ina paritawana-melei.'

⁴ Ma i nae ma donki ġaubona au doa au metaeta raġiraġitana i rupeni.

⁵ Rava ġelaui kampa i maimairi i paridadana i pa, "Aiwai o kaukauei donki ġaubona o ruperupeni?"

⁶ Ma i paribelei me Iesu i ririweia nanare ma taui i voterei da i nae.

⁷ Taui donki i neiae Iesu awarina ma ai puru au uporana i tawana-epai ma au tepana Iesu i kiala.

⁸ Ma rava maġamaġaui, ai puru au eta i ebani ma ġelaui, ai rugurugu i taratarraja i ebani.

⁹ Taui i vivinā ma taui au muri i nenei i garara:

"Hosanna!"‡

"Viviaiainana tauna BADA au wavana e nenei!"

¹⁰ "Viviaiainana amata David ana vigulau e nenei!"

"Hosanna au aidamo telarana!"

¹¹ Iesu i ġeta au Jerusalem ma i rui au Tempol ma anatapuna i tuvirevirei ma au i biga aubaina, i opu me au Bethani, taui 12 maiteni.

Iesu, damala aina i parivai-irairaġeni

(Matthew 21:18-19)

¹² Ma marana i tom, taui Bethani i opu-tawanei ma Iesu am-iraġe.

¹³ Au weia ma damala aina i 'nanai ana ruguruguna. Ma i nae da ita inanai da i ua bo eġa. Maranai kampa i ġeta, eġa aiwai ita nelaġai. Anina ai ruguruguna ava, aubaina eġa damala ana mara.

¹⁴ Iesu, damala aina i riwei i pa, "Eġa aiai amadodo ma amapo anom ina am-melei!" Ma ana tauvotaġotaġo i nonori aiwai i latoni.

Iesu, taugimara tempolei i viaġaġana-opunei

(Matthew 21:12-17; Luke 19:45-48; John 2:13-22)

* **11:1:** Eng. *Bethphage & Bethani*. † **11:2:** Mai Jew awari, donki lamna nola aubaina ma eġa gulau ana anigeru. Donki i gerui lamna e ririweta da tauna gulau ana nuaubana ma vilamolamona i nei. ‡ **11:9:** Lamna pona Aram anona ma vilawaniai ma muriae lamna viegualau ma vimea-ġaegaena aubaina.

15 Maranai tau i ġeta au Jerusalem, Iesu i rui Tempol garina au orana ma taugimara i viaġāgana-opunei, mane tauviraina§ ai kepakepa ma gabubu taugimareina ai anikiala i vitauvirai.

16 Ma i viġaei da eġa aiai ana gimara Tempol au orana ita avarai-naiei.

17 *Ma rava i viararamani i pa, "I girugirumia nanare,

'Au numa ina ġorei pari numana
dam anatapui au dobu aubai.'

Wate taumi o vovirai da kwalakwalai ai guba."*

18 Pirisi Babadai ma tarawatu Babadai i nonori ma i ogei da ita virāgeni. Taui, Iesu i rovoei aubaina patara ana viararamana i baiei.

19 Ma au bigai Iesu ana rava, Jerusalem i opu-tawanei.

Damala aina i poi

(Matthew 21:20-22)

20 Ma ubaubanai tau i nena ma damala aina i 'nanai anatapuna i poi.

21 Peter i notai ma i riwa "Tauviararamana ma inana! Damala aina u parivai-irairaġenia i poi."

22 Iesu i paribelei, "God ona vitumaġaneil"

23 A ririwana-kauemi. Rava wei olana ita riwei, 'Ma vomairi ma au boga ma tawanem!' Ma nuanuana eġa ina raġaraġa ma ina vitumaġana da aiwai e ririweia, ina tupua.

24 Lamna aubaina a ririwemi. Aiwai ami au pari o vibagħi, ona vitumaġana da taumi boibogħi o vaia ma ina viġarimie.

25 Ma maranai e raraupari, au naona rava anatapui ai ġo'apoapoe awarim ma nota-tawanei. Ma nanare amam au mara am ġo'apoapoe ina nota-tawanei."†

Jew babadai, Iesu ana vibadana i vitarapiriei

(Matthew 21:23-27; Luke 20:1-8)

27 Taui i nememei au Jerusalem ma Tempol au orana i bababara. Ma Pirisi Babadai, Tarawatu Babadai ma dogadogara i nei Iesu awarina.

28 Ma i paridadanei i pa, "Aiwai vibadanei wei kauai e kaukauei? Aiai vibadana i verem da wei kauai uta kauel?"

29 Iesu i paribelei i pa, "Au vitaraviravira tagogi ana terei ma ona paribebru. Ma ana riwemi; aiwai vibadanei wei kauai a kaukauei."

30 Aiai, John taubabataito vibadana i verei da rava ita babataitoi, God bo rava? Ona riweul!"

31 Taui i vitarapiri vivira, "Mepa da tana riwa, 'Godei.' Tauna ina riwa, 'Ma aiwai aubaina eġa ota vitumaġanei?'

32 Wate eġa tana riwa da, 'Ravei.' Taui rava i rovoei, aubaina rava anatapui, ai nota da John anina peroveta.

33 Ma i paribelei, "Tauai eġa ata aramanei." Iesu i riwa, "Tau nanare eġa ana riwemi aiwai vibadanei wei kauai a kaukauei."

§ 11:15: Mai Jew ai au nota da mai Rome ma mai Greek aruaj mane au tepana i terei, wei mai Jew awari lamna god morumoruna. Mane tauviraina au Tempol mane dobu ġelaui i virai da Tempol mane wei lamna Jew tarawatu i vianinei gimara au Tempol aubaina (Exo 30.13). * 11:17: Isa 56:7 * 11:17: Iesu dobuġela manena tauviraina ma gimara ravai i viwavui da taui pari numana i vovirai da amkwalakwalai ai guba, taui rava ai arua nolana e viviapoapeni Jer 7:11-15. † 11:25: Riwa wadubo nonoana uraie i girugirumia vs 26 weka eġa ita mamae, Mepa da rava ai apoapoei eġa ma nota-tawanei, amam au mara nanare am apoapoei eġa ina nota-tawanei.

12

Tauipi ai awanaina

(Matthew 21:33-46; Luke 20:9-19)

¹ *Iesu i vikarei ma awanainei awari i babani i pa, “Mara tagogi oroto, ana wapu i kaei ma grape i paewi* ma i gari ma grape anigudana ma viola^ga numana i voai. Ma tauipi ġelaui i verei da ita nolei taui anatapui aubai. Ma i va^gai au dobu ġela.

² Tuaruta ana mara i ġetai ma taniwaga, ana taunola i paritawanei tauipi awarii da ana ġuta ita vaia.

³ Wate tauipi, tauna i vojjini ma i kwapui ma kwakwavina i paritawanei.

⁴ Ma taniwaga, taunola ġelauna i paritawanei. Ma taui, kolana i viaibauni ma i vitepaubaubai.

⁵ Ma taunola ġelauna i paritawanei ma tauna i viraġeni ma i maġa ġelaui i paritawanei, ġelaui i kwapui ma ġelaui i viraġeni.

⁶ Ma tagogi ava e mamae da ina paritawanei. Lamna natuna orotona tagotago ana nuavainana. Ma tauna au murioina i paritawanei ma i pa, ‘Taui, natu ina vivrei.’

⁷ Wate taui, tauna i ’nanai ma i riwa vivira i pa, ‘Wei taniwaga natuna. Ona nei, tana viraġeni ma ana buderi ina viġaritaiei!’

⁸ Ma i vunui ma i viraġeni ma tupuana wapuei i tawanana-opunei.

⁹ —Wapu taniwagana marina aiwai ina kaei taui awarii? Tauna ina nei ma tauipi ina viraġeni ma grape wapuna ina veredamanei tauipi ġelaui awari.

¹⁰ Wei girumana o iavi bo eġa?

*Wei ġaimana, tauvoa i geduaiei,
wate muriai i nelāgai da tauna ġaima kaua.*

¹¹ *Wei lamna, BADA ana kaua
ma inanana i vinualaulauna.*

(Psalm 118:22-23)

¹² Jew babadai i aramanei da awanaina lamna taui i bababaniei ma i ġoei da ita pani. Wate taui patara i rovoei, lamna aubaina Iesu i voterei ma i nae.

Caesar awarina tax tana terei bo eġa?

(Matthew 22:15-22; Luke 20:20-26)

¹³ Ma Pharisi ġelaui ma Herod ana rava ġelaui i nae Iesu awarina da riwei ita waroi.

¹⁴ Taui i nei ma i riwa, “Tauviararamana, tauai aramanei da tam rava ji-jimanim. Ma rava wavai naenaei ma rava labalababa eġa uta vibainaenaei ma anatapui e vaivaia da tagogi. Wate tam God ana babani riwa kaei e viararamani. Ma riwelai tax tana terei Rome gulauna wavana Caesar* awarina, i aii bo eġa?”

¹⁵ Wate Iesu, ai moru i ’nana-bauni ma i riwei, “Aiwai aubaina o raudadaniu? Mani tagogi ona neiai da ana inanai!”

¹⁶ Denarius tagogi i neiai Iesu awarina ma taui i vitara-virevirei, “Wei aiai aruana ma wavana?”

I paribelei, “Caesar.”

¹⁷ Iesu i riwa, “Aiwai Caesar ġarinei, Caesar ona verei. Ma aiwai God ġarinei, God ona verei!” Ma taui i baiei.

* **12:1:** Isa 5:1-2 * **12:1:** Parivainota wadubona, God au anatapuna Israel e bababaniei me tauna ana grape wapuna, me Isa 5:1-2. † **12:14:** Sisa.

*Sadusi ġelaui, Iesu i vitara-virevirei irairaġelei vomairina aubaina
(Matthew 22:23-33; Luke 20:27-40)*

¹⁸ *Mai Sadusi ai vitumaġana da rava eġa ita vovomairi-me maranai e irairaġe.‡ Anina ma ġelaui i nei Iesu awarina ma i paridadanei,

¹⁹ “Tauviararamana! God ana tarawatu, Moses wenanare i girumi: Mepa da oroto i’raġe ma kaiababana i netawanei ma eġa natunatui. OROTO vareina kaiababana ina ravaġi ma roaroa ina ġuni vareina aubaina.

²⁰ Mara tagogi varevarei seven i mae. Ma natuevou i tavine ma eġa natunatuna ma oroto i’raġe.

²¹ Vareina viruaina kaiababa i ravaġi ma tauna maiteni eġa natuna ma i’raġe. Ma nanare vareina vitonuina.

²² Ma nanare anatapui seven, wavinena i ravaġi ma eġa natunatui. Au muriai wavine i’raġe.

²³ Anatapui seven, wavinena i ravaġi. Vomairi me au marana, lamna aiai awana?”

²⁴ Iesu, taui i riwei, “Aiwai Moses i girumi ma God ana rewapani eġa ota aramanei.

²⁵ Maranai taui iraġelei ina vomairi, taui eġa ina tavine bo ina vitavinei. Wate ina mae me anela au mara,

²⁶ *Ma rava iraġelei ai vomairi babanina, Moses ana tarawatu eġa ota iavi bo? Mepa aii ararat lana, kampa God Moses i riwei: *Tau Abraham ana God ma Isaac ana God ma Jacob ana God.*

²⁷ Tauna eġa rava irairaġei ai God, wate rava lawalawai ai God. Taumi o moru kaua!§

*Tarawatu ġeġetelarana
(Matthew 22:34-40; Luke 10:25-28)*

²⁸ Ma tarawatu badana tagogi i nae ma ai vitarapiri i nonori. Ma i nonori da Iesu i babani kaua, lamna aubaina tauna i vitara-viravira, “God ana tarawatu metauna i ġetelara?”

²⁹ *Iesu i paribelei, “Geġetelarana tagogi lamna wei: *Ona rautaniġana Israel! BADA ata God, tauna ava BADA.*

³⁰ BADA ami God nuantuami ina vaia orami anatapunei ma aruami anatapunei ma ami nota anatapunei ma ami rewapani anatapunei!

³¹ *Ma viruaina lamna wei: *Rava ġelaui nuantuam ina vaia me tam nuantuam e vaivai-melei!* Wei tarawatui ruāġa i ġetelara, eġa me ġelaui nanare.”

³² Tarawatu badana i riwa, “Tauviararamana u babani kaua! Riwa kaua u babaniei, BADA *Tauna ava God ma eġa mepa ġelauna.*

³³ Ma nuantuami ina vaia orami anatapunei ma ami nota anatapunei ma ami rewapani anatapunei. Ma, *Rava turam nuantuam ina vaia me tam nuantuam e vaivai-melei.* Wei tarawatui ruāġa lamna i ġetelera, eġa me pulo apuapunana bo pulo ġelaui.”

³⁴ Iesu i’nanai da tauna i paribelana kaua ma i riwei, “Tam, God ana vigulau au ġereġerena e ġeġeta.” Ma eġa aiai tepana ita tora da Iesu ita vitara-viravirana-melei.

* **12:18:** Act 23:8 ‡ **12:18:** *Sadusi* taui gulagulau ma rava ġaegħaei mai Jew ai giu babadai taui maiteni eġa ita vitumaġana da *anel* bo arua ġelaui e mamae ma buka 5 i vinao, Moses i girugirumia, taui lamna ava e vivitumaġanei (Karena, Exodus, Leviticus, Numbers, Deuteronomy). Ma eġa buka ġelaui. Wate Moses ma BADA riwaiei taui i viatataiei da lawana e mamae iraġe au murina. * **12:26:** Exo 3:6 § **12:27:** ...wate rava lawalawai ai God. Mepa da BADA i riwa da tauna Abraham ma Isaac ma Jacob ai God, taui lawalawai maranai BADA, Moses awarina i babani. * **12:29:** Deu 6:4-5 * **12:31:** Lev 19:18

Keriso tauna aiai?

(Matthew 22:41-46; Luke 20:41-44)

³⁵ Maranai Jesu au Tempol i viararamana ma i vitara-viravira i pa, “Aiwai aubaina Tarawatu Babadai e ririwa da Keriso tauna David natuna?

³⁶ ³⁶ Arua Vivivireina, David nota i verei ma tauna i riwa:

‘MAMAE-NONOANA au gulaau i riwei,

*Au oieu ma kiala
da am ġavia*

au ae karem da ma tuvaidoedoei.

(Psalm 110:1)

³⁷ —David, tauoina wei gulauna i ġorei *bada*. Ma menanare da badana lamna, David natuna?” Patara ġaegħena riwana i nonori ma i vinu aiai.

Iesu, Tarawatu Babadai ai kaua i babaniei

(Matthew 23:1-36; Luke 20:45-47)

³⁸ Ma Iesu, taui i viararamani i pa, “Tarawatu babadai ona rovoei. Ai gara manamanai ma e bababara nae au deba da rava taui e vivivirei.

³⁹ Taui anikiala vinevinei pari au numana ma au torela, gabu aiai e vaivaia.

⁴⁰ Taui, kaikaiababa e morumorui ma ai numa e kwalekwalei, e morumoru ma e raraupari-vai-manamanawa. Taui ai kovogħa ina apoapoe guratana.”

Kaiababa ana pulo

(Luke 21:1-4)

⁴¹ Ma Iesu, pulo aniterenana au baba ġelauna i kiala ma rava i ’nananai mane i tereterei. Rava maġamaġaui vivimanei, mane maġamaġaui i terei.

⁴² Wate kaiababa molamolakana i nei ma mane muomuo i ruaġa i terei, ruyana i aburu kaua.

⁴³ Ana tauvotaġo i ġorei ma i riwei, “Anina a ririwemi, wei kaiababa molamolakana i tere-guratei, eġa me taui ġelaui.

⁴⁴ Taui ġelaui ai maurei i verena, wate wei kaiababa molaka ma ġarinei anatapuna i terei, ana anilawana anatapuna.”

13

Iesu i riwa da rava God ana Tempol ina rikai

(Matthew 24:1-2; Luke 21:5-6)

¹ Iesu, Tempol i nene-tawanei ma ana tauvotaġo tagogi i riwa, “Tauviararamana! Numa i viġulau ġaġa ma numa ġaimai i rata ġaġa.”

² Iesu i paribelei, “Wei numai ġaegħaei u inanai, eġa ġaimai tagogi, turana au tepana ina mae. Ĝaima anatapui ina rikai.”

Rava ina vinuapoapoe kaua. Iesu ana tauvotaġo tagogi ina vipatutu

(Matthew 24:3-14; Luke 21:7-19)

³ Iesu i kiakiala au ola *Olives*, Tempol au navanavaġela ma Peter, James, John ma Andrew i nei ma i vitaraviravirana govaġei

⁴ i pa, “Ma riwelai mara aiwai wei kauai ina tupua? Ma aiwai ina vimataira da wei kauai anatapui ina tupua?”

⁵ Iesu, taui i riwei, “Ona inana kaua da eġa aiai ina terevaideġaimi!

⁶ Rava maġamaġaui, wavauei ina nei ma ina riwa, ‘Tau Keriso tauvilawana!’ Ma rava maġamaġaui ina terevaideġai.

⁷ Ma maranai viġavia ona nonori ma viġavia ueia riwana ona nonori; eġa ona rovo! Wei kauai anina da ina tupua, wate wei eġa damona.

8 Dam, damai ina viġavia vivira ma dobu, dobuai ina viġavia vivira. Ma lolo ma gomara dobu au anatapuna. Wei kauai, lamna me wavine ana iniviara e vivikarei maranai e yivinatuna.

9 —Ona inana kaua! Taumi ina panimi ma ina etaremi ma pari numana au orana ina kwapiumi. Ma gavena ma gugulau au naoi ona mairi, aubaina taumi o votaġotaġoju. Ma taui awarii, Riwa Aiainā ona raugugulei.

10 Riwana Aiainā ona raugugulei rava anatapui awari ma muriai damona ina nei.

11 Ma maranai i panimi ma i etaremi. Eġa ona vinuabola da aiwai ona latoni. Aiwai riwana God i veremi, lamna ona latoni. Aiwai o latoni lamna eġa taumi ota babani, wate Arua Vivivireina.

12 Rava, vareina ina verenei da ina virägeni. Ma ama, natunatuna ina verenei da ina virägeni. Ma roaroa, amamai ma aloloi ina viġavie i da ina iraġe.

13 Rava anatapui ina geduiae mi tau aubaiu. Wate aiai da e maimairi-jijina da au damona, tauna ina lawana.”

Iniviara ġaeġaena ana mara

(Matthew 24:15-28; Luke 21:20-24)

14 “Maranai ‘Kaua apoapoe kaukauana’* e maimairi mepa avena ita mairi. (Buka tauiavana wei ina aramanei anona aiwai). Taui aiavoi au Judea ina ruba laġilaġina au ola.

15 Aiai numa au tepana eġa ina ġaira bo ina rui au numa da aiwai ina vaia.

16 Aiai au wapu eġa ina naeme au numa da ana gara ina vaia.

17 Ma iniviara ġaeġaena, waivine duaduamai ma taui da e viviġuġu awari nai au marana!

18 God awarina ona raupari da wei kauai eġa au bodu ina tupua.

19 *Ma nai au marana amapo iniviara ġaeġaena. Ma maranai God dobu i kaei, iniviara ġaeġaena eġa nanare ita tupua ma amapo eġa nanare ina tupua me.

20 Wate BADA nai marana ina vitupoi. Mepa da eġa ina vitupoi, rava anatapui ina iraġe. Wate rava, tauna ana vinevine ina vilawani lamna aubaina mara ina vitupoi.

21-22 —Muriai keriso tauvilawana morumorui ma peroveta morumorui ina nei ma mataira ma kaua babai ina kaei ma ina kauana dadanei da God ana vinevine maiteni ita terevaideġai. Lamna aubaina mepa da aiai ina riwemi, ‘Ma inanai, Tauvilawana noi!’ bo ‘Tauna noi!’ Nai babanina eġa ona vitumaġaneil!

23 Ona inana kaua; anatapuna a riwana-nonoemi!”

Rava Natuna ana nei

(Matthew 24:29-31; Luke 21:25-28)

24 Iesu wenanare i riwa, “Ma iniviara ġaeġaena au murina.

Madeġa eġa ina rarana

ma nawaravi eġa ina lalai.

(Isaiah 13:10)

25 Ma ubona marei ina peu

ma rewapanana ġelau i aidamo ina gui.

(Isaiah 34:4)

26 *—Nai maranaina, *Rava Natuna ana rewapanana ma ana borumana apauei ina nei.*

* **13:14:** Eng. *Abomination of Desolation* Dan 9:27 11:31 & 12:11 ♦ **13:19:** Da 12:1 ♦ **13:26:** Da 7:13

²⁷ Ma Tauna, ana anela ina paritawanei dobu au anatapuna da rava tauna ana vinevine ina tuarui dobu au damona da dobu ġela au damona.”

Damala ana awanaina

(Matthew 24:32-35; Luke 21:29-33)

²⁸ “Damala aina ana awanaina ona aramanei. Maranai ai e numonumoi, lamna ona aramanei da maura e tuturiai.

²⁹ Ma nanare, maranai wei kauai anatapui ina tuputupua, ona aramanei da Rava Natuna i turiai; au metaeta i ġetai.

³⁰ Anina a ririwemi da wei kauai au naona ina tupua ma muriai da rava marina lawalawai ina iraġe.

³¹ Mara ma dobu ina amo. Wate riwau eġa ina amo.”

Bada ainelana ana nei i aramanei

(Matthew 24:36-44)

³² “Ma eġa aiai ita aramanei nai marana bo madeġa aiwai ina nei. Anela au mara eġa ita aramanei ma Natuna eġa ita aramanei. Amana, tauna ava i aramanei.

³³ Ona vineneġana ma matami ina kala!† Eġa ota aramanei mara aiwai, wei kauai ina tupua.

³⁴ Wei me rava ana numa i netawanei ma i vaġai. Ma ana taunola nununai i terei da ita vipaipai ma tagotagogi ava ai nola i verei da ita kaei. Ma tauvineneġana i riwei da ita vineneġana.

³⁵ Ona vineneġana! Eġa ota aramanei mara aiwai, numa taniwigana e nenei; mepa da au bigai bo au nubautuva bo maratomtomai bo ubaubanai.

³⁶ Ma eġa matamatavemi ina nelaġaimi.

³⁷ Aiwai riwana a ririwemi, riwana tagogina rava anatapui a riwei, ona vineneġana!”

14

Jew ai babada, Iesu i ogei da ita virāġeni

(Matthew 26:1-5; Luke 22:1-2; John 11:45-53)

¹ *Au pom ruāga muriai da Raġona ma Palawa Bagibagina torelai,* Pirisi babadai ma Tarawatu Babadai eta i baibaiei da menanare govago-vaġanei Iesu ita vunui.

² Ma i riwa, “Au torela wei kauai eġa tana kaei, mepa da viġaiġaiawa ġaegħena ina tupua.”

Wavine, daji ġabuġabuna Iesu au kolana i waġi

(Matthew 26:6-13; John 12:1-8)

³ Maranai Iesu au Bethani, Simon i ġoreġorei lepeleperana ana au numa i kiala ma i amam. Wavine, wagi wavana alabaster i voai ma i ġeta ma wagi uana i vogai ma daji ġabuġabuna, maiana ġaegħena e ġoreġorei *nard*, Iesu au kolana i waġi.

⁴ Rava ġelaui kampa i mamae i ġaiawa ma i riwa, “Aiwai aubaina daji u vikalokaloei?

⁵ Wei dajina ita gimarei 300 *denarii* † ruvana ma manena molamolakai ita verei.” Ma taui, wavine i vienenei.

† **13:33:** Wedau *Evanelia* i girumi, *ma i raupari*, wate buka wadubo nonoana wei eġa ita mamae, Luk 21:16 kampa ona inanai da e mamae. * **14:1:** Exo 12:1-27 * **14:1:** *Raġona* (*passover*) Exo 12:1 *Palawa eġa yist maiteni* (*Unleavened-Bread*) Exo 12:17 & 23:15 † **14:5:** Wei lamna me taubagibagi ana maia madega tagogia Aubaina.

⁶ Wate Iesu i riwa, “Ona voterei! Aiwai aubaina o vinuabolai? Tauna, kaua aiaina awariu i kauei.

⁷ Molamolakai awarimi e mamae-nonoa ma ona ġoei ma taui ona voagui. Wate tau awarimi ega ata mamae-nonoa.

⁸ Wavine ana nola i kauei. Tauna, dajiei tupuau i vokaukauana-nonoei vikokoaga aubaina.‡

⁹ A ririwana-kauemi, mepa Riwana Aiaina i raugugulei dobu au anatapui, wei wavinena aiwai i kaukauei ina babaniei, ma ega nuanuai ina vuru.”

¹⁰ Judas Iskariotei tauna Apasol tagogi, Pirisi Babadai awari i geta da Iesu ita vibenabenamei.

¹¹ Tau i vinuiai kaua maranai wei i nonori ma Judas i parivainuagani da mane ita verei. Ma Judas i 'nana da mepa gavogavo ita inanai da Iesu ita amverenei.

Iesu ma Apasol, Raġona torelana i ani.

(Matthew 26:17-25; Luke 22:7-14, 21-23; John 13:21-30)

¹² Ma Palawa Bagibagina torelana ina vikarei. Maranai sипуorotoi ġaубои e vunuvunui Raġona torelana aubaina. Tauvotaġotaġo, Iesu i paridadanei, “Mepa u ġoeġoei Raġona torelana ana vokaukuei aubaim?”

¹³ Iesu, taui ruāga i riwei ma i paritawanei, “Ona nae au Jerusalem ma oroto, waira wagina e avavarai ona inanai ma ona votaġotaġoi.

¹⁴ Au numana e ruiruiana, numa taniwigana ona riwei, ‘Ai tauviararamana i riwa, “Numa vokaukauana mepa ma au Tauvotaġotaġo maiteni Raġona torelana ana ani?”

¹⁵ “Ma tauna, numa vatavatara ina viatataiemi i vokaukauana-nonoei ma kampa aubaita ona vokaukaua.”

¹⁶ Tauvotaġotaġo i nae au Jerusalem ma i ririweia nanare i nelāgai ma Raġona torelana i vokaukuei.

¹⁷ Au i biga ma Iesu i nei Apasol maiteni.

¹⁸ Taui au kepareke i amam ma Iesu i riwa, “Anina a ririwemi. Taumi tagogi ina vibenabenameu; tagogi weka maiteni amam.”

¹⁹ Tauvotaġotaġo i vinuabola ma tagotagogi ava i pa, “Ega tau tapa?”

²⁰ Iesu i paribelei, “Taumi tagogi weka palawa e vivigaloj au aboma tau maiteni.

²¹ Wariaġa i girugirumia nanare, Rava Natuna ina iraġe. Wate aiai da Rava Natuna i vibenabenamei; tauna, kovoġa ġaeġaena ina vaia! I aii da alona avena ita vinatunei.”

²² Maranai i amam ma Iesu palawa i vaia ma i viegualau, i vogimagimai ma Tauvotaġotaġo i verei ma i riwa, “Ona vaia; wei tupuau.”

²³ Anina ma *wine* kelakana i vaia ma i viegualau ma i verei da anatapui i umei,

²⁴ ‡“Wei tau tarau i toi rava maġamaġaui aubai ma au parivainuagana bagibagina ina vovai-virewapani.

²⁵ Anina a ririwemi, *wine* ega ana uma-melei da maranai God ana rava aubaii ana vigulau.”

²⁶ Ma taui voepaepa welana i ravi ma i ġae au Ola *Olives*.

Peter, Iesu ina boviei

(Matthew 26:31-35; Luke 22:31-34; John 13:36-38)

²⁷ Iesu, taui i riwei “I girumi nanare,

‡ **14:8:** Mai Jew ai kaua da taubeu dajiei e bulobuloi muriai au kokoaga e tereterei. * **14:24:** Exo 24:8; Jer 31:31-34

God i riwa, ‘Tauvīgamoğamo ana virağeni ma sipu ina vilamonei.’ (Zekariah 13:7)

Ma nanare anatapumi ona ruba-tawaneu.

²⁸ Wate au vomairi au murina ana aivinao au Galili.”

²⁹ Peter i riwa, “Mepa da anatapui ina rubatawanem, wate ega tau!”

³⁰ Iesu, Peter i riwei, “A ririwana-kauem da amadodo waguvvarai muriai da kokorekere ina tou mara ruağ; tam mara tonuğ ma bovieu.”

³¹ Wate Peter, ponana i bagibagi ma i riwa, “Avena mepa da tau, tam maiteni ana irağe. Ega melanai ana boviem!” Ma taui ġelauui riwana tagogina i latoni.

Iesu au Gethsemani i raraupari

(Matthew 26:36-46; Luke 22:39-46)

³² Ma au Gethsemani i ġeta ma Iesu, ana tauvotağotağ i riwei, “Weka ona kiala ma ana raupari.”

³³ Ma Peter, James ma John i taravaini ma nuanuana i’rağe ma nuanuana i bola-kaeui.

³⁴ Ma taui i riwei, “Au nuabola i rata kaua au orau da e vunuvunui. Weka ona mae ma ona vineneğana.”

³⁵ Ma aburuna i verau-nae ma au doa i peu ma i raupari da mepa da tagotagogina, lamna wei marana apoapoena tauna ita netawanei.

³⁶ I riwa i pa, “*Abba* Amau! Aiwai anatapuna tagotagogina tam awarim. Wei kovoğa kelakana ma vaitawanei. Wate ega tau au ġoana, wate tam am ġoana.”

³⁷ Ma Iesu i nememei ma taui tonuğa rarau-nuavurui i nelägai. Ma Peter i riwei, “Simon!§ tam aiwai matavena? Mara aburuna uta vineneğana bo ega?”

³⁸ Ma Iesu, taui i riwei, “Ona vineneğana ma ona raupari da ega au raelara ona peu! Arua e ġoegħoei, wate tupua i ġokokokara.”

³⁹ Ma i naeme ma parina tagogina i raupariei.

⁴⁰ Maranai i nememei ma i nelägai, i matamatave; taui, matai i vitai. Ma taui ega ita aramanei aiwai ita riwei.

⁴¹ Mara vitonuina i nene-memei ma taui i riwei, “Taumi amapo ona matamatave ma laumi ina tautau? Anina! Mara i ġetai, ona inanai. Rava Natuna ina vibenabenamei ġo’apoapoe ravai au urai.

⁴² Ona vomairi; tana nae; ona inana! Tauvibenabenameu e nenei!”

Iesu i pani

(Matthew 26:47-56; Luke 22:47-53; John 18:3-12)

⁴³ Iesu i bababani ma Judas, tauna ana Tauvotağotağ tagogi i ġetai. Tauna, patara ana apiai maiteni i nei. Pirisi Babadai ma Tarawatu Babadai ma dogadogara, wei ravai i paritawaneiai.

⁴⁴ Muriai da Iesu awarina ita ġeta; Judas, patara ai mataira i verei, “Orotona ana vigia laġolağonei; nai tauna. Ona pani ma ona naiei ma ona inana-kauei!”

⁴⁵ Maranai Judas i ġeta ma i nae Iesu awarina ma i riwei, “Tauviararamana!” Ma i vigia-laġolağonei.

⁴⁶ Ma taui, Iesu i vojjini ma i pani.

⁴⁷ Ma tagogi kampa i maimairi, ana sword i taina-lavui ma Pirisi ġegetelarana ana taunola taniğana i borituini.

§ 14:37: Au Mrk 3:16 Simon wavana i virai da Peter.

48 Ma Iesu, tau i riwei, "Taumi ana apiami o nei da ota paniu bo, apamina tau amkwala kwalau?"

49 Marana patapatai taumi maiteni ta mamae au Tempol ma a viaramana ma ega ota paniu. Ma i girugirumia nanare, ina tupua."

50 Ma Tauvota-gota-go anatapui, Iesu i voterei ma i ruba-tawanei.

51 Ma laraga tagogi, i vikareko ma Iesu i vota-gota-go. Tau i goei da ita vojjini,

52 wate ana kareko i vojjini ma tauna ana kovakovana i ruba.

Tau, Iesu i etarei.

(Matthew 26:57-68; Luke 22:54-55, 63-71; John 18:13-14, 19-24)

53 Ma taui, Iesu i niae Pirisi Gegetelarana. Pirisi Babadai, dogadogara ma Tarawatu Babadai mepa i vitagogieiana.

54 Ma Peter i vota-gota-go da Pirisi Gegetelarana ana numa. Ma ana au debadeba, purusimani maiteni i kiala ma i vivairara.

55 Pirisi Babadai ma mai Jew ai boru gegetelarana,* Iesu ana apoapoe i baiei da ita vira-geni; ma i baiana-avei.

56 Matamata ma-gama-gaui, Iesu i viwavu-morumoruei, wate ai viwavu taputapunei ava.

57 Ma gelaui i vomairi ma wei wavuna morumoruna i kauei Iesu awarina,

58 "Tauai a nonori tauna i riwa, 'Wei tempolna i voavaoaia. Tau ana rikai ma au pom tonu-nga au murina, Tempol gelauna ana voai ma lamna ega raya ita voai."

59 Wate nanare ai viwavu taputapunei ava.

60 Pirisi gegetelarana i mairi taui au naoi ma Iesu i vitara-virevirei, "Wei ravai e viviwavuim ma ega aiwai ma paribelei bo?"

61 Ma Iesu i genuana ma ega ita paribelei.[†] Ma Pirisi gegetelarana i vitaraviravirana-melei, "Tam Keriso tauvilawana bo? Viviaiainana Natuna bo?"

62 *Iesu i paribelana, "Tau tauna! Ma Rava Natuna ona inanai, Vivirewanapanana au oienai ina kiala ma mara ladanei ina nei.

63 Pirisi gegetelarana, amlona i gaigai ma ana gara i sikai ma i riwa, "Aiwai aubaina matamata gelaui tana goei?"

64 Taumi, vijibo-nga o nonori ma ami nota aiwai?"

Tau anatapui i riwa, "Tauna ana go'apoapoe aubaina anina da ina ira-ge!"

65 Ma gelaui i raukarei ma Iesu i ovai ma naona i purui; i raunavanavai ma i riwei, "Ma pariverelai, aiai i ravim!" Ma tauvipaipai, Iesu i vaia ma i vunui.

Peter, Iesu i boviei

(Matthew 26:69-75; Luke 22:56-62; John 18:15-18, 25-27)

66 Ma Peter au gabaura i mamae ma Pirisi gegetelarana ana taunola guguini i getai.

67 Maranai tauna, Peter i 'nanai i vivairara; ma i 'nana-tunutunui ma i riwa, "Tam maiteni Iesu Nasaretei, ana tauvota-gota-go!"

68 Wate tauna i bovi ma i riwa, "Ega ata aramanei aiwai e bababaniei, a vinuanainei!" Ma i tuopu au metaeta ma [kokorerek i tou‡].

* **14:55:** Mai Jew e goregorei Sanhedrin. † **14:61:** Isaiah i parivereta da Keriso ana au ira-ge ega ina gagaloana-melei. (Isa 53:7). * **14:62:** Da 7:13 ‡ **14:68:** Wei riwana buka au wadubo nonoana ega ita mamae.

⁶⁹ Taunola guguini, Peter i 'nanai ma i raukarena-melei ma rava au ġereġere i maimairi i riwei, "Wei ravana, taui tagogi!"

⁷⁰ Wate Peter i bovi me.

Mara aburuna muriai, taui au ġereġere i maimairi, Peter i riwana-melei, "Tam anina, taui tagogi; aubaina tam, Galiliei!"

⁷¹ Ma Peter i riwa, "God au matana, tau a ririwa kaua, ravana o ririweia a vivinuanainei!"

⁷² Maratagogi kokorerekko i tou mara viruaina ma Peter, Iesu riwana i notai - *Muriai da kokorerekko ina tou mara ruāga, tam mara tonuġa ma bovieu. Ma Peter i vinuabola kaua ma i tou.*

15

Iesu i taravaina-naiei Pilate au naona

(Matthew 27:1-2, 11-19; Luke 23:1-5; John 18:28-38)

¹ Ubaubanai boibogħi, pirisi babadai ma dogadogara ma tarawatu babadai anatapui i viborū* ma i vianina da Iesu i pani ma i veredamanei Pilate au urana.

² Pilate, Iesu i vitara-virevirei i pa, "Tam mai Jew ai gulau bo?" Iesu i paribelei i pa, "Anina e ririwa nanare."

³ Pirisi Babadai e viviwavuim kaua maġamaġau aubai.

⁴ Ma nanare Pilate, Iesu i vitaraviravirana-melei i pa, "Tam ma paribelana bo eġa? Ma nonori e viviwavuim kaua maġamaġau aubai!"

⁵ Wate Iesu i genuana ma eġa ita paribelei. Ma Pilate i ba kaua.†

Iesu ana iraġe i vianinei

(Matthew 27:15-38; Luke 23:13-25; John 18:39-19:16)

⁶ Taui ai kaua maemaena da Raġona Torelana au marana, Pilate, panipani tagogi, rava ai ġoanei e ruperupeni ma e vovoterei da e nena.

⁷ Oroto tagogi wavana Barabas; tauna Rome gabemani i viġavie i ma i pani da panipani au numana i mamae. Ana rava maiteni tauviraġena.

⁸ Ma patara i ġeta da Pilate ita vibagħi da panipani tagogi ita rupeni Raġona Torelana au marana.

⁹⁻¹⁰ Pilate i paribelei, "Taumi o ġoegħoei da mai Jew ai gulau ana rupeni aubaimi bo?" Pilate i aramanei da Pirisi Babadai, Iesu i unurei ma lamna aubaina Iesu i veredamanei tauna awarina.

¹¹ Wate Pirisi Babadai, patara i egari da Pilate, Barabas ita rupeni ma eġa Iesu.

¹² Pilate, patara i paridadana-melei i pa, "Tauna o ġoreġoreia mai Jew ai gulau mena ana kauanei?"

¹³ Taui i garara, "Ma tuparatui!"

¹⁴ Pilate i riwa, "Aiwai apoapoena i kauei?" Ma taui i garara guratana, "Ma tuparatui!"

¹⁵ Pilate i ġoiei da patara ita vinuaubai ma Barabas i rupeni ma sorodia i egari da Iesu i kwapui da i vitaratarai ma i naei da ita tuparatui.

Sorodia, Iesu i vinamei

(Matthew 27:27-31; John 19:2-3)

¹⁶ *Sorodia*, Iesu i taravaina-ruie Pilate ana au numa ma ai rava ġelau i ġoreiħi.

* **15:1:** Mrk 14:55 *Sanhedrin* † **15:5:** Mai Rome ai tarawatu e mamae da maranai i viwavuim ma tauetara ega uta paribelei lamna tam anina wawu ma varai.

¹⁷ Ma gara lebalebarina[‡] [*me gulau ana gara*] Iesu i voteni ma kunuteia ai donadonanei i viri da au kolana i terei.

¹⁸ Ma vinamana i raukarei ma i garara, “Egualau mai Jew ai gulau!”

¹⁹ Ma kolana gonuei i raviravi ma i ovaovai. Ma ae-tutuiei i mae-ğaira au doa ma i raudunelei ma i vivinamei.

²⁰ Ma i vijiboğä vorovei ma gara lebalebarina i voğigi-tawanei ma ana gara i voteni. Ma i taravaina-opunei da ita tuparatui.

Iesu i tuparatui

(Matthew 27:32-44; Luke 23:26-43; John 19:17-37)

²¹ Taui i nenea ma Simon i nelagai, rava Sairinie[§] (tauna Rufus ma Alexander amai). Simon wapuei i nenei. Ma sorodia, tauna i egari da Iesu ana korosi i avarai.

²² Taui, Iesu i naiei da gabu i ğoreğorei Golgotha, lamna anona unu gabuna.

²³ *Sorodia, wine bunama myrrh* maiteni i virai ma Iesu i veredadani, wate tauna i geduaiei.

²⁴ Ma Iesu i tuparatui ma ana gara, taui ava au orai i ğutai.*

²⁵ Ubaubanai 9 kilok nanare, Iesu i tuparatui.

²⁶ Aniviwavuna i girumi ma i tutui, “Mai Jew ai gulau.”

²⁷⁻²⁸ [◊]Danedanenei ruağä, Iesu au ririvana i tuparatui; tagogi au oienma ğelauna au kelakelauna.[†]

²⁹ [◊]Taubabara, kolai i kwajikwajiei ma Iesu i vivinamei, “Na! Tam Tempol taurikaina ma au pom tonuğä ma voa-melei.

³⁰ Ma vilawana-melem ma korosiei ma ğairai!”

³¹ Ma nanare Pirisi Babadai ma Tarawatu Babadai maiteni, Iesu i vivinamei, “Rava ğelaui i vilawani, wate ainelana ita vilawana-melana-avei.

³² Keriso Tauvilawana, Israel ana gulau; marina korosiei ma ğairai ma tana inanai da tana vitumağanei!” Danedanenei i tupatuparatui maitenai, Iesu i vinamei.

Iesu ana irağē

(Matthew 27:45-56; Luke 23:44-49; John 19:28-30)

³³ Ma au benai dobu anatapuna i waguvarei da 3 kilok au bigai.

³⁴ Lamna maranaina Iesu ponana i rata ma i kwatu, “*Eloi, Eloi, lama sabachthani?*” Lamna anona, “*Au God, au God aiwai aubaina u netawaneu?*”

³⁵ Ma rava ğelaui au ğereğere i maimairi i nonori ma i riwa, “Ona rautaniğanei, Elijah e kwatukwaturei!”

³⁶ Ma rava tagogi i ruba da gara ai au damona i pani ma au *wine* tomatomana i vigaloi ma i voepai Iesu au ipirina ma i riwa,[‡] “Ona vipaipai ma tana inanai mepa da Elijah ina nei da ina tereğairei.”

³⁷ Ma Iesu ponana i rata ma i kwatu ma i lavutu tawanana.

³⁸ Ma Tempol au orana anitereğägara au pouna i wanasicai au tepana da i ğaira au doa.

³⁹ Ma sorodia ai bada, Iesu au naona i maimairi; i ’nanai da i lavutu tawanana ma i riwa, “Wei anina God Natuna.”

[‡] **15:17:** Eng. *purple*. [§] **15:21:** Eng. *Cyrenian*. ^{*} **15:24:** Taui ğaima i tawanei me *dice* da aiai aiwai garana ita vaia. [◊] **15:27-28:** Isa 53:12 [†] **15:27-28:** Giruma ğelaui waduboi vs 28 e mamae *Ma aiwai i kaukaueia lamna peroveta i ririweia i tupua, Taui i ’nanai me taui ığo’apoapoe taukauei.* Isa 53:12 [◊] **15:29:** Mrk 14:58 [‡] **15:36:** Psa 69:21 peroveta i girumi da *Keriso* ita verei.

⁴⁰ Waivine ġelaui ueia i mae ma i raraubiga: Mary Magdalene ma Mary (James keikeina ma Joses[§] aloi) ma Salome.

⁴¹ Taui, Iesu i votaġoġi ma i vovoagui maranai au Galili i mamae ma waivine ġelaui maġamaġau, tauna maiteni i ġegħae au Jerusalem, anatapui kampa.

Iesu i vikokoagei

(*Matthew 27:57-61; Luke 23:50-56; John 19:38-42*)

⁴²⁻⁴³ Ma au biga i tuturiaei Joseph Arimatheaei* tauna rava ġaeġaena tagogi boru ġetelarana au orana. Tauna God ana vigulau ana nei i vipaipaiei. Ma vokaukaua marana (Lamna Sabat au naona)[†] ma Joseph ana tepeatorana, Pilate awarina i rui ma Iesu taubeuna i vibagei.

⁴⁴ Pilate i baiei da Iesu boibogħi i'rāġe. Tauna, *sorodia* ai bada i kwatuei ma i vitara-virevirei da Iesu i'rāġe bo ega?

⁴⁵ Maranai *sorodia* ai bada i pariverei da anina riwa kaua. Ma Pilate, Joseph i riwei da Iesu tupuana i vaia.

⁴⁶ Joseph, gara maiana ġaeġaena i gimarai ma Iesu tupuana i tere-ġairei. Garei i umai ma au guba tupuana i vimataveni ma ġaima ġaeġaena i kaipeuri da kokoaga metaetana i viaitomeni.

⁴⁷ Mary Magdalene ma Mary - Joses alona i 'nanai mepa Iesu taubeuna i vimataveni.

16

Iesu i vomairi

¹ Ma Sabat au murina, Mary Magdalene ma Mary - James keikeina alona ma Salome, bunama ġabuġabui i gimarai da i naiei da Iesu tupuana ita buloi.*

² Ma Sunday ubaubanai boibogħi maranai madeġa i gogogo, taui i nae au kokoaga.

³ Ma i nena ma i bababani, "Aiai aubaita ġaima kokoaga au metaetana ina kaipeura-tawanei?"

⁴ Maranai taui i taepai, i 'nanai da boibogħi ġaima i kaipeura-tawanei - ġaima ġaeġe kaukauana.

⁵ Maranai i rui au guba ma oroto laragana ana gara ararapoirina i 'nanai au oienas.[†] Ma taui orai i auepai.

⁶ Orto laragana i riwa, "Eġa orami ina auepai, taumi, Iesu Nasaretei o baibaiei bo? I tupatuparatuia; tauna i vomairi! Ona inana, tauna ega weka! Taui weka taubeuna i vimataveni.

⁷ *Marina ona nae ma ana tauvotaġoġo ona riwei, ma Peter ega nu-anuami ina vuru da Iesu e vivinu au Galili. Kampa ona inanai i ririwemi nanare."

⁸ Taui i opu ma kokoagei i viruberubei ana ini sisisi ma ana rovoi. Taui i rovo kaua, lamna aubaina ega rava ita riwei.

[§] **15:40:** Au Mat 27:56, Matthew i girumi *Joseph* ma ega *Joses*. ^{*} **15:42-43:** Eng. *Arimathea*.

[†] **15:42-43:** Mai Jew ai *Sabate*, madeġa e neneulai au Friday e vivikarei da madeġa e neneulai au Saturday e kwakwa. Mai Jew ai Tarawatu e ririwa da rava i'rāġe lamna marana tagogina ina doboi. *Sabate* amadodo madeġa e neneulai ina vikarei lamna aubaina Joseph i volaġġilgħiha da Iesu taubeuna ita doboi.

^{*} **16:1:** Mai Jew ai kaua maemaena da taubeu monamonei ina buloi ma muriai ina doboi ma waivine i ġoiei da wei kauai ita votaġoġi. [†] **16:5:** Tupua i vimataveni au oienas i kiakiala, ana gara ararapoirina. [◊] **16:7:** Mrk 14:28

Mark 16:9-20

Mark Riwana Aiaina damona lamna wariaġa i vine-boai. Ma rava ġelauna aiwai i notanotai nanare au vs 9 da 20 i girumi. Wei damonana weka i vikarei.

Iesu, Mary Magdalene awarina i eġa

⁹ Iesu iraġelei i vomairi me au Sunday ubaubanai boibogi ma i ainae da Mary Magdalene awarina i eġa. Maraotai Iesu, Mary awarina arua-apoapoei seven i viopuni.

¹⁰ Iesu, ana tauvotaġotaġo i vivinuabola ma i toutou ma Mary i ġeta da i pariverei.

¹¹ Ma Mary i pariverei da Iesu i lawana me ma tauna matanei Iesu i 'nanai. Wate taui eġa ita vitumaġanei.

Iesu, tauvotaġotaġo ruāġa awari i eġa

¹² Wei au murina Iesu inanana tapuna ma ana tauvotaġotaġo ruāġa awari i eġa; maranai taui i nenaе au melagai.

¹³ Taui i naeme ma tauvotaġotaġo ġelaui i vieġei. Wate taui nanare eġa ita vitumaġanei.

Iesu, Taui 11 awari i eġa

¹⁴ Muriai taui 11 i amam ma Iesu awarii i eġa. Ma i eni aubaina taui orai i bado ma eġa ita vitumaġana maranai rava, i riwei da Tauna i vomairi me.

¹⁵ *Iesu ana Apasol i riwei, “Ona nae dobu au anatapuna. Ma God Riwana Aiaina ona jimei rava anatapui awarii.

¹⁶ Aiai da i vitumaġana ma i babataito; tauna ina lawana. Ma aiai da eġa ita vitumaġana ina kovoġi.

¹⁷ Ma taui aiavoi da i vitumaġana, rewapanana ina verei da kaua babai ina kauei. Ma arua-apoapoei ina viopuni ma pona tapunei ina babani.

¹⁸ Taui, mota uraiei ina vaia ma waiawa ina umai ma eġa ina rauputei. Ma urai doridoriai au kolai ina terei ma ina lawana.”

God, Iesu i ġaiei au Mara

¹⁹ *BADA Iesu, awari i babani vorovei. Ma tauna i ġaiei au mara ma God au oieni i kiala.

²⁰ Tauvotaġotaġo i opu ma dobu au anatapuna i raraugugula. Ma BADA, taui i voagui ma kaua babai i kaukauei da tauvotaġotaġo aiwai i bababanie i vovai-virewapani.

Apasol ai kaua Pariverena

Luke ana buka i giruma vorovei ma muriai Apasol ai kaua bukana i girumi. Tauna ana ano ġaeġaena lamna i ġoei da rava ita vieġei da menanare Arua Vivivireina Iesu ana tauvotaġoġo i rau-etalaraveni da Riwana Aiaina ita vituai,

Au Jerusalem ma au Judea au anatapuna ma au Samaria ma dobu augia dewadewana.

(1:8)

Kerisiana ai babara ma ai nola i babaniei. Mai Jew awarii i vikarei ma i nae da dobu anatapui i vitumaġana. Tauamgiruma ana nota ġaeġaena da wei bukana tauiavana ita pariverei da kerisiana avena Rome gabenina ita viviġavie. Kerisiana vitumaġanana lamna mai Jew ai vitumaġana e kaukauana-paiei. Wei bukana i ġutai da raġaraġana tonuġa, ma e viviatataieta da dobu au anatapuna Iesu Riwana Aiaina i jimei ma ekalesia i vitupui:

Iesu ana ġae au murina Ekalesia au Jerusalem ai nola i vikarei;
Palestine taun ġelauj awari i tua-nae;

Ma i tua-nae au Mediteranean da i nae au Rome paratana. Wei bukana ana kaua ġaeġaena lana Arua Vivivireina i nolanola, ma rewapani tauvitumaġana au Jerusalem i verei au Pentecost. Ma wei au bukana i vieġeta da Arua vivivireina mara nonoa agu ma rewapani ekalesia ma ai babada i verei ai au aninola au anatapuna. Wariġa kerisiana ai pariverena i tere-tagogiei raugugula au maġamaġaui, ma kaua ma ai nola i kaukauei anatapui. Wei au bukana i girumi da wei parivainuaġanana ana rewapani tauvitumaġana ai au lawana ma kerisiana ai au voepaepa i viatataieta.

Buka rereġana 1.

Vokaukaua tauvimatamata aubai (1:1-26)

Iesu ana tarawatu ma ana parivainuaġana damona (1:1-11)

Judas Epajana (1:12-26)

Tauvimatamata au Jerusalem (2:1–8:3)

Tauvimatamata au Judea ma Samaria (8:4–12:25)

Paul ana nola (13:1–28:31)

Paul ana vaġai tagogi (13:1–14:28)

Boru au Jerusalem (15:1-35)

Paul ana vaġai viruaina (15:36–18:23)

Paul ana vaġai vitonuina (18:24–21:16)

Paul i vianipani au Jerusalem, Caesarea, ma Rome (21:17–28:31)

Iesu ana Apasol i parivainuaġani

¹ Egualau Theophilus, buka au naona a girugirumia* lamna Iesu ana tupua ma ana nola i vikarei da i kaukauei ma i viviararamana a pariverem

² i nae da ana ġae au marana. Muriai da Iesu i ġaiei au mara, Tauna Arua Vivivireinei ana apasol vinevinei riwa bagibaginei i pariverei.

* **1:1:** Bukana au naona i girugirumi lamna Luke ana Gospel

³ Iesu ana irāge au murina i vieğana-melei ana apasol awarii. Ma kaua mağamağau i kaeui da apasol i vitumağana kaua da Tauna anina i lawana me. Taui awarii i ega au pom 40 au orana ma God ana vigulau i babanie.

⁴ Maranai ana apasol maiteni i vitagogiei ma i riwana-guratei i pa, “Ega Jerusalem ona oputawanei, wate pulona amau i paripari-vainuağanimi ona paini, maraotai a ririwemi nanare.

⁵ *John wairei i babataito, wate Mara aburuna ava Amau, Arua Vivivireinei taumi ina babataitomi.”

God Iesu i ġaiei au Mara

⁶ Muriai maranai Iesu ma Apasol i vitagogiei ma taui Iesu i vitara-virevirei i pa, “Bada! Marina, Israel ana† vigulau ma vere-melei bo?”

⁷ Ma Iesu i paribelei, “Amau ainelana ana rewapani mara ma iri e vivibadei, aubaina da taumi ega ona aramanei.

⁸ *Wate maranaina Arua Vivivireina au orami ina rui, maranaina taumi rewapani ona vaia. Ma aubaiu ona vitaunola au Jerusalem, Judea, au Samaria ma dobu au anatapuna.”

⁹ *I babani vorovei ma au matai God Iesu i ġaiei au Mara. Ma apau i nei da i purui ma taui ega ita inana-melei.

¹⁰ Ma taui i ġogouta au Mara ma nelara ruāga ai gara ararapoiri au ririvai i raumairie.

¹¹ Ma i riwa, “Mai Galili, aiwai weka o maimairie ma o ġogoutatei? Wei ravana menanarena o inanai i ġaenei, amapo nanare ina nememei.”

Judas epaiana i vinei

¹² Anina ma Apasol Ola Olive, i voterei ma i ġaira me au Jerusalem lamna ega uama ma au ġereġere.

¹³ *Ma au Jerusalem i ġeta ma i ġae numana i mamae lana au tepana au vatavatara. Taui ai wava, Peter, John, James ma Andrew, Philip ma Thomas, Batolomeo ma Matthew, James - Apius natuna, ma Simon tauna au naona Zealot‡ ma Judas - James natuna.

¹⁴ Ma wei ravai Mara patapatana i vivitagogiei ma i raraupari gogona, waivine ġelaui ma Iesu ana roaroa ma aloi Mary maiteni kampa.

¹⁵ Wei au marana, tauvitumağana 120 i vitagogiei ma Peter i vomairi ma wenanare awari i babani,

¹⁶⁻¹⁷ “Varevareiu, Judas Iskariot lamna turata tagogi ma maiteni ta nola gogona, wate muriai i voagu da Iesu i pani. Arua Vivivireina wei riwana wariağga gulau David i riwei da ina tupua; ma aiwai i ririwei anina nanare i tupua.”

¹⁸ Judas Iesu i amverenei mane vainana aubaina, ma wei manenei doa i gimarai. Ma nai au doana tauna kolanei i peu ma manawana i wanawamai da amoamona i opu.

¹⁹ Ma rava anatapui au Jerusalem wei irağena riwana i nonori, lamna aubaina taui nai dobuna ai ponei i viwavai Hakeldama, wei anona Tara Doana.

²⁰ “Wariağga Gulau David i girugirumia, nanare i tupua,
Ana animae ina kwakwawa,

* **1:5:** Mrk 1:8 † **1:6:** Rome gabemanina Juda i vibadei wei au marana, Mai Jew wei ega ita ġoei, ma i ġoei da ita virai. * **1:8:** Mrk 16:15 * **1:9:** Mrk 16:19 * **1:13:** Mrk 3:16-19 ‡ **1:13:** Rava ununurana. Wei ravai mai Rome ai gabemani e vivigavie.

ma ega aiai au orana ina mae.

(*Psalm 69:25*)

Ma

rava gelauna ana nola ina vaia.

(*Psalm 109:8*)

21 *Lamna aubaina marina awarita, rava gelauna tana vinei da ina raviepaiai. Tauna ravanana Iesu maiteni ta bababara-nae madega tonuغا au orana,

22 John rava i babataitoi au marana ma i nae da Iesu i gaiei au mara. Ma maiteni tana nola ma rava tana riwei menanarena God Iesu iragelei i vovaimairini."

23 Ma taui rava ruaغا i vinei, Joseph-Barsabas (ana wava gelauna Justus) ma Matthias.

24-25 Anina ma taui i raupari, "BADA tam rava anatapui orai u aramanei. Ma viegelai da wei ravai ruaغا, ma metauna u vinei da Judas ana gabu ina vaia da ina viApasol, aubaina Judas i voterelai da i nae ana au gabu."

26 Anina ma taui i vine, ma vinevine Matthias awarina i peu, ma tauna i vi-Apasol, ma Apasol 11 au orai i rui. §

2

Arua Vivivireina i gairai

¹ Pentecost torelana i getai ma tauvitumağana anatapui numa tagogi au orana i vitagegiei.*

² Maratagogi gugura ġaeġaena, nonorana me ive vivirewapanana marei i gairai ma tauvitumağana i mamae numana i vioai.

³ Taui purapura inanana me ai menamenana i 'nanai, i gairai ma rava tagotagogi ava au kolai i kiala.

⁴ Ma Arua Vivivireina anatapui i vioai ma pona taputapunei ava i bababani Arua ana aguei.

⁵ Nai maranaina mai Jew patupatutui dobu au anatapuna i vitaomana au Jerusalem da Pentecost torelana ita apui.

⁶ Ma patarai kampa i viruberubei, ma i nonori da gugurana lamna tauvitumağana taui tagotagigiva ai ponei i bababani ma taui ai nota i kwa.

⁷ Taui anatapui i baei ma taui ava i babani vivira i pa, "Wei mai Galili bo?

⁸ Ma menanarena da anataputa awarita ata ponei e bababani!

⁹⁻¹⁰ Tauta ġelauta mai Parthia, Mede ma Elam, ma mai Mesopotamia, Judea, Capadosia, Pontus ma Eisia, Pirijja, Pamphilia, Egypt ma Libya navanavana, au Sairini au ġereġerena, ma ġelauta mai Rome,

¹¹ ġelaui mai Jew ma ġelaui Jentail wate inibori i vaia da i vimai Jew. Ma ġelauta mai Crete ma mai Arabia. Wate God kaua ġaeġaena i kaukaueia, ata ponei i bababaniei ma ta nononoril!"

¹² Taui anatapui i vinuanaina, nuanuai i raġaraġa ma i bababani vivira, "Wei aiwai kauana e tuputupua?"

¹³ Wate ġelaui taui i vinamei i pa, "Wei ravai i uma bua!"

Peter rava awarii i raugugula

* **1:21:** Mrk 1:9; Mrk 16:19 § **1:26:** Wei kalona wenanare: mai Jew wava ġaima muomuoi awari i girugirumi ma e tawatawanei, ma aiai ana namba i ega lamna tauna ina vaia. Taui i vitumagana da wei kauana awarinei God taui ina viataetai da aiai ita vinei. (Pro 16:33) * **2:1:** Mai Jew ai Ragona torelana au murina au pom 50 ma Pentecost torelana e vivikarei. Wei riwana anona amapo wei bukana au damona ona iavi ma ona aramanei.

¹⁴ Anina ma Peter i vomairi Apasol 11 maiteni, ma ponana ġaeġaenei patara awarii i babani,

Au rava mai Jew ma anatapumi au Jerusalem maemaemi, babani ana tere-kauei da ona aramanei. Ona rautaniġana kaua.

¹⁵ Wei marinaota, 9 kilok ubaubanai! † Wei ravai eġa ita uma bua me taumi o notanotai nanare,

¹⁶ Wei lamna wariġa peroveta Joel i ririweia e tuputupua:

¹⁷ *Mara au damona,*

Aruau rava anatapui awari ana iwagi.

*Ma natunatumi nelarai ma waivinei riwau ina jimei,
ma nelara voui mataiei kaua ina inanai,*

ma babada magumaguri rauboniei kaua ina inanai.

¹⁸ *Wate nanare, Aruuana iwagi au taunola nelarai ma waivinei awarii,
ma ina vitaubbabani.*

¹⁹ *Ma kaua babai au mara ana kauai,
ma au dobu mataira ana vieġai*

ai araratana, tara ma bau potopotona.

²⁰ *Ma madegħa ina waguvarei
ma nawaravi ina ravitaratarai,*

muriae da BADA ana mara ġaeġaena ma boruborumanina ina nei.

²¹ *Nai au marana aiavoi da BADA awarina e viviġore agu aubaina BADA
taui ina vilawani.* (Joel 2:28-32)

²² Ma Peter i babani me:

Mai Israel ona rautaniġana: God Iesu Nasaretei i vovai-virewapani da kaua babai, ma mataira ġaeġaei i kauai da ita viataiemi da tauna anina Godei i nei.

²³ *Wate God wariaġa i viogei ma ana ġoana nanare da Iesu au urami i terei, ma taumi ġo-apoapoe ravai ai aguei, Tauna au korosi o tuparatui da o virāġeni.

²⁴ *Wate God, Iesu iraġelei i vovaimairini, ma iraġe iniviarana i vaitawanei ma iraġe eġa tagotagogina da tauna ita vojjini.

²⁵ Wariaġa David Iesu i bababanie maranai i riwa:

Tau a inanai BADA God au naou mara au anatapuna.

Tauna au oieu lamna aubaina eġa ana rovo.

²⁶ *Lamna aubaina nuaiai orau i oai ma menau i morelana,
ana iraġe ma a aramanei da tupuau ma paina-kauei.*

²⁷ *Ma aruuau eġa rava irairaġei ai au dobu ma voterei,
ma tam eġa am taunola vivivireina tupuana ma voterei da ina buda.*

²⁸ *Tam lawana etanaina u viatataieu,
ma Tam maiteni a mamae ma a vinuaiai kaua.* (Psalm 16:8-11)

²⁹ Au rava, A riwana-kauemi da amata gulau David i'raġe da i doboi, ma ana kokoaga weka e mamae.

³⁰ *Wate David lamna peroveta, ma i aramanei da God i parivainuāġani da ana damei gulau ina opu, me tauna nanare.

³¹ Ma David i 'nanai God muriae aiwai ina kauai ma i riwa,

Keriso ina vomairi me,

ma tupuana eġa rava irairaġei ai au dobu ina voterei da ina buda.

(Psalm 16:10)

† **2:15:** Mai Jew taui au bigai sia e aniani ma wain e umaumai. * **2:23:** Mrk 15:24 * **2:24:** Mrk 16:6 * **2:30:** 2Sa 7:12-13

³² Ma God Iesu-na tagogina iraägelei i vovaimairini, ma tauai anatapuiai a vimatamata.

³³ Ma God i ġaiei ma au oienā i vikialai. Ma Arua vivivireina i verei me i parivainuāgana nanare, ma nai Aruana tagogina Iesu awariai i waġi, lamna marina o nononori ma o inainanai.

³⁴ David ega ita ġae au mara, ma wate i riwa, BADA au Bada i riwei, “*Au oieū ma kiala*

³⁵ *ma am ġavia au ae karem ana terei.* (Psalm 110:1)

³⁶ Lamna aubaina mai Israel anatapumi ona aramana-kuae da wei ravana Iesu o tupatuparatuia, God i terei da BADA ma Tauvilawana.

³⁷ Ma maranai rava wei riwana i nononori, taui orai i rautonai da Peter ma Apasol ġelaui i riwei, “Varevareiai, tauai aiwai ana kuae da ana lawana?”

³⁸ Ma Peter i paribeli, “Taumi tagotagogi ava Iesu Keriso wavanei ona rupena ma ona babataito ma ami ġo'apoapoei ina nota-tawanei, ma God ana pulo Arua Vivivireina ona vaia.

³⁹ Wei parivai-nuaġanana lamna taumi natunatumi maiteni aubaimi. Ma wate nanare mai jentail - aiavoi da e kwatukwatuei ina nei Tauna awarina.”

⁴⁰ Ma Peter riwa ġelaui maiteni rava i vinua-terenei, ma i egari, “God ona vianinei da ina vilawanimi, ma ega kovoġa ona vaia.”

⁴¹ Ma rava maġamaġau Peter ana babani i vitumaġanei ma i babataito ma nai au marana rava 3,000 ai au boru i rui.

Tauvitumaġana i mae gogona

⁴² Ma tauvitumaġana Apasol ai viararamana i nononori, ma i viboruboru, i amam ma i raraupari gogona.

⁴³ Apasol kaua babai ma mataira ġaeġae maġamaġau i kaukauei ma anatapui i rovo ma God i vivirana-kuae.

⁴⁴ Ma tauvitumaġana anatapui gabu tagogii vivitagogiei ma aiwai ġariei ai rava maiteni i ġutaġutai.

⁴⁵ Taui ai doa, ai numa, ai wapu ma ai purapura i gimagimarei ma manena ai rava ġelaui maiteni i ġutaġutai.

⁴⁶ Taui mara patapatai au tempol i vivitagogiei, ma ai au numa ana nuaiaii ma ana morelanai i amam gogona.

⁴⁷ Ma taui God i vovoepaepai ma rava anatapui i vivinuaiaini. Ma marana patapatai rava voui i neneiai Iesu awarina ma tauvitumaġana ai boru i viviratai.

3

Peter, oroto aena gwaġagwaġana i vilawani

¹ Mara tagogi au bigai 3 oklok, Peter ma John pari aubaina i ġeġae au Tempol.

² Ma oroto tagogi aena gwaġagwaġana i tupuei, ma mara au anatapuna ana rava i avavara neiai da Tempol metaetana, e ġoreġorei, metaeta aiaina, kampa i vivikialai ma rava i rurui tempol au orana i vivigimanei mane aubaina.

³ Maranai i 'nanai da Peter ma John aburuna ava da au metaeta ita rui, ma i vibaġai mane aubaina.

⁴ Peter ma John orotona i 'nana-tunutunui ma Peter i riwa, "Ma inanai!"

⁵ Ma orotona taui i 'nanai ma i notanotai da aiwai awarii ita vaia.

⁶ Ma Peter, orotona i riwei, "Awariu silva ma gold ega wate aiwai awariu lamna ana verem. Iesu Keriso Nasaretei, wavanei ma vomairi, ma babara!"

⁷ Ma Peter oroto nimana au oieina i vojiji ma i voagui da i vomairi. Ma maratagogi oroto aena ma ae kwarukwaruna i ai ma i virewapana,

⁸ ma aenei i viauepa ma babara i vikarei. Anina ma taui maiteni i rui au tempol ma tauna tempol oraninei i bababara, i viviauepa ma God i vovoepaepai.

⁹ Ma rava anatapui orotona i 'nanai i bababara ma God i vovoepaepai,

¹⁰ ma i aramanei da tauna ravana tagogina tempol metaetana e goregorei *inanana aiaina* au naona, i kiakiala ma i vivigimana. Ma rava anatapui i 'nanai aiwai i tupua wei orotona awarina ma i ba-guratana.

Peter patara awarii i babani

¹¹ Ma orotona Peter ma John i vovojiji ma rava anatapui i bana-kauei, ma i viruberubei taui awari au lovelove e goregorei, Solomon ana lovelove.
*

¹² Ma maranai Peter patarai i 'nanai ma i riwei:

Au rava mai Israel, aiwai aubaina o vivinuanaina? Ma aiwai aubaina o inainana-tunutunuiai, apamina tauai ai rewapani bo ai vipatutuei, weiv ravana a kaei da i babara?

¹³ *Wei lamna amamata Abraham, Isaac ma Jacob ai God, ana taunola Iesu i viborumei, ma taumi Tauna o verenei da ita viraegeni, ma Pilate au matana o geduaiei. Pilate i goei da ita rupeni wate taumi ega ota vianinei.

¹⁴ *Iesu lamna rava vivivireina ma jijimanina, wate o geduaiei. Ma Pilate i goei da Iesu ita rupeni, wate taumi o goei da tauviragena i rupeni aubaimi.

¹⁵ Ma taumi lawana maemae-nonoana tauvereina o viraegeni, wate God i vilawana-melei, tauai wei a vimatematei.

¹⁶ Wei ravana aena gwaagwaagna Iesu au wavana i vitumaagna ma lamna aubaina i lawana. Taumi o aramanei ana doria menanare, Wate ana tumaagna Iesu awarina i vilawani.

¹⁷ Ma au rava marina a aramanei da taumi ami babada maiteni Iesu o viraegeni, aubaina taumi ega ota aramanei da tauna tauvilawana.

¹⁸ Wate wei lamna wariaga God ana peroveta anatapui i ririweia i tupua, God i riwa da ana tauvilawana ina vinuapoapoe.

¹⁹ Ami goa apoapoe Ona voterei ma ona mae-taviremi God awarina da tauna ami goapoapoe ina nota-tawanei.

²⁰ Ma lamna maranaina God aruami nualawalawana ina verei, God Iesu i vinei da ami Tauvilawana ma ina paritawaneiai.

²¹ Iesu au Mara ina mae da God kaua anatapui ina ravivouni, me God ana peroveta vivivirei wariaga i ririweia nanare.

²² *Moses i riwa, "BADA ami God peroveta, me tau nanare, ina terei ma tauna ami dam oinei ina nei. Ma aiwai anatapuna e ririwemi ona rautaniaganana-kauei. †

* 3:11: Solomon ana lovelove tagogi tempol au orana e mamae. Wei lamna gari au ririvana ma ana tuatua magamaagna. * 3:13: Exo 3:15 * 3:14: Mrk 15:6-14 * 3:22: Deu 18:15, 18 † 3:22: Mai Jew e ririwa da Moses lamna ai peroveta gaeagaena.

23 ♦ Ma aiai da wei perovetana ega ina rautani ganei lamna God ana rava awariei ina vilamonei."

24 Peroveta Samuel ma muriai Peroveta ma gama gau, kaua i ririweia marina e tuputupua.

25 ♦ Taumi nai perovetai natunatui ma taumi maiteni parivainua gana bagibagina au orana. Au baina God Abraham i riwei, "Am epaepaia awariei dam anatapui au dobu ana viaiaini."

26 Ma maranai God ana taunola i vinei, ma au naona i paritawaneiai awarimi da ita viaiainimi, ma lamnei taumi tagotagogi ava ami go'apoapoe ota opu-tawanei ma ota nei Tauna awarina.

4

Jew babadai Peter ma John i etarei

1 Peter ma John rava awari i bababani ma pirisi pulo tauapuina ma tempol tau painii* ai bada ma Sadusi gelaui † i getai.

2 Taui amlo i gaigai kaua Peter ma John awari aubaina taui i viviararamana da God, Iesu iragelei i vovaimairini ma wei i viatataiana da God rava anatapui iragelei ina vovaimairini.

3 Taui Peter ma John i pani ma au i pom aubaina panipani au numana i terei da i mae mara.

4 Wate rava magama gau riwa i nonori ma i vituma gana, ma ai maga nelara 5,000 waivine ega ita iavi.

5 Ma mara i tom ma Jew babadai, dogadogara ma tarawatu babadai au Jerusalem i vitagogie.

6 Ma pirisi gegetelarana Annas kampa ma Caiaphas, John, Alexander ma pirisi gegetelarana ana rava maiteni. ‡

7 Ma taui Peter ma John i neiei da au naoi i vimairini ma i riwei, "Ai wai rewapananei, ma aiai wavanei wei o kaei?"

8 Arua Vivivireina Peter orana i vioai ma taui i riwei, "Rava ai babada ma dogadogara;

9 tauai kaua aiaina a kaei gwa gwa gana awarina ma amadodo taumi o vitara-virevirelai, da menanare tauna i lawananei.

10 Ma wei ona aramana-kaei, da taumi ma mai Israel anatapui, da Iesu Keriso Nasaretei o tuparatui, Wate God tauna iragelei i vovaimairini ma tauna wavanei wei orotona au naomi lawalawaina e maimairi.

11 Taumi tauvoa nai gaimana o geduaeie, wate wei gaimana lamna numa ogona, numa ana tapuna e vovoijini. §

12 — Lamna aubaina Iesu ainelana ina vilawanita. Ma God ega aiai gelauna au dobu rewapani ita verei da ina vilawana."

13 Ma taui Peter ma John ai tepatora inanai ma maranai i aramanei da taui ega girugirumai, ma i baei. Ma i aramanei da taui Iesu ana tauvota gota go.

* 3:23: Deu 18:19 ♦ 3:25: Gen 22:18 * 4:1: Tempol tau-painina lamna anatapuna au tempol e inainana-vaitetei (purusimani). Taui pirisi gegetelarana ana taunola. † 4:1: Sadusi taui iragelei vomairime ega ita vituma ganei ‡ 4:6: Mai Rome Caiaphas i vinei da Pirisi gegetelarana, poiana Annas epaiana. Wate mai Jew ai au giu da aiai pirisi gegetelarana vaivaina i vaia, tauna anina ina mae da au irage. Luke e ririwa da Annas tauna pirisi gegetelarana. § 4:11: Mai Jew ai numa gaimei i voavoai. Iesu tauna anina God ana Tempol vouna ogona. (Eph 2:19-21, Isa 28:16).

¹⁴ Ma wate i 'nanai oroto i vivilawania Peter ma John maiteni i maimairi, lamna maranai taui gamoi i pota.

¹⁵ Anina ma Peter ma John i riwei da boru gabuna i opu-tawanei, ma taui ava i vitarairavira vivira.

¹⁶ Taui i vitaraviravira-viravira i pa, "Aiwai tana kaei wei nelarai awari? Rava anatapui au Jerusalem i aramanei da taui kaua babai i kaukauei, lamna ega tana boviei.

¹⁷ Wate tana viigaei da wei kauai ega ina tua rava gelaui awari, ma riwa bagibaginei tana viigaei da ega aiai awarina Iesu wavanei ina raugugula."

¹⁸ Anina ma taui i gorei da i rui me, ma riwa bagibaginei i viigaei da ega aiai awarina Iesu wavanei ina raugugula bo ina viaramana.

¹⁹ Wate Peter ma John taui i paribelei, "Taumi ami nota aiwai. Tauai God ana voteletelei bo taumi?"

²⁰ Tauai aiwai a inainanaia ma a nononoria babanina ega ana voterei."

²¹⁻²² Wei Orotona i vivilawani lamna gwaagwaagana ma ana madega 40. Lamna aubaina rava anatapui God i vovoepaepai, ma babada ega ita aramanei menanare Peter ma John ina kovoaganei. Ma i parivairovorovomelei ma i paritawanei da i nae.

Tauvitumaagana God i vibagai agu aubaina.

²³ Peter ma John i nae me ai rava awari ma pirisi gaegei ma dogadogara aiwai i ririweia taui i viegei.

²⁴ [◇]Maranai tauvitumaagana wei riwana i nonori, taui anatapui i raupari gogona God awarina:

BADA tam ai gulau, Tam mara, dobu, boga ma anatapuna au orana maemaei taukaueina.

²⁵ Tam Arua Vivivireinei am taunola, amaiai David gamonei u babani ma u riwa,

Aiwai aubaina rava awariai e mejimeji,

ma aiwai aubaina ai oga e taratara labalabai?

²⁶ *Ma dobu ai gulagulau i vokaukaua ma babada gaegei gelaui maiteni i vitagogie i da*

BADA ma ana tauvilawana maiteni i viigavie i. (Psalm 2:1)*

²⁷ [◇]Anina riwa kaua. Wei kauai weka au Jerusalem i tupua, Herod ma Pontius Pilate, Jentail ma mai Israel maiteni i vitagogie, da am taunola vivivireina Iesu u bulobuloia i viigavie.

²⁸ Ma tam am rewapanei ma am goanei am oga menanare u tarataranei marina nanare i tupua.

²⁹ BADA, nai ravai ai parivai-rovorovo au uram ma am taunola ma vovai-virewapani da ana tepatorai riwam ina raugugulei.

³⁰ Uram ma viloloi da ma vilawana ma kaua babai ma mataira gaegei ma kauai, am taunola Vivivireina Iesu wavanei.

³¹ Ma pari au murina, taui mepa i vivitagogie gabuna i vigu. Ma Arua Vivivireina anatapui orai i vioai. Ma ana tepatorai God riwana i raugugulei.

Tauvitumaagana gariei i gutagutai

³² [◇]Tauvitumaagana anatapui ai nota ma orai tagogi. Ma ai purapura tagogi ma ega aiwai ita nuanei.

* 4:24: Exo 20:11 * 4:26: Wei lamna Keriso. ◇ 4:27: Mrk 15:1 ◇ 4:32: Act 2:44-45

³³ Ma Apasol ana tepatorai ma rewapanai BADA Iesu ana iraġe, ma ana vomairi me i raugugulei. Ma God ana viaiaina ġaeġaena taui anatapui awari i peu.

³⁴⁻³⁵ Ma taui au orai eġa aiai aiwai ita voladaġei aubaina, ai rava ġelaui ai doa bo ai numa i gimaginei ma manena i neneiai Apasol awari i terererei, ma aiai da aiwai i vovoladaġei nanare i vovoagui.

³⁶ Me Joseph, tauna Levi ana damei, au Saipras i tupua, ma Apasol tauna i ġoreġorei Barnabas, wei wavana anona lamna tauduġu.

³⁷ Tauna ana doa i gimarei, ma manena i neiae da Apasol awari i terei.

5

Ananias ma Saphaira

¹ Anina ma Ananias awana Saphaira maiteni ai doa navanavana i gimarei.

² Ma airuaġa i vianina tagogi da mane navanavana i nuanei, ma Ananias mane navanavana i naiei da Apasol awari i terei.

³ Anina ma Peter tauna i vitaravireirei, “Ananias aiwai aubaina Satan u vianinei da au oram i rui ma Arua Vivivireina u morui, ma doa u gimaginei manena navanavana u nuanei?

⁴ Doa lamna tam ġarimej da uta gimarei bo eġa. Ma maranai u gimarei lamna manena tam ġarimej da uta verenei, aiwai aubaina nota apoapoena au oram i rui? Tam eġa rava awarina uta moru, wate God awarina u moru.”

⁵⁻⁶ Maranaina Ananias wei riwana i nononori, tauna i peu da i'rāġe. Anina ma nelara i rui da tupuana i umai ma i naiei da i doboi. Ma aiavoi da wei riwana i nonori i rovo kaua.

⁷ Taui eġa ita mae guratana, ora tonuġa nanare ma awana i nei, aiwai i tupua eġa ita aramanei.

⁸ Ma Peter wavine i paridadanei, “Abe uta riweu, tam awam Ananias maiteni doa o gimaginei maiana anina wei bo?” Ma tauna i paribelei, “Ee, doa maiana anina nai.”

⁹ Ma Peter i riwa, “Aiwai aubaina taumi o vianina da BADA Aruana ota raudadani? Nelarai awam i dobodoboi ma inanai au metaeta da tam maiteni ina avara-opunem.”

¹⁰ Maratagogi wavine Peter au ae karena i peu da i'rāġe. Maranai nelara i rui au numa ma i 'nanai da wavine i'rāġe, anina ma i avara-opunei da awana au ririvana i doboi.

¹¹ Lamna maranaina ekalesia anatapui, ma rava aiavoi da wei riwana i nonori i rovo kaua.

Apasol rava maġamaġaui i vilawani

¹² Ma Apasol mataira ma aniba kauai maġamaġaui i kaukauei rava awari. Ma tauvitumaġana Solomon ana au lovelove i vivitagogie.

¹³ Wate rava ġelaui ai au boru ruina i rovoei, wate rava taui i viviranakauuei.

¹⁴ Wate nelara ma waivine maġamaġaui Iesu awarina i vitumajgħana ma tauvitumaġħana ai au boru i rurru.

¹⁵ Ma lamna aubaina rava ai rava doridoriai i avavara-opunei au eta ma ai au animatave i vimataveni, da Peter inii ita vodadani bo eġa da ġouna taui ita ġouni da ita lawana.

16 Ma melagai ġelaui Jerusalem au ririvana ravai maġamaġaui ai rava doridoriai, ġelaui arua-apoapoei i ruiruinia i neiai ma anatapui i vilawani.

17 Anina ma pirisi ġegetelarana ma ana rava mai Sadusi anatapui orai unura i oai.

18 Ma Apasol i pani, ma panipani au numana i terei.

19 Wate waguvarai BADA ana anela i nei da panipani numana metaetana i votawanei, ma taui i taravaina-opunei ma i riwei,

20 "Ona rui tempol au orana, ona mairi ma lawana vouna riwana anatapuna rava ona pariverei."

21 Anela i ririwei nanare, taui au tempol i rui ma rava viararamanai i vikarei. Nai maranai pirisi ġegetelarana ana rava maiteni i ġetai ma boru ġaegħaena e ġoreġorei Sanhedrin i terei. Ma rava i paritawanei au panipani numana da Apasol ita neiai awari.

22 Taui panipani au numana i ġeta ma i baina-avei, ma i naeme da i vieġa.

23 I pa, "Panipani numana anina i gudu-kauei, ma tauvipaipai au metaeta i maimairi; wate maranai tauai metaeta a votawanei lamna eġa aiai kampa."

24 Maranai tempol taupainina ai bada ma pirisi babadai wei riwana i nonori, taui i vinuanaina da aiwai i tupua.

25 Ma rava tagogi i nei ma i riwa, "Ona rautaniġana! Nelara panipani au numana o teretereia, taui au tempol e maimairi ma rava e viviararamani."

26 Anina ma tempol taupainina ai bada, ma babada ġelaui maiteni i nae ma Apasol i neiai. Taui i rovo ma eġa ita egari mepa da rava ġaimej ita ravi.

27 Ma Apasol i neiai boru ġegetelarana au naoi, ma pirisi ġegetelarana taui i vitara-virevirei.

28 I pa, "A riwana-guratemi da wei ravana au wavana avena ota viararamana, wate ami viararamana i tua da Jerusalem i oai. Ma wei ravana tarana wavuna tauai o vereverelai."

29 Ma Peter Apasol ġelaui aubai i vitauvibabani i pa, "Tauai God ana voteletelei ma eġa rava.

30 Taumi Iesu au *korosi* o tuparatui ma o viraġeni, wate amamata ai God Tauna i vovaimairini.

31 Ma marina Tauna God au oienā e kiakiala, Tauna BADA ma Tauvilawana, Da mai Israel ai ġo'apoapoe ina rupeni, ma ai ġo'apoapoe ina nota-tawanei.

32 Ma tauai Arua Vivivireina maiteni wei kauai anatapui mataielai a inanai. Ma nanare God Arua Vivivireina i paritawanei rava votelatelai awari."

33 Taui wei babanina i nonori ma amloj i ġaigai kaua, ma i ġoei da Apasol ita viraġeni.

34 Wate Pharisi ma tarawatu badana wavana Gamaliel, rava anatapui wei ravana e vivivirei. Tauna Sanhedrin boruna au orana i mairi, ma rava i riwei da Apasol i opunei au doa mara aburuna ava.

35 Anina ma ana rava i riwei, "Mai Israel, ona inana kaua ma muriai da aiwai wei ravai awari ona kaei.

36 Mara tagogi oroto wavana Theudas viġavia i vikarei ma i kauana-melei da tauna rava ġaegħaena, ma rava ai maġa 400 nanare tauna i votaġotagoi. Ma maranaina tauna i viraġeni ana tauvotaġotago i vilamonei ma aiwai anatapuna kampa i kwa.

³⁷ Wate tauna au murina oroto Galiliei wavana Judas i ġeta, census au marana ma rava maġamaġau tauna i votaġoġtāgoi, ma tauna maiteni i virāgeni, ma ana tauvotaġoġtāgo i vilamonei.

³⁸ Lamna aubaina a ririwemi da wei ravai ona voteretawanei! Mepa da taui ai nola ravei, amapo ina peu.

³⁹ Wate mepa da Godei, taumi eġa tagotagogina da wei ravai ona viġaei, taumi mepa da God o viviġavieit.

⁴⁰ Taui Gamaliel ana babani i voteletelei. Ma Apasol i riwei da i rui, ma i wipiei i kwapui ma i viġaei da Iesu wavanei ina jima, ma i paritawanei da i nae.

⁴¹ Aubaina i aramanei da God taui i vinei da Iesu wavana aubaina ina vinuapoapoe. Anina ma Apasol ana nuaiaii Sanhedrin i opu-tawanei,

⁴² Taui mara patapatana tempol au orana ma au numa God riwana aiaina i raraugugulei ma i viviararamana da Iesu tauna Keriso.

6

Stephen i vinei tauvoaġu

¹ Tauvitumaġana ai boru i rarata, ma au orai mai Jew Greek tauba-banieina, mai Jew kampa maemaei i viamparipariei. Taui i beubeura da ai kaikaibaba ai ġuta eġa ita terererei.

² Anina ma Apasol 12 tauvitumaġana ai boru i raukwatuei. Ma i riwei, "Tauai Apasol ma ai nola lamna God riwana ata jimejimei ma avena mane nolana maiteni ata kaukuae.

³ Lamna aubaina au rava, awarimi rava 7 ona vinei, taui orai Arua Vivivireina i oai ma nuaulaulai da wei nolana ina kauei,

⁴ Ma tauai ai nola da pari ma God riwana ava ana jimei."

⁵ Rava anatapui wei ogatarana i vianinei, ma Stephen i vinei, Arua Vivivireina orana i oai, ma ana tumaġana God awarina i rata kaua. Ma nanare Philip, Prokoras, Nikano, Timon, Pamenas ma Nicolas tauna Jentail, Antiokei ma ini bori i vaia ma i vikeresiana.

⁶ Ma wei ravai i neiai ma Apasol nimai taui au tepai i terei ma i raupariei.

⁷ Anina ma God riwana i vituai ma au Jerusalem rava maġamaġau Iesu i vitumaġanei, ma nanare pirisi maġamaġau i vitumaġana.

Stephen i pani

⁸ Anina ma God Stephen i viaiaini ma i vovai-virewapani da mataira ma kaua babai i kaukuae rava awari.

⁹ Wate mai Jew ġelaui provins nununai i nei mai au Sairini, mai Alexandria, ma Silisia ma Eisia ai parinumana e ġoreġorei panipani *waduboi, Stephen ana ġavia i vomairi.

¹⁰ Wate Arua Vivivireina, Stephen nuaulaula ma riwa i verei ma i bababani da taui i vigamopotai.

¹¹ Lamna aubaina taui rava ġelaui i gwalai da moruei Stephen ita vibenabenamei, ma ita riwa, "Tauai a nonori Stephen, Moses ma God i vivijibogħi!"

* **6:9:** Wei ravai lamna slave waduboi, marina i voterei da ana ġoanei e mamae.

¹² Ma lamnei patara i viamlo-gaigai*nini*, dogadogara ma tarawatu babadai maiteni. Anina ma taui Stephen i vojijini ma i naiei mai Jew ai Boru Ĝegetelarana† awarina.

¹³ Ma taui rava ġelaui i neiai da moruei Stephen i vibenabenamei, ma i riwa, “Wei ravana mara patapatana Tempol vivivireina ma Moses ana tarawatu i vivijibogi.

¹⁴ Tauai a nonori i riwa da Iesu Nasaretei tempol ina rikai ma tarawatu Moses i verevereta anatapui maiteni ina virai.”

¹⁵ Ma rava anatapui nai au boruna i kiakiala, Stephen i ’nanatunutunui, ma i ’nanai da tauna naona i lalalai me anela.

7

Stephen ana babani.

¹ Anina ma Pirisi ġeġetelarana Stephen i paridadanei, “Wei viwavuna, riwa kaua bo?”

² *Stephen i paribelei:

Varevareiu ma amamau, au babani ona rautaniġanei. God boruboru-mana noita Abraham awarina i eġa au Mesopotamia, muriai da ita nae au Haran.

³ Ma God tauna i riwei, *Am dobu ma am dam ma netawanei da ma nae dobu ana viatataiem lana.*

⁴ *Anina ma Abraham Mesopotamia i netawanei ma i nae da au Haran i mae. Amana i’raġe ma au murina God Abraham i paritawanei da marina dobuna o mamae lana kampa ita mae,

⁵ *Nai maranaina God eġa Abraham doa ita verei, eġa aburu dadadana! Wate i parivainuagani, da ina verei tauna ma ana epaepaia aubaii. Nai au marana Abraham eġa natunatuna,

⁶ *ma God wenanare Abraham i riwei, *Am epaepaia au dobu ġela ina mae ma ina vitaunola, nai dobuna ravai taui ina rau-iviapoapoelei da madeġa 400 ina kwa.*

⁷ * *Wate ravai, awarii e vivitaunola ana kovoġi, ma muriai mai Israel ina opui ma wei au dobuna ina voepaepaiu.*

⁸ *Anina ma God inibori parivai-nuaġanana bagibagina Abraham maiteni i kauei, ma maranai Isaac i tupua ma au pom vi-8-na Abraham natuna inina i bori. Muriai Isaac natuna Jacob inina i bori, ma nanare Jacob natunatuna 12 anatapui inii i bori. Wei babadai lamna tauta noinoita.

⁹ *Jacob natunatuna varei Joseph i unurei ma i gimarei da ita vitaunola au Egypt, wate God tauna awarina i mae.

¹⁰ *Ma ana au nuabola i gagaloei. Ma God nuaulaula i verei ma i kauei da Egypt ai gulau nuanuana i vaia, anina ma i terei da Egypt i vibadei ma ana numa orana i vibadei.

¹¹ *Ma gomara ġaġaġena i ġeta au Egypt ma au Canaan, ma vinu-apoapoe ġaġaġena i tupua. Ma noinoita eġa aï lam.

† **6:12:** Sanhedrin. * **7:2:** Gen 12:1 * **7:4:** Gen 12:4 * **7:5:** Gen 12:7; 13:15; 17:8 * **7:6:** Gen 15:13-14 * **7:7:** Exo 3:12 * **7:8:** Gen 17:10-14; Gen 21:2-4; Gen 25:26; Gen 29:31-35:18
* **7:9:** Gen 37:28; Gen 39:2-21 * **7:10:** Gen 41:39-41 * **7:11:** Gen 42:1-2

12 Ma maranai Jacob i nonori da au Egypt lam, ma noinoita i paritawanei au Egypt, wei ai babara naona.

13 Ma muriai i nae me ma wei maranai Joseph i viegana-melei vare-vareina awarii, ma kampa mai Egypt ai gulau Pharaoh, Joseph ana numa ravai i aramanei.

14 [✧]Anina ma Joseph riwa i paritawanei amana Jacob awarina ma i riwei da ana numa ravai anatapui, ai mağa 75, ita nei au Egypt.

15 [✧]Anina ma Jacob i nae au Egypt. Tauna kampa i'rağe ma nanare natunatuna anatapui.

16 Taubeui i naiana-melei au Shekem ma Abraham Hamor natunatuna awarii kokoaga i gimagimaraia, kampa i vimataveni.

17 [✧]Maranai mara i tuğereğerei da God Abraham i paripari-vainuağania ita kaei, ata patara i mağa guratana au Egypt.

18 Ma Pharaoh vouna au Egypt i vibada ma tauna noita Joseph eğa ita aramanei.

19 [✧]Tauna amamata i morui ma i rau-iviapoapoelei, i egari da natunatui melamelai numei i viopuni da ita irağe.

20 [✧]Wei au marana Moses i tupua, tevera inanana aiaina. Amana ma alona natui i ġamoi da nawaravi tonuğa i kwa.

21 [✧]Ma maranai tevera numei i tere-opunei, gulau natuna guguinina tevera i vaia ma i ġamoi da natuna.

22 Ma mai Egypt ai nuaulaula Moses i viararamani ma i virewapano, babani ma nola awarina.

23 [✧]Moses ana madeğä 40 ma i nota da ita nae ana dam ravai ita raugenari.

24 Ma i 'nanai da Egyptei, Moses ana rava oina i raviravi, ma tauna turana bainei Egyptei i vunui da i virağeni.

25 Moses i notai da ana rava ita aramanei da God tauna i paritawanei da ita agui da Egypt ita oputawanei. Wate taui wei eğa ita aramanei.

26 Ma maratomna Moses i nae me ma ana rava ruağä i viğaiğaiawa i 'nanai, ma i riwei, "Taumi ava ma aiwai aubaina o viğaiğaiawa?"

27 Wate ġaiawa tauvikareina Moses i vokaririei ma i riwei, "Tam aiai i terem da ma vibadelai bo tauai ai taurauetara?

28 Tam ma virağeniu me pom Egyptei u virağeni nanare bo?"

29 Maranai Moses wei i nonori tauna Egypt i ruba-tawanei ma i nae au Midian, wei eğa ana dobu wate kampa i mae. Muriai dobuna wavinena i ravağı ma natunatuna nelarai ruağä i tupua.

30 [✧]Ma kampa i mae madeğä 40 i kwa ma BADA ana anela au mutulua ola Sinai au ġereğerena tauna awarina i eğa, inanana me ai mename-nana ai aburuna rugurugui au orana i ġegħae.

31 Wei i 'nanai ma i baei ma i nae au ġereğere da ai arata ita tuvireirei ma i nonori BADA i riwa i pa,

32 "Tau amamam ai God, Abraham ma Isaac ma Jacob ai God." Maranai Moses wei i nononori i rovo kaukaua ma naona i tere-govaġi.

[✧] 7:14: Gen 45:9-10, 17-18 [✧] 7:15: Gen 46:1-7; Gen 49:33 [✧] 7:17: Exo 1:7-8 [✧] 7:19: Exo 1:10-11; Exo 1:22 [✧] 7:20: Exo 2:2 [✧] 7:21: Exo 2:3-10 [✧] 7:23: Exo 2:11-15 [✧] 7:30: Exo 3:1-10

³³ Ma BADA i riwa, "Am ae uma ma votawanei! Wei gabuna au tepana e maimairi, lamna doa vivivireina ma Viaiainana.

³⁴ A inanai menanare mai Egypt, natunatu e rarau-iviaapoapoelei. Ai ora-tou a nonori ma a ġairai da taui ata vai-tawanei. Ma marina ma nei, Tau ana paritawanem au Egypt."

³⁵ *Stephen i riwa:

Wei Moses na tagogina, mai Israel i parivirevirei i pa, "Aiai i terem da tauai ma vibadelai ma ma rauetarelai?" Moses i paritawaneiai da ita vibademi ma ita tereopunemi, anela i ēgaēga ai menamenana au poui, ana aguei.

³⁶ *Ma Moses taui Egyptei i ravena-opunenei ma mataira babai ma vivirewapanai i kaukauei au Egypt, Boga lebalebarina ma ai au vaġai madeġa 40 au mutulua.

³⁷ *Wei Moses-na tagogina, mai Israel i riwei, "God muriae peroveta ami damei ina paritawaneiai me tau."

³⁸ *Moses Israel patarana maiteni Egypt i opu-tawanei i vitagogiei au ola Sinai ma anela Moses awarina i bababani, tauna kampa noinoita maiteni. Ma riwa mamae-nonoana i nonori ma wei lamna i veredamanei tauta awarita.

³⁹ Wate noinoita Moses i parivirevirei ma au orai i ġoei da ita nae me au Egypt.

⁴⁰ *Ma taui Aaron i riwei, "Nai ravana Moses, Egyptei i taravai-opunelai, tauai eġa ata aramanei aiwai awarina i tupua. Ma tauai ai god kokoitau ma kaei da ina rauetaraveniai."

⁴¹ *Anina ma bulumakau ġaubona kokoitauna i kaei, ma pulo i apui awarina ma i amei ma i umei, da aiwai uraiei i kaukauei i vimae-ġaġaġeni.

⁴² Wate God taui i mae-puputei ma i voterei da ubona ma nawaravi ma madeġa au mara i vimae-ġaġaġeni. Wei lamna peroveta nununai i ririweia i tupua:

Rava mai Israel! Maranai madeġa 40 au mutulua.

Taumi eġa Tau awariu ġamoġamo ota vunui ma ota apui tapa?

⁴³ *Taumi amī god Molek ana numa gara ma amī ubona god kokoitauna Rephan o avarai.*

Kokoitau o kaei da ota vimae-ġaġaġeni.

Lamna aubaina rava borui amī au dobu ina vainimi ma ina naiemi aueia,

Babilon ina netawanei da dobu au ġelauna. (Amos 5:25-27)

⁴⁴ *Noinoita, God ana numagara, i avarai maranai au mutulua i mamae. Moses wei i voai, me God i viatataiei nanare.

⁴⁵ Muriae Joshua noinoita i rau-ataraveni ma God ana numagara i avarai ma ana aguei i rui ma nai dobuna ravai i viopuni ma ai dobu ta vaia. Ma numagara kampa i mae da gulau David ana au mara.

⁴⁶ *God, David nuantuana i vai-kauei ma David i vibaġa da tauna God ana numa ita voai.

⁴⁷ *Wate David eġa numa ita voai ma natuna Solomon numa i voai.

⁴⁸ Wate God ġegetelerana eġa rava uranei numa ita voavoai au orana ita mamae, me peroveta wariaġa i riwa i pa:

* 7:35: Exo 2:14 * 7:36: Exo 14:21; Num 14:33 * 7:37: Deu 18:15, 18 * 7:38: Exo 19:1-20:17

* 7:40: Exo 32:1 * 7:41: Exo 32:2-6 * 7:44: Exo 25:9, 40 * 7:46: 2Sa 7:1-16 * 7:47: 1Ki 6:1-38

49-50 *Aubaina Tau aiwai anatapuna au mara ma au dobu a kauei. Tapa?*
BADA i riwa, "Mara* au anikiala
ma dobu aeu kareu aniterenana.
Wate numa aiwaina ona voai tau aubaiu? Egaateni!
Tau au animae-kaua mepa? Ega mepa! (Isaiah 66:1-2)

51 Ma Stephen i riwa:

Taumi orami badobadoi. Ma ega ota goe goei da God ona voteletelei ma tanigami o vopotai da ana riwa ega ota nononori. Taumi Arua Vivivireina o vivigavie me noinomoi i kaukauei nanare.

⁵² Noinoimi metaui perovetai ega ita rau-iviapoapoelei. Wariaga perovetai, God ana tauvilawana, ana nei i vinolenolei; Wate noinoimi wei perovetai maiteni i viraageni. Ma marina Tauna i nei ma o vibenabenamei ma o viraageni.

⁵³ God ana anela i paritawaneiai da ana tarawatu noinoita i verei, wate taumi tarawatuna ega ota voteletelei.

Stephen gaimei i viraġeni

⁵⁴ Maranai babada wei riwana i nonori ma i meji guratana ma ivoi i uta-girigiriei Stephen awarina.

⁵⁵ Wate Arua Vivivireina Stephen orana i oai, i taepai au mara ma God ana horuma i 'nanai, ma Jesu God au oienā i maimairi.

⁵⁶ Ma i riwa, "Ona inanai! Mara metaetana i wanatawanei ma Rava Natuna a inainanai God au oienai e maimairi."

⁵⁷ Marina taui anatapui tanigai i vopotai, i vigaragarei ma Stephen aubaina i ruba,

⁵⁹ Taui i viraurauei ma tauna i raupari i pa, "BADA Iesu, aruau ma vaia!

⁶⁰ Ma ae-tutunei i peu ma i garara, “BADA ai gó’apoapoe ma nota-tawanei.” Wenanare i riwa ma i’raǵe.

8

¹⁻² Ma Saul kampa da Stephen ana iraäge i 'nanai ma i vianinei. Rava patupatutui ġelaui ana toutoui ma ana tarakwatui i nei ma Stephen taubeuna i naiei ma au kokoaga i terei.

Saul Ekalesia i rau-iviapoapoelei

Nai maranaina rau-iviapoapoe ūgaēgaena i vikarei ekalesia awarrii au Jerusalem, Ma anatapui i viruba-tomana au Judea provins ma Samaria provins. Apasol ava au Jerusalem i mae.

³ *Wate Saul i vikarei da ekalesia ai boru ita viamoai. Numa anatapui i ruini ma nelara ma waivine i taina-opunei ma i paritawanei au panipani-numana.

Philip au Samaria

⁴ Wate tauvituma^gana Jerusalem i rubaruba-tawanei taon ma dobu anat-apuna i naeni ma Riwana Aiaina i raugugulei.

* 7:49-50: Wei anona lamna Bada wenanare natuna i riwei, "Tam au oieu ma kiala ma am ġavia au ae kareu ana tuvaidoedoei" ♫ 8:3; Act 22:4-5; 26:9-11

5 Ma Philip i nae au taon tagogi au Samaria ma kampa BADA ana Vinevine Keriso i raugugulei.

6 Maranai patarana, Philip i raraugugula i nonori, ma i 'nanai kaua babai ma mataira ġaeġae i kaukauei taui anatapui orai taputapunei i rautaniġana.

7 Tauna arua-apoapoei rava maġamaġau i orai i egari da ana garagararai i viopuopuana, ma nanare rava maġamaġau gwaġagwaġai ma sige-sigei i vilawani.

8 Ma nuaiai ġaegħaena i mae nai au taona.

Simon tauna barabaravuna

9 Wenanare, nai au taona oroto tagogi i mae wavana Simon, ma tauna wariaġa ava ana baravu i kaukauei ma mai Samaria i baibaiei. Ma i voepaepana-melei da tauna rava ġaegħaena.

10 Rava labalababa, ma wavai naenaei anatapui ana babani i rarautaniġana-kauei ma i ririwa, "Tauna, God ana rewapani e ġoreġorei, Rewapani Ĝaegħaena."

11 Taui i vineneġħanana-kauei aubaina mara nonoa taui Simon ana baravu i baebaei.

12 Wate taui Philip i vitumaġġanei maranai, God ana vigulau Riwana Aiaina ma Iesu Keriso rava awari i raugugulei. Ma lamna aubaina nelara da waivine i nei da i babataito.

13 Simon maiteni i vitumaġġana ma i babataito. Ma Philip mepa i nena tauna kampa aubaina kaua babai ma mataira vivirewapanai i kaukauei. Tauna wei pulona i bana-kauei.

14 Maranai Apasol au Jerusalem i nonori da mai Samaria, God Riwana i vitumaġġanei, taui Peter ma John i paritawanei awari.

15-16 Ma auSamaria i ġeta ma taui i raupariei da Arua Vivivireina ita rui au orai. Aubaina taui Iesu wavanei ava i babataito. Ma arua vivivireina eġa ita rui.

17 Peter ma John urai taui au tepai i terei ma i raupari da Arua Vivivireina au orai i rui.

18 Maranai Simon i 'nanai da mai Samaria Arua Vivivireina i vaia, maranai Apasol urai au kolai i terei, ma Simon mane i vilololoi,

19 ma i vibaġa i pa, "Tau maiteni nai rewapanana ma vereu da rava au kolai urau ana terei ma taui Arua Vivivireina ina vaia."

20 Wate Peter i paribelei i pa, "Anina da God tam am mane maiteni ina tawanem ai au menamenana, aubaina tam e notanotai da God ana pulo manelei ma gimarai!

21 Tam wei nolana au orana am gabu eġa ita mamae, aubaina oram eġa ita ai God au matana.

22 Am nota apoapoe ma votere-tawanei. Ma mae-tavirem BADA awarina ma ma vibaġai da am nota apoapoe ina nota-tawanei.

23 Aubaina a inanaim da unura oram i oai tauai awariai ma wei notai apoapoei e panipanim."

24 Simon marina Peter ma John i riwei, "Aubaiu BADA awarina ona raupari da aiwai o ririwei eġa ina tupua awariu!"

25 Ma Peter ma John ai lawana ma BADA Riwana Aiaina ekalesia voui awari i raugugulei. Ma i raugugula nae Mai Samaria ai au taon nununai da i ġeta au Jerusalem.

Philip ma Ethiopie

²⁶ Mara tagogi BADA ana anela, Philip i riwei, “Ma vokaukaua ma ma nae au rauanaägei, etanai au Jerusalem da e ġaiğaira au Gaza.” (Wei etanaina lamna au mutulua).

²⁷ Anina ma Philip i vokaukaua ma i nae. Ma wei au etanaina oroto Ethiopie i 'nanai. Tauna mai Ethiopia ai kwin Kandake, ana mane taupainina. Wei orotona i nae au Jerusalem God viborumana aubaina,

²⁸ ma i nenaе-me ana au dobu. Ma ana au chariot i kiala ma wariäga peroveta Isaiah buka i girugirumia i 'aiavi.

²⁹ Ma Arua Vivivireina Philip i riwei, “Ma nae ma chariot au ririvana ma babara-nae.”

³⁰ Anina ma Philip i ruba chariot au ririvana ma i nonori badana peroveta Isaiah ana buka i 'aiavi. Ma Philip i paridadana, “Aiwai e iaiavia e araramanei bo eğä?”

³¹ Orotona i paribelei, “Menanare ana 'ramananei mepa da rava eğä ita parivai-araramaniu!” Ma Philip i vibağai da i ġeta da au ririvana i kiala.

³² Buka au orana, wei riwana i 'aiavi,

*Tauna i taravaina-naiei me sipu virägenana aubaina
me sipu natuna e genugenuana maranai aparana e boribori,
tauna eğä aiwai ita latoni.*

³³ *Tauna i vijiboḡi ma i vinimalamalai ma eğä ita kauana-kauei awarina.
Aiai ana epaepaia ina babaniei.*

Aubaina ana mara au dobu i vaitawanei.” (*Isaiah 53:7-8*)

³⁴ Ma orotona, Philip i paridadanei, “Isaiah e babaniana-melei bo rava ġelauna e babaniei?”

³⁵ Ma Philip, wei riwana awarina i vikarei ma riwa ġelaui maiteni ma Iesu Riwana Aiaina i viararamani.

³⁶ Ma i nenaе da waira i 'nanai ma Ethiopie i riwa, “Ma inana waira noi, aiwai aubaina da eğä ana babataito?”

³⁷ *

³⁸ Badana, chariot taurubeina i riwei, “Chariot ma vojijini” Ma tauna ma Philip i ġaira waira au orana ma Philip, badana i babataitoi.

³⁹ Maranai wairei i ġeta, BADA Aruana maratagogi Philip i vai-tawanei ma turana eğä ita inana-melei, ma ana morelanana i nae ana au dobu.

⁴⁰ Wate Philip au Asotus i raueğä ma dobuna i naeni ma Riwana Aiaina i raugugulei da au Caesarea taon i ġeta.

9

Saul i vitumağana

¹ Wate Saul amapo da i mejimeji ma i ġoegoei da BADA ana tauvitumağana ita virağeni. Ma i nae Pirisi Ġetelarana awarina,

² ma i vibağai da pepa ita girumi boru-numai babadai awarii au Damaskas da rewapania ita verei da Iesu ana etanai tauvitumağanai, nelara ma waivine ita pani ma ita neiai au Jerusalem.

³ Ma Saul, Damaskas i tuğereğerei, nanare ma lalalaina marei i ġairai da tauna i ravilalai.

⁴ Tauna i peu au doa ma pona i nonori awarina i babani i pa, “Saul, Saul! Aiwai aubaina e raraū-iviapoapoeleu?”

* **8:37:** Buka wadubo nonoana vs 37 eğä ita mamae.

⁵ Saul i paridadana, “Tam aiai bada?”

Ma pona i paribelei, “Tau Iesu, tauna e rarau-iviapoapoelei!

⁶ Marina ma vomairi ma ma rui au Damaskas, ma kampa aiwai ina riwem ma kaei.”

⁷ Nelara Saul maiteni i nena i mairi kwakwa, ana gamopotai, taui pona i nonori wate ega aiai ita inanai.

⁸ Ma Saul au doa i matamatave i vomairi ma matana i kala, wate ega aiwai ita inanai. Ma ana rava i raunimavoai ma i taravaina-naiei au Damaskas.

⁹ Ma au pom tonuغا ega ita inana, ega ita am bo ita uma.

¹⁰ Au Damaskas tauvitumağana i mae wavana Ananias. BADA ana au inana i viatataiei i pa, “Ananias!”

Ma i paribelei, “Bada, tau weka!”

¹¹ BADA tauna i riwei, “Etanai wavana Etanai Jijimanina ma vaia da Judas ana au numa, kampa oroto Tarsusei wavana Saul ma baiei. Tauna marina e raraupari awariu.

¹² Ma ana au inana i 'nanai oroto wavana Ananias i nei awarina ma urana au inina i terei da ita inana-me.”

¹³ Wate Ananias i paribelei, “Bada, rava mağamağau i riweu da wei ravana ana kaua i apoapoe kaua tauvitumağana awarii au Jerusalem!”

¹⁴ Ma weka i nei pirisi ġaeġaei ai rewapanie da aiai wavam e viviborumei ina pani.”

¹⁵ Wate BADA, Ananias i riwei, “Ma nae! Tau a vinei da aubaiu ina vitaunola ma wavau ina jimei, Jentail ma ai gulagulau awarii ma nanare mai Israel awarii.

¹⁶ Tau ana viatataiei da aubaiu ina jima ma rau-iviapoapoe ġaeġaena ina nei awarina.”

¹⁷ Anina ma Ananias i ġeta au numa ma i rui. Ma urana Saul au tepana i terei ma i riwei, “Vareiu Saul, BADA Iesu, Tauna au etanai awarim i ega maranai weka u nenei, i paritawaneu awarim da ma inana me ma Arua Vivivireina oram ina vioai.”

¹⁸ Maratagogi purapura inanana me iana wenavina au matana i peu, ma tauna, inana me. Ma i vomairi ma i babataito.

¹⁹ Ma i am ma ana rewapani i vai-melei.

Saul au Damaskas i raugugula

²⁰ Ma tauna maratagogi i nae ma pari au numai i raraugugula da Iesu anina God natuna.

²¹ Taui aiavoi da Saul i nonori i ba kaua ma taui ava i babani vivira i pa, “Wei ravana tagogina, rau-iviapoapoe ġaeġaena Iesu ana tauvitumağanai awarii i kaukauei au Jerusalem bo? Tauna i nei weka nolana tagogina aubaina da tauvitumağana ita pani ma ita naiei Pirisi babadai awarii bo.”

²² Wate Saul ana raugugula i virewapani kaua ma lamnei mai Jew au Damaskas i aramanei da Iesu anina Keriso, Vinevinena, ma lamna aubaina ana babani ega ita parivirevirei.

²³ Ma au pom biaġa au murina Jew babadai i viogatara da Saul ita virāgeni.

²⁴ Mai Jew marai ma waguvarai taon garina au metaetana i vipaipai da Saul ita virāgeni. Wate Saul ai ogatara riwana i nonori.

²⁵ Ma waguvarai tauvitumağanai ġelaui ai bada Saul i taravaini ma iriga ġaeġaena au orana i poai ma gavogavo aburuna taon au garina, kampa guravei i tere-ġairei au doa ma i ruba.

²⁶ Saul i ġeta au Jerusalem ma maranai i ġoei da tauvitumaġanai ai au boru ita rui. Wate taui i rovoei ma eġa ita vitumaġanei da tauna Iesu ana tauvotaġotago.

²⁷ Wate Barnabas tauna i taravaini ma i naiei Apasol awarii, ma i riwei menanare au etanai Saul, BADA i 'nanai ma aiwai awarina i babaniei. Ma menanare au Damaskas ana tepatorana i raugugula Iesu wavanei.

²⁸ Anina ma taui Saul i taravaini ma maiteni i mae ma Jerusalem i naeni ma ana tepotorai i raugugula BADA wavanei.

²⁹ Ma nanare Saul mai Jew pona Greek tababanieina maiteni i babani ma i viparipariġai, ma taui i viogatara da tauna ita viragħeni.

³⁰ Maranai tauvitumaġana ġelaui wei i nonori, ma Saul i taravaina-naiei au Caesarea da i paritawanei au Tarsus.

³¹ Anina ma ekalesia au Judea, Galili ma Samaria ana nuaubaii i mae. Ma Arua Vivivireina ana aguei ekalesia ai tumaġana i vovai-virewapani, Ma ai boru i rarata, ma taui BADA i vivirana-kauei.

Aeneas ma Dorkas

³² Nai maranaina Peter dobu maġamaġaui i naeni, ma God ana tauvitumaġana awarii i ġeta au Lidda.

³³ Kampa oroto wavana Aeneas i nelaġai, tauna gwaġagwaġana madeġa 8 ana au aravi i matave.

³⁴ Peter i riwa, “Aeneas, Iesu Keriso i vilawanim! Ma vomairi ma am aravi ma noui!” Ma maratagogi i lawana.

³⁵ Anina ma rava maġamaġaui au Lidda ma Sharon wapuna melagaina, i mae-tavirei BADA awarina.

³⁶ Au Joppa tauvitumaġana tagogi wavana Tabitha (Greek ponanei lamna Dorkas) tauna marana patapatana kaua maġamaġaui aiai i kaukau ei molamokai aubaii.

³⁷ Wei marana tauna i doria ma i'rāġe ma tupuana i oġai ma numa vatavatara au aidamo, i vimataveni.

³⁸ Lidda, lamna Joppa au ġereġerena ma maranai tauvitumaġana i nonori da Peter au Lidda, taui ai rava ruāga i paritawanei da Peter i egari i pa, “Laġilāġina ma nei!”

³⁹ Ma Peter taui maiteni i nae da i ġeta ma i taravaina-ruei au numa vatavatara. Kaikaibaba maġamaġaui ana toutoui Peter i mairi kwaviviroi. Maranai Dorkas lawalawaina ma kwama da gara i popopoia Peter i viatataiei.

⁴⁰ Wate Peter anatapui i vibagħi da i opu au doa, ma ae-tutunei i maeġġaira ma i raupari, ma taubeu i riwei, “Tabitha, ma vomairi!” Tabitha matana i kala ma maranai Peter i 'nanai, i vomairi da i kiala.

⁴¹ Peter urana i viloloi ma i voaqui da i vomairi. Ma tauvitumaġana anatapui ma kaikaibaba maiteni i kwatuei, ma wavine lawalawaina taui i verei.

⁴² Ma wei riwana dobu Joppa i naeni ma rava maġamaġaui Iesu i vitumaġanei.

⁴³ Peter au Joppa i mae au pom biaġa nanare Simon ġamogħamo opina taurauġgaroġaroeina ana au numa.

¹ Au Caesarea oroto* wavana Cornelius, tauna mai Italy sorodia boruna ai bada.

² Tauna rava jijimanina ma patupatutuna, ma ana numa ravai maiteni God taurauduneleina. Ma molamolakai i paipaina-kauei ma marana patapatai i raraupari God awarina.

³ Au bigai tagogi 3 oklok nanare i raraupari ma ana au inana, God ana anela au aiaina i 'nanai, i nei awarina ma i riwa, "Cornelius!"

⁴ Cornelius ana rovona anela i 'nana-tunutunui ma i riwa, "Au bada, menanare!"

Ma anela i paribelei, "Am pari ma am verena molamolakai awarii, i ġeta God awarina me pulo apuapunana ġabuna.

⁵ Ma marina nelara ġelaui ma paritawanei au Joppa ma ravana wavana Simon wavana ġelauna Peter ina taravainiai.

⁶ Tauna rava wavana Simon, ġamoġamo opina taurauġaroġaroeina awarina e mamae gera au ririvana."

⁷ Maranai anela i nae, Cornelius ana taunola ruāga i ġoreiai, ma ġelauna lamna sorodia, tauna ana tauvipaipai, tauna God tauvitumaġaneiana.

⁸ Tauna aiwai anatapuna taui i riwei ma i paritawanei au Joppa.

Peter Cornelius i raugenari

⁹ Maratomna au benai nanare maranai nelarai Joppa i tuġereġerei, Peter i ġeta numa au tepana da ita raupari.

¹⁰ Ma am i 'raġe ma i ġoei da aiwai ita ani, maranai taui lam i vovokaukauei, ma Peter matanei rauboni i 'nanai.

¹¹ I 'nanai mara i wanatawanei ma purapura inanana me puru ġaeġaena au adana 4 i vovijini ma marei i tere ġaireiā au dobu.

¹² Au orana lamna sia tapuna ma tapuna, tetetei me mota ma kiu au aidamo lavelavei.

¹³ Ma pona i riwa, "Peter ma vomairi, ma viraġena ma ma am!"

¹⁴ Wate Peter i paribelei, "Eġa! Lamna eġa melanai ana kauei. Eġa melanai lam viviġana ata am-dadani."

¹⁵ Wate pona i babani me, "Aiwai God i viviaiainia, eġa ma riwa da i apoapoe."

¹⁶ Mara tonuġa wenanare i tupua ma me marana puruna i ġaiana-melei au mara.

¹⁷ Ma Peter aiwai i 'nainanai anona i vinua-notenotei, nanare ma Cornelius nelara i paripari-tawanei, taui Simon ana numa i nelagħi ma i ġeta ana au metaeta.

¹⁸ Tau i paridadana, "Weka rava wavana Simon-Peter e mamae bo eġa?"

¹⁹ Peter amapo da wei i vivinua-notenotei maranai Arua vivivireina i riwa, "Simon, nelara tonuġa e baibaiem!"

²⁰ Lamna aubaina ma vomairi ma ma ġaira au gabaura, eġa ma geduai, aubaina tau a paritawanei awarim."

²¹ Peter i ġaira ma awarii i riwa, "Taumi tau o baibaieu bo, Ami ġoana aiwai?"

²² Ma nelarai i paribelei, "Tauai Cornelius mai Rome ai sorodia ai bada i paritawanelai, tauna rava jijimanina ma God tauvoepaepana, ma mai Jew maġamaġaui tauna e vivivrei. Anela vivivireina i riwei da uta nei ana au numa da aiwai u araramanei uta riwei."

²³ Ma Peter nelarai i ġorei da i rui au numa ma kampa i matave.

* **10:1:** Wei ravana jentail.

Peter Cornelius ana au numā

Ma maratomna anatapui i nae, Tauvitumağana ġelaui au Joppa maiteni i vomairi.

²⁴ Ma au pom ġelauna taui au Caesarea i ġeta. Cornelius taui i paipaini, ma ana numā ravai ma ana rava i ġorei da i nei.

²⁵ Ma maranai Peter i ruirui au numā, Cornelius Peter i 'nanai ma i mae-ġaira au ae karena ma ana vivirana i raudune.

²⁶ Wate Peter tauna i voepai ma i riwa, "Ma vomairi, Tau rava ota me tam."

²⁷ Peter ma Cornelius i bababani ma i ruirui au numā. Ma i 'nanai da patara tauna i paipaini.

²⁸ Peter taui i riwei, "Taumi o aramana-kauei da tauta mai Jew ata tarawatu e viviġaeta da Jentail maiteni tana mae-gogona bo tana raugenari. Wate God i viatataieu da eġa rava ana ġorei rava apoapoeni bo miramirana.

²⁹ Lamna Aubaina maranai u vibaġai da ata nei, Tau au nota aiainei a nei. Tau ata pari-dadanem, Marina ma riweu aiwai Aubaina au riwa u paritawanei?"

³⁰ Cornelius i paribelei, "Au benai wenanare au pom 4 marina i kwa, au numā a raraupari, nanare ma rava ana gara ararapoirina ma namanamaria au naoiu i raumairie."

³¹ Ma i riwa, 'Cornelius! God am pari i nonori ma am verena molalom-lakai awarii i vinuaiaeil'

³² Ma nelara ma paritawanei au Joppa da Simon e ġoreġorei Peter awarina. Tauna Simon, ġamoġamo opina taurauġaroġaroena ana au numā e mamae.'

³³ Lamna Aubaina da am riwa laġilaġina ava a paritawanei, ma i ai da tam u nei. Tauai anatapuiai marina weka God au matana a vivipaipai da BADA aiwai i riwem ana nonori."

Peter ana babani

³⁴ Ma Peter babani i raukarei, "Marina a inana-kauei da God rava anata-pui e vaivaia da tagogina.

³⁵ Wate dobu dobuai ravai God e vivivirei ma kaua aiaii e kaukauei, Tauna wei ravai e ġoegħoei,

³⁶ Taumi o aramanei God Riwana Aiaina i paritawanei mai Israel awarii da rava ina mae-kaua God maiteni, maranai Iesu Keriso ina vitumaġanei ma tauna ai lawana ina vibadei.

³⁷ Taumi o aramanei Iesu aiwai i kauei Judea au anatapuna, au Galili i vikarei maranai John babataito ai kaua i raugugulei.

³⁸ God Arua Vivivireina ma rewapani Iesu Nasaretei i verei da dobu maġamaġgau i naeni ma kaua aiaii i kaukauei, ma rava au orai arua apoapoe i ruiruini, i vilawani.

³⁹ —Aiwai anatapuna au Judah provins ma au Jerusalem i kaukauei tauai anatapuiai a vimatematei ma a bababaniei. Tauna au korosi i tutui da i'rāġe.

⁴⁰ Wate God tauna iraġelei i voepa-melei aupom au vitonuina ma i kauei da ġelauai awariai i eġa.

⁴¹ Eġa rava maġamaġgau tauna ita inanai, anina tauvimatamata i vinevinei awari ava i ġeta. Lamna tauai maiteni a uma ma am ana vomairi au murina.

⁴² Ma i egariai da dobu au anatapuna ana raugugula ma ana jima da God Iesu i vinei da rava anatapui lawalawaii ma irairaĝei ina rauetarei.

⁴³ Peroveta anatapui i jimei da maranai rava Iesu i vitumaĝanei, Tauna wavinei God taui ai ĝo'apoapoe ina vaitawanei."

⁴⁴ Maranai Peter i bababani ma Arua Vivivireina i ĝairai ma rava i raurautaniĝana i vioai.

⁴⁵ Ma mai Jew Joppei i nenei Peter maiteni, i ba kaua maranai God Arua Vivivireina i paritawana ĝairei Jentail awarii.

⁴⁶ Au baina mai Jew i nonori taui pona tapunei i bababani ma God i vivimae-ĝaeĝaeni. Anina ma Peter i riwa,

⁴⁷ "Taui Arua Vivivireina i vaia me tauta. Wei lamna aubaina eĝa aiai ina viĝaeta da wei ravai tana babataitoi."

⁴⁸ Ma taui Cornelius ana numa ravai maiteni ma ana rava ĝelaui Iesu Keriso wavanei babataitoi, ma taui Peter i vibaĝai da maiteni ita mae mara aburuna.

11

Peter ana babani

¹ Apasol ma tauvitumaĝana au Judea provins i nonori da Jentail maiteni God riwana i nonori ma i vitumaĝana.

² Ma maranai Peter i ĝeta me au Jerusalem tauvitumaĝana mai Jew ĝelaui tauna i eni i pa,

³ "Tam Jentail ai au numa u rui, ma maiteni u am!"

⁴ Anina ma kaua menanare i tuputupuanei anatapuna Peter taui i pariverei:

⁵ I riwa i pa:

Maranai a raraupari au Joppa ma matauei kaua a inanai, ma purapura inanana me puru ĝeĝaena adana ⁴ i vojijini ma marei i tere-ĝaireiai awariu.

⁶ Au orana a inana lamna ĝamoĝamo maramaraĝamai ma moduei, tetetei me mota ma kiu au aidamo lavelavei.

⁷ Ma pona a nonori i pa, "Peter ma vomairi, ma viraĝena ma ma am!"

⁸ Tau a paribelei, "Eĝa! Lamna eĝa melanai ana kauei. Eĝa melanai lam viviĝana ata am-dadani."

⁹ Wate pona marei mara viruaina i babani, "Aiwai purapurana God i riwa da i ai, tam eĝa ma riwa da i apoapoe."

¹⁰ Mara tonuĝa wenanare i tupua, ma puruna i ĝaiana-melei au mara.

¹¹ Nai maranaina mai Caesarea ai rava tonuĝa i paripari-tawaneiai, au metaeti i raumairiei.

¹² Ma Arua Vivivireina i riweu da eĝa aiwai ana notai ma orau taputapunei ana nae. Mai Joppa tauvitumaĝana ⁶ maiteni a nae ma ravana ana au numa a rui.

¹³ Cornelius i riwelai da anela awarina i eĝa, ma i riwei, "Rava ma paritawanei au Joppa da rava wavana Simon Peter ina neiai."

¹⁴ Tauna wei riwana ina neiai ma lamnei tam ma am numa ravai maiteni ina vilawanimi.

¹⁵ Ma babani a raukarei ma Arua Vivivireina i ĝairai da taui i vioai me au naona awarita i tupua nanare.

¹⁶ *Anina ma Iesu aiwai i ririwei a notai, “John wairei i babataito, wate taumi Arua Vivivireinei ina babataitoimi.”

¹⁷ Inanana au aiaina da God Jentail pulona tagogina i verei, me tauta i verevereta maranai Iesu Keriso ta vitumaġanei, ma tau aiai da God ata viġāei?

¹⁸ Taui i vigamopotai maranai wei i nonori, ma God i viborumei i pa, “Riwa kaua da God Jentail maiteni i vianinei da ina rupena ma ina lawana.”

Ekalesia au Antiock

¹⁹ *Ekalesia ġelaui rau-iviapoapoe i rovoei maranai Stephen i virāgeni ma i vilamonei au uama. Ĝelaui i ruba nae au Phonisia, au Saipras ma Antiock, ma kampa Iesu Riwana Aiaina i raugugulei mai Jew ava awarii.

²⁰ Wate ekalesia ġelaui mai Saipras ma mai Sairini i nae au Antiock Jentail awarii ma Iesu Riwana Aiaina i raugugulei.

²¹ BADA ana rewapani taui au orai i mae ma Jentail maġamaġau i vitumaġana ma i mae-tavirei BADA awarina.

²² Wei riwana i ġeta ekalesia awarii au Jerusalem, ma taui Barnabas i paritawanei au Antiock.

²³⁻²⁴ Maranai i ġeta ma i 'nanai da God ravai i viaiaina-kauei, tauna i vinuiai ma i egari da BADA awarina ina vipatutu orai taputapunei. Barnabas tauna rava aiaina, Arua Vivivireina orana i oai ma ana tu-maġana i rata, ma God ana aguie, i rauguga ma rava maġamaġau i taini BADA awarina.

²⁵ Ma Barnabas i nae au Tarsus da Saul ita baiei.

²⁶ Ma i nelāgai ma i neiai au Antiock, ma kampa tauvitumaġana maiteni i mae madeġa tagogi i kwa, ma patara ġaeġaena awarii i viararamana. (Weka au Antiock lamna i vikarei da tauvitumaġana i viġorei Kerisiana)

²⁷ Wei au marana peroveta ġelaui Jerusalem ei i ġairai.

²⁸ *Peroveta tagogi wavana Agabas i vomairi ma God ana rewapani i vieġa da gomara e nenei au naoii dobu au anatapuna (Caesar Claudius ana vibada au marana gomarana i nei).

²⁹ Tauvotaġotaġo au Antiock i vianina da taui ava ita kauana-guratei da mane vounaina ita kauei da ai rava ekalesia au Judea ita voagui.

³⁰ Taui nanare i kauei ma manena Barnabas ma Saul au urai i terei ma taui ekalesia ai babada au Jerusalem i verei.

12

James i virāgeni ma Peter i pani

¹ Lamna maranai, gulau Herod Agrippa* i raukarei da ekalesia ġelaui i rau-iviapoapolei.

² James, John tuana uana sodei i borī-tuini.

³ Ma maranai Herod i 'nanai da mai Jew wei kauana i vinuiaiei, ma ana sorodia i egari da Peter maiteni ita pani da au pani numana ita terei. Wei kauana Palawa Bagibagina ana au torela i tupua.

* **11:16:** Act 1:5 * **11:19:** Act 8:1-4 * **11:28:** Act 21:10 * **12:1:** Tauna gulau Herod 1 ġoġana.

⁴ Ma Peter i pani ma au pani numana i terei ma sorodia 16 tauna i paini. [Sorodia 16 i terei da borui 4 ma i vipaipai.] Herod i ġoei da Peter ita vojjini da raġona torelana au murina ma au deba ita rauetarei.

⁵ Ma lamna aubaina Peter au pani numana i vojjini mara aburuna. Wate ekalesia i raraupari guratana God awarina Peter aubaina.

Peter pani numanei i tere-opunei

⁶ Ma nai waguvvaraina, ma maratomna da Peter ita rauetarei, Peter sorodia ruaġa au poui i matamatave. Urana seinei i raġini sorodia ruaġa au urai, ma sorodia ġelaui au metaeta i vipaipai.

⁷ Maratagogi BADA ana anela i eġa ma pani numana i ravilalai. Ma Peter i vogugui da matana i kala ma i riwei, “Laġilaġina ma vomairi!” Ma sein au urana i dabarara.

⁸ Ma Peter i riwei, “Ma vigara ma ae uma ma oteni.” Ma nanare i kauei. Ma i egari, “Am kwama potopotona ma oteni ma ma votaġotagoiu.”

⁹ Peter anela i votaġotagoi da pani numana i opu-tawanei, wate eġa ita aramanei anela aiwai i kaukauei, tauna i notai i rarauboni.

¹⁰ Taui, sorodia boruna ruaġa au doa i netawanei, da i opu au metaeta iramei, wei e opuopu au taon. Metaeta ainelana i wanatawanei aubaili ma i opu. Taui etanai tagogi i ġairani ma maratagogi anela tauna i voterei.

¹¹ Peter ana nota i nememei ma i riwa, “Wei anina riwa kaua! BADA ana anela i paritawanei da Herod au urana i vaitawaneu, da mai Jew aiwai i notanotai da ita tupua lamna eġa ita tupua.”

¹² Maranai ana nota i nememei tauna i nae Mary ana au numa. (Mary lamna John alona. John wavana ġelauna Mark). Kampa rava maġamaġau i vitagogiegi ma i raraupari.

¹³ Peter au metaeta i raupewapewa ma taunola wavana Rouda i nei da metaeta ita votawanei.

¹⁴ Ma Peter ponana i nonori ma i aramanei da tauna, ma i vinuajai guratana da eġa metaeta ita votawanei ma i ruba-rui da i vinolanolha i pa, “Peter au metaeta e maimairi!”

¹⁵ Wate taui eġa ita vitumaġanei ma i riwei, “Tam ma bubual!” Wate tauna i riwa bagibagi. Ma taui i riwa, “Nai Peter ana anela.”

¹⁶ Wate Peter i raraupewapewa ma maranai taui metaeta i votawanei ma i 'nanai da tauna, taui orai i auepai.

¹⁷ Peter urana i voepai da rava i genuana ma i riwei menanare BADA pani numanei i tere-opunei. Ma i riwei, “James[†] ma ekalesia ġelaui wei ona pariverei.” Ma Peter i nae au dobuġela.

¹⁸ Maranai mara i tom kampa au pani numana nuabola ma vinuanaina ġaġġaena i peu sorodia awarii da aiwai i tupua Peter awarina

¹⁹ Herod, ana sorodia i egari da Peter i baiei wate eġa ita nelagħi. Lamna aubaina sorodia 16 i etarei ma i viraġeni. Muriai Herod Judea i netawanei ma i nae au Caesarea da ita mae mara aburuna.

Herod iraġe

²⁰ Marina Herod amlona i ġaġi kaua Taia ma Sidon ravai awarii, lamna aubaina taui ana borui i nei da Herod maiteni wei i babaniei. Taui Herod ana taunola ġaġġaena Blastus, i taravaini da ita voagui. Taui rom i vibagi Herod maiteni. Aubaina ai lam Herod ana dobuei i nenei.

[‡] 12:4: Exo 12:1-27 [†] 12:17: Iesu ana tevera

²¹ Ma marana i ġetai da Herod maiteni ita viboru ma tauna ana vigulau garana i vigarei ma ana au anikiala i kiala ma awarii i babani.

²² Ma patara ana babani i nonori ma i logoi i pa, “Wei lamna god e bababani ma eġa rava!”

²³ Maratagogi BADA ana anela Herod i vipeuni au doa ma motamota orana i ani da i'rāġe, aubaina tauna rava ai voepaepa i vinuaiae i ma eġa rava ita riwei da BADA ita voepaepai.

²⁴ Ma ekalesia BADA riwana i raraugugulei ma rava maġamaġaui i nenei BADA awarina ma ekalesia i rarata.

²⁵ Maranai Barnabas ma Saul ai nola au Jerusalem i vikwai, taui John-Mark i taravaini da maiteni i nei au Jerusalem.

13

Barnabas ma Saul i viaiaini ma i paritawanei

¹ Kerisiana au Antiok au orai peroveta ma taugiu wavai wenanare, Barnabas, Simeon (e ġoreġorei Gawara), Lusias Sairiniei, Manaen (Tauna gulau Herod Antipas maiteni i rata tagogi), ma Saul.

² Mara tagogi maranai taui i ujiuji ma BADA i vovoepaepai ma Arua Vivivireina i riwa i pa, “Tau, Barnabas ma Saul a vinei, ona tereriei au nola aubaina.”

³ Anina ma uji ma pari au murina taui urai Barnabas ma Saul au tepai i terei ma God ruāġai i viaiaini ma i paritawanei.

Au Saipras

⁴ Ma Arua Vivivireina Barnabas ma Saul i paritawanei da i ġaira au Selusia ma kampa i amkuka damana au bonabona Saipras.

⁵ Ma au Salamis i ġota ma i nae mai Jew ai au boru numana ma God riwana i rauġugulei. John-Mark taui maiteni i nae da ai tauagu.

⁶⁻⁷ Taui bonabonana i kwaviviroi da au Paphos taon i ġeta. Weka Jew ei barabaravuna ma peroveta morumoruna i nebelei wavana Bariesu. Tauna bonabonana ana gavena Segius Paulus i vituranei, Segius Paulus rava nualaulaunana ma i ġoei da God ana babani ita nonori ma lamna aubaina Barnabas ma Saul i rauġorei.

⁸ Wate barabaravuna Bariesu (Greek ponanei lamna Elimas) Saul ma Barnabas i viġavie i gavena ana tumaġana ita viapoapoeni.

⁹ Saul wavana ġelauna Paul, Arua Vivivireina orana i oai ma barabaravuna matana i 'nana-tunutunui.

¹⁰ Ma i pa “Tam Satan natuna ma kaua aiai ma jijimani tauvi-apoapoenina! Tam morumoror kaukauam ma gwalagwalamerum. Ma amapo da BADA ana kaua ma voviravirai da moru.

¹¹ Ma marina BADA urana ina kovoġim da matam ina apoapoe mara aburuna ma eġa madeġa lalalaina ma inanai.” Maratagogi matana i vinawanawa ma i gimtona ma nare da were i voladaġa-nae da rava au urana ita vojjina.

¹² Maranai gavena i 'nanai aiwai i tupua ma i vitumaġana, aubaina tauna BADA ana viararamana i bana-kauei.

Paul God Riwana Aiaina i jimejimei au Antiok taon au Pisidia

¹³ Paul ana rava maiteni Paphos i voterei ma i amkuka damana au Perga taon au Pamphilia provins, Ma weka John-Mark taui i voterei ma i naeme au Jerusalem.

¹⁴ Perga i voterei ma i rui da au Antiok taon au Pisidia provins. Ma au Sabate i rui au boru-numana ma i kiala.

¹⁵ Ma rava ġelaui, Moses ana tarawatu bukana ma peroveta ġelaui ai buka i 'avi, ma babada riwa i paritawanei Paul ma Barnabas awari i pa, "Varevareiu! Mepa da awarimi nota aiwai da ota voaguiai lamna marina ona ġei da ona babaniei."

¹⁶ Paul i vomairi ma urana i voepai da rava i genuana ma babani i vikarei i pa:

Mai Israel ma taumi eġa mai Jew ai God tauviborumeina, ona rautaniġaneu!

¹⁷ Mai Israel ai God noinoita i vinei, ma i vimaurai ai au mae au Egypt, ma ana rewapano ġaeġaenei dobunei i taravaina-opunei.

¹⁸ Madęga 40 au mutulua ami kaua apoapoei ami beura ma ami gunura anatapui am-iauei.

¹⁹ Dam ġaeġaei 7 i vipupui au Canaan ma dobuna mai Israel i verei da i viġariana-nonoei.

²⁰* Wei anatapuna madęga 450 au orana i tupua. Wei au murina God taurauetara[†] i terei da taui i vibadei da peroveta Samuel ana mara.

²¹ Anina ma rava God i vibagħi da gulau ita verei. Ma God Saul, Kish natuna Benjamin ana damei i terei; ai gulau da madęga 40 i kwa.

²² § Ma God Saul i tere-opunei ma David i terei ai gulau. Ma wenanare i riwa i pa, "Tau a aramanei da David, Jesse natuna orau ana rauoġara, ma au ġoana anatapuna ina kaei."

²³ Muriai me God i parivainuāġani nanare, Mai Israel ai Tauvilawana, Iesu David ana damei i nei.

²⁴ * Muriai da Iesu ita nei, John mai Israel anatapui awari i jima da ai ġo'apoapoe ina voterei ma ina mae-tavirei God awarina ma ina babataito.

²⁵ * Ma John ana nola au damona i riwa, "Taumi o notanotai da tau Tauvilawana bo? Eġa! Tau eġa tauna. Wate ona rautaniġana, rava au muriu e nenei tauna i ġetelara, tau eġa tagotagogina da ana ae uma ġuravana ana rupeni."

²⁶ Varevareu - Abraham natunatuna ma taumi Jentail God tauviborumeina, God tauta awarita, kwakokwakoi vilawananai riwana i paritawanei!

²⁷ Mai Jerusalem ai babada maiteni God ana Tauvilawana i vinuainei, ma lamnei Iesu i kovoġi, Peroveta wei lamna i jimejimei au Sabate marana patapatana.

²⁸ * Taui eġa ana apoapoeni aiwai ita nelagħi da Iesu ita viraġeni, wate Pilate i vibagħi da ita viraġeni.

²⁹ * Maranai rava ai babada maiteni, ai nuabola Iesu awarina

* **13:17:** Exo 1:7 * **13:18:** Num 14:34 * **13:19:** Deu 7:1 * **13:20:** (a) Jdg 2:16; (b) 1Sa 3:20

[†] **13:20:** Wei ravai lamna ai għavia babadaj ma ai tauravena ma taurauetara Judge. [‡] **13:21:** (a)

1Sa 8:5; (b) 1Sa 10:21 § **13:22:** (a) 1Sa 13:14; (b) 1Sa 16:12 * **13:24:** Mrk 1:4 * **13:25:** Mrk 1:7 * **13:28:** Mrk 15:13-14 * **13:29:** Mrk 15:42-47

i kauana-paiei me peroveta i ririwei nanare, ma tupuana au korosi i terēgairei ma au guba i vimataveni.

³⁰ Wate God Iesu irāgelei i vovaimairini.

³¹ *Ma au pom mağamağau Iesu taui maiteni au Galili da i ȣegae au Jerusalem awari i ega. Wei ravai marina e vivimatamata rava awarii.

³² Marina tauai Riwana Aiaina a paripariveremi. Wei parivainuağanana wariağna noinoita awari i kaei.

³³ Ma God nanare i kaei tauta eda muri aubaita, da Iesu irāgelei i vovaimairini, au Psalm viruaina wenanare I girumi,

Tam natu.

Amadodo Tau a viamanem. (Psalm 2:7)

³⁴ God Iesu irāgelei i vovaimairini da ega tupuana ina buda. Me i girugirumi nanare i pa,

Au viaiaina vivivireina David a parivainuağani tam ana verem. (Isaiah 55:3)

³⁵ Psalm ġelauna wenanare i girumi,

A 'ramanei da Tam am Messiah-Tauvilawana tupuana ega au kokoağaa ma voterei da ina buda. (Psalm 16:10)

³⁶ Maranai David i mamae ma God ana nola i kaei ma i'rağe, ma amamana maiteni i doboi ma tupuana i buda.

³⁷ Wate God Iesu irāgelei i vovaimairini ma tupuana ega ita buda.

³⁸⁻³⁹ Lamna aubaina au rava, ona aramanei da Iesu awarinei God ami ġo'apoapoe ina nota-tawanei. Rava anatapui da Iesu e vivitumağanei, ai ġo'apoapoe e notanota-tawanei ma ai viturana e viviaiaini. Wei Moses ana tarawatu ega ita kaukauei.

⁴⁰ Ona paina-melemi da peroveta aiwai i ririwei ega awarimi ina tupua. Aubaina i riwa;

⁴¹ *Ona rautaniğana vivijiboğami, kaua ġaegħena ana kaei da Ona baei ma ona iraġel!*

Aubaina ami au lawana kaua ġaegħena ana kaei da taumi ona vitumağana-avei.

⁴² Paul ma Barnabas i opuopu ma rava i nei ma i vibağ-a-guratei da ita nememei au Sabate ġelauna da Tauvilawana ana kaua ita babanana-kauei.

⁴³ Boru i kwa da rava i vilamonei, mai Jew borui ma ġelaui marina ina bori i vaia da i vimai-jew, taui Paul ma Barnabas i votaġoi, ma i riwanaguratei da Iesu ana aguei ina mae jijina.

⁴⁴ Au Sabate ġelauna taon ravai anatapui i ġeta da Iesu riwana aiaina ita nonori.

⁴⁵ Maranai mai Jew wei patarana i 'nanai ma orai unura i oai ma Paul i vikaua-morumoruei ma i vitepaubaubai.

⁴⁶ Ma Paul ma Barnabas ana tepatorai i babani, "God riwana a jimei awarimi au naona, wate taumi wei riwana o geduaiei. Wei e viviatataiana da taumi lawana mamae-nonoana ega ota ġoegħoei. Lamna aubaina ana voteremi ma God riwana ana jimei Jentail awarii.

⁴⁷ BADA wenanare riwa bagibaginei i riwelai,

Tau a vinemi da lalalaina Jentail awarii,

da rava anatapui au dobu ona riwei menanare ai ġo'apoapoe a nota-tawanei ma a vilawani. (Isaiah 49:6)

48 Maranai Jentail wei riwana i nonori, taui i vinuaiai kaua ma BADA Riwana Aiaina i voepaepai, ma taui da God i vinei lawana mamae-nonoona ita vaia, i vitumağana.

49 Ma BADA Riwana Aiaina i vituai nai au paratana.

50 Wate mai Jew Jentail waivinei manemanei ma mai Jew ġelaui i egari da Paul ma Barnabas ai ġavia i vomairi ma dobunei i viaġaġana-opunei.

51 ✽ Anina ma taui aei pokauna i rauabuabui da ita viatataiei da BADA eġa ita vinuaiai awarii ma i nae au Ikoniam taon.

52 Wate Arua Vivivireina kerisiana voui au Antiok orai i oai ma i vinuaiai kaua.

14

Paul ma Barnabas i jima au Ikoniam.

1 Kauana tagogina i tupua au Ikoniam. Paul ma Barnabas i nae mai Jew ai au boru numana ma menanare i babaninei da mai Jew ma Jentail maġamaġau i vitumağana.

2 Wate mai Jew ġelaui eġa vivitumaġanai Jentail i kelari ma ai nota i barai da Paul ma Barnabas i gedulaie.

3 Avena ma Paul ma Barnabas kampa i mae guratana ma ana tepratorai BADA ana aguei i jimajima. Ma kaua babaii ma vivirewapanai maġamaġau i kaei. Wei i vimataira da ai jima lamna riwa kaua.

4 Taon i kai ġelaui mai Jew aubaii i mairi ma ġelaui Aposol aubaii i mairi.

5 Ma mai Jew ma Jentail ġelaui i vioga da Paul ma Barnabas ġaimeit ita viraurauei.

6 Wate taui riwana i vaia ma dobuna i ruba-tawanei ma i nae au taon ġaegħaei Listara ma Derbi au Laikonia provins ma taon au ririvai.

7 Ma weka Riwana Aiaina i jimana-naiei.

Rava i notai da Paul ma Barnabas god

8 Au Listara oroto aena ġokokokarana, alona manawanei gwaġagwaġana i vinatunei ma eġa ita babara dadana.

9 Kampa i kiala ma Paul i bababani i rarautaniġanei. Paul matana i tawanei ma i 'nanai da tauna i vitumağana da ita lawana

10 ma i garara awarina, "Aemei ma mairi!" Ma orotona aenei i mairi ma babara i vikarei.

11 Maranai patara i 'nanai Paul aiwai i kauai taui ava ai ponei i babani vivira, "god ruaġa i ġairai awarita me *rava."

12 Taui i riwa da Barnabas lamna mai Greek ai god Zeus† ma Paul i vitauvbabani aubaina i riwa da tauna Hermes.

13 Zeus ana pulo gabuna, taon au giana, Zeus ana pirisi patara maiteni bull ma berana ulaulai i neiai taon au metaetana da Apasol ita puloi.

14 Wate maranai Paul ma Barnabas wei riwana i nonori, taui ai gara i sikai ma i ruba-opu patara awarii ma i garara,

15 ✽ "Aiwai aubaina wei kauana o kaukauei? Tauai rava ota me taumi nanare! Tauai Riwa Aiaina a neneiai da nai kauai kwakwavi ona voterei

* 13:51: Mrk 6:11 * 14:11: Paul ma Barnabas Greek ponanei i bababani † 14:12: Zeus lamna mai Greek ai god ġaegħa. Rava ai vitumaġana da godna e vivilawani. Hermes lamna Zeus natuna ma tauna lana Tau-vinolanolana. Zeus ma god ġelaui aubaii. Rava i notai da Hermes lana e kauwei da rava e babana-kauwa ma ai babara e aiai. Wate nanarena e notanotai da tauna kauwa aiaina e vivitupui ma e kauwei da rava e vivinatuna kauwa. ✽ 14:15: Exo 20:11

ma ona nae BADA lawalawaina ona viborumei. Tauna mara ma dobu ma boga ma aiwai anatapuna au orai i kaei.

¹⁶ Wariaga tauna rava i voterei da ai goanei i mae.

¹⁷ Wate marana patapatai e viviatataiemi da tauna e mamae ma ana nuavaina e verevereta, garewa marei ma maura ma lam e vereverem i ma au orami nuaiae oaoai."

¹⁸ Apasol i bababani ma i kauana-guratei da ravai ita vigaei da taui avena ita puloi.

Mai Listara Paul gaimei i virauraei.

¹⁹ Mai Jew gelaui Antiok ei ma Ikoniam i nei ma patarana i egari da Paul gaimei i virauraei ma taonei i taina-opunei, i notai da tauna irage.

²⁰ Wate maranai vivitumaaganai i geta da i mae-kwaviviroi, tauna i vomairi ma i naeme au taon.

Aupom gelauna tauna ma Barnabas i nae au Derbi.

²¹ Paul ma Barnabas Riwana Aiaina i jimei au Derbi ma ekalesia voui maagmaagai i rui. Ma i nae me au Listara, Ikoniam ma Antiok.

²² Metauna au dobuna i jimajima kampa tauvitumaagna i ririwanaguratei ma i vovai-virewapani da ina mairi-jijina ai au tumaagna i pa, "Piripiri maagmaagai au orana ona rui wate au murina God ana au vibadana ona rui."

²³ Paul ma Barnabas ekalesia nununai ai babada i vinei ma i raupari ma i uji BADA awarina, da ai ekalesia ma ai babada ina paini.

²⁴ Anina ma au Pisidia provins i verautua da i nae me au Pamphilia provins.

²⁵ Au Perga BADA riwana i jimei ma i gaira au Atalia.

²⁶ Ma kampa i amkuka ma i nae me au Antiok au Syria provins, weka ai nola i vikarei, maranai ekalesia kampa God i vibaagni da taui ita viaiaini ai au nola ma i paritawanei ma marina ai nola e vivikwai.

²⁷ Ma kampa i geta ma ekalesia i vitagogiei, ma aiwai anatapuna God ana aguei i kaukauei rava i viegei, ma menanare Iesu metaeta i votawanei da Jentail maiteni Tauna i vitumaaganei.

²⁸ Ma kampa tauvitumaagna maiteni i mae guratana.

15

Boru au Jerusalem

¹ Wate nelara gelaui Judeaei i gairai au Antiok ma ekalesia i viararamani i pa, "Mepa da ega inibori ona vaia Moses ana tarawatu e ririwei nanare, God taumi ega ina vilawanimi."

² Ma karuwaagawaaga gaegeena i bauni Paul ma Barnabas maiteni. Ma taui Paul, Barnabas ma rava gelaui i vinei da i gae au Jerusalem da Apasol ma babada ita inanai wei babanina aubaina.

³ Ma i paritawanei au Jerusalem, Ma ai au vagai ekalesia au Phonisnia ma Samaria provins i pariverei menanare Jentail i mae-tavirei God awarina. Ma taui i vinuiaiai kaua maraina wei i nonori.

⁴ Maranai i geta au Jerusalem, ekalesia ma Apasol i nei da i nebelei. Taui i pariverei menanare kaua anatapui God ana aguei i tupua.

⁵ Wate ekalesia gelaui mai Pharisi, i vomairi ma i babani guratana i pa, "Jentail anina da inibori ina vaia ma ona egari da Moses ana tarawatu ina voteletelei."

6 Apasol ma babada i viboru da wei babanina i okei.

7 [◊]Ma i vitarapiri guratana ma Peter i vomairi ma taui i riwei i pa, "Au rava! O aramanei da au orata God i vineu da Riwana Aiaina ana jimeī Jentail awarii da taui ina nonori ma ina vitumaḡana.

8 [◊]God rava anatapui ai nota e araramanei, ma Jentail Aruana Vi-vivireina i verei me tauta nanare. Wei matairana i viatataieta da God i vianina.

9 Tauna Jentail ma tauta e vaivainita da tagogina, ma ata vitumaḡanei orata i viaiaiani.

10 Marina aiwai aubaina God o viviamlo-ḡaiḡaini? Tauta amamata maiteni eġa tata virewapana da tarawatu tata vojijina-kauei. Wate marina wei vitana Jentail ta verevere-damanei.

11 Eġateni! Tauta anataputa ta vivitumaḡana da BADA Iesu ana aguei tana lawana, ma nanare Jentail maiteni."

12 Rava anatapui i genuana ma Barnabas ma Paul i rautaniḡanei, taui i bababani menanare ana au vaġai God ana aguei kaua aniba ma vivirewapanai i kauei Jentail awarii.

13 Maranai i babani vorovei, James* babani i vikarei, "Au rava ona rautaniḡaneu.

14 Peter †au naona i pariveremi menanare God Jentail i raugenari ma ġelau i vinei da tauna ġarinei.

15 Ma Peroveta nununai wei kauai i bababaniei marina nanare e tuputupua:

¹⁶ *Wei au murina ana nememei,
ma David ana numā gara ana voa-melei.*

*Ana vituramairini
ma ana kauei da ina virewapana me.*[‡]

¹⁷ *Da rava mamae-terenai*

BADA ina baiei,

Wate Jentail a raugorei da ġariuei, BADAi riwa.

(Amos 9:11-12)

¹⁸ *Wariaġa da marina wei ta aramanei.*

19-21 [◊]Lamna au baina eġa tana kauei da ina piripiri Jentail aubaii, taui e mamae-tavirei God awarina. Wate pepa tana girumi ma tana egari da lam e pulopuloei god morumorui awarii eġa ina ani, eġa ina viawawana labalababa, ġamoġamo uai e kikiki eġa ina ani ma sia ana tarana eġa ina ani. Aubaina wariaġa da marina Moses ana tarawatu e raugugulei boru au numai Sabatena patapatatana."

Pepa i girumi Jentail awarii

22 Ma Apasol, babada ma ekalesia anatapui rava ġelaui i vinei ma i paritawanei au Antiok au Syria provins Paul ma Barnabas maiteni. Taui ai babada ruāga i vinei wawai Judas wavana ġelauna Barsbas ma Sailas.

²³ Ma wei pepana au urai i terei,

Aposol, ekalesia babadai, varevareimi.

Jentail ekalesia au Antiok, Syria provins ma Silisia provins. Varevareiāi, egualau!

* **15:7:** Act 10:1-43 [◊] **15:8:** Act 10:44; 2:4 * **15:13:** Iesu ana tevera † **15:14:** Peter wavana ġelauna Simon. [‡] **15:16:** Maranai God David ana numagara e bababaniei lamna David ana vibadana vouna e ririwei ma eġa ana epaepaia. [◊] **15:19-21:** Lev 18:6-23; Lev 17:10-16

²⁴ Tauai riwana a vaia da rava ġelaui ai au boru i ġairai ma ai viararamani i vinuabolaimi ma i visina-viraviraimi, wate tauai nai ravai ega ata paritawanei.

²⁵ Lamna aubaina tauai a viboru ma a vianina da taupariverena ata paritawaneiai, ata rava Paul ma Barnabas maiteni,

²⁶ taui i verena-melei ma ai lawana ega ita vinuabolei BADA Iesu Keriso wavana aubaina.

²⁷ Judas ma Sailas a pariparitawanei da taui gamoiei ina riwemi aiwai tauai a girumi.

²⁸ Arua Vivivireina ma tauai ai ġoana da ega vita ġaeġaena ana veremi, anina wei tarawatuna ava.

²⁹ Lam god morumorui i puloi ega ona ani,

Ega tara ona umai, Ega ġamōġamo uana kikikina vioana ana tarana ona ani.

Ega ona viawawana labalababa,[§]

Mepa da wei tarawatui ona vojjina-kauei, taumi kaua aiaina o kaukauei.

Egualau kaua.*

³⁰ Ma nelarai i paritawanei da i ġaira au Antiok, ma ekalesia i rieiae da pepa i verei.

³¹ Ma taui i 'avi ma i vinuajai kaua pariverena aiaina aubaina.

³² Judas ma Sailas taui God ana peroveta ma i babani guratana awarii ma wei taui i vinuajiae ma ai tumaġana i vovai-virewapani.

³³ Ma kampa i mae mara aburuna ma ekalesia ana nuaubai i paritawana-melei au Jerusalem.

³⁴ †

³⁵ Wate Paul ma Barnabas au Antiok i mae, ma taui maiteni BADA Riwana Aiaina i viararamani ma i raugugulei.

Paul ma Barnabas i vilamonei

³⁶ Ma muriae Paul, Barnabas i riwei, "Tana nae dobu au anatapuna mepa BADA Riwana Aiaina ta raugugulei ma ekalesia tana raugenari, ma tana inanai taui anina bo ega."

³⁷ Barnabas i ġoei da John-Mark ita taravaini.

³⁸ *Wate Paul wei notana ega ita ġoei aubaina au naona John taui au Pamphilia i ruba-tawanei ma ega ita mae da maiteni ita nola.

³⁹ Ai vipariparinigai i apoapoe guratana da taui i vilamonei. Barnabas, Mark i taravaini ma kukei i damana au au Saipras.

⁴⁰ Paul, Sailas i vinei. Ma ekalesia, BADA i vibagai da ana aguei taui ai au nola ina paini.

⁴¹ Taui Syria da Silisia i naeni ma ekalesia i raugenari ma i vinua-terenei.

16

Timothy Paul ma Barnabas maiteni i nae

§ **15:29:** Viawawana labalababa ġelaui wei: Rava ġelaui awawai maiteni e viawawana. (Exo 20:14, Deu 5:18) Mane aubaina e viawawana (Lev 19:19, 1 Cor 6:15) Am femili ravai o viviawawanei (Lev 18:22, Rom 1:26-27) Ġamōġamo e viviawawanei (Lev 18:23) Rava ega uta ravaġi ma e viviawawanei (Eph 5:3) Rava u egari da u viawawanei. (Gen 34:7, Deu 22:25-28) * **15:29:** Kaua ġaeġaena lamna ega ini bori ma Iesu ana aguei, u korosi i take aubaita. † **15:34:** Buka waduwaduboi au orai vs 34 ega ita mamae "Wate Sailas i ġoei da kampa ita mae." * **15:38:** Act 13:13

¹ Paul i nae au Derbi da au Listara, kampa tauvotaḡotaḡo i mae wavana Timothy. Tauna alona Jew ei ma kerisiana, Wate amana Jentail.

² Ekalesia au Listara ma Ikoniam Timothy i voepaepana-kaeui.

³ Paul i ġoei da tauna ita taravaini ana au vaġai, lamna aubaina ini bori i verei aubaina mai Jew kampa i aramanei da tauna amana Jentail.

⁴ Maranai taon nununai i nenaeni, ma ekalesia kampa i paripari-verei Apasol ma babada au Jerusalem ai nota, ma i riwei da tarawatu i ririwei ina votaḡotaḡoi.

⁵ Ma ekalesia ai vitumaġana i vovai-virewapanai ma tauvitumaġana voui i ruirui marana patapatai.

Paul ana rauboni

⁶ Arua Vivivireina Paul ana rava maiteni i viġaei da eġa BADA riwana ita jimei au Eisia provins, ma Pirijja ma Galatia paratana i naeni.

⁷ Maranai i nei Maisia ana au provins ma i ġoei da ita damana au Bithinia provins. Wate Iesu Aruana eġa ita vianinei.

⁸ Ma Maisia i verautuini da i nae au Troas.

⁹ Waguvvaraina Paul ana au inana i 'nanai oroto Macedonie i maimairi ma i vivibaġai i pa, "Ma damanai au Masedonia da ma voaguiai!"

¹⁰ Paul ana rauboni au murina tauai a vioga da laġilägħina ana vomairi Masedonia provins aubaina. Tauai a vitumaġana da God i ġorelai da Riwana Aiaina kampa ana jimei.

Paul i nae au Philipai

¹¹ Au Troas tauai amkuka, a viaruana damana au Samotreis bonabonana a ġeta ma au pom ġela a kuka-nae au Neapolis.

¹² Ma kampa da a babara nae au Philipai taon au Masedonia provins, weka mai Rome ai sorodia ai bareki ġaegħena i mae, kampa a veraumae.

¹³ Ma au Sabate taon a opu-tawanei ma a nae au waira, a notanotai da kampa boru gabuna wate eġa. A kiala ma waivine ruāga ota kampa i rauriei awari a babani.

¹⁴ Taurautaniġana tagogi lamna Jentail wavinena wavana Lidia ma ana dobu Thaialira. Tauna gara lebalebarina maiana ġaegħena taugimareina ma God i vitumaġħanei, ma God orana i votawanei da aiwai Paul i bababanie i rautaniġanana kaeui.

¹⁵ Maranai wavine ana numa ravai i babataito ma i rauġorelai i pa, "Ona nei au numa mepa da o notanotai da tau kerisiana ririwa kauana." Ma i egariai da ana au numa a mae.

Paul ma Sails au panipani numana au Philipai

¹⁶ Mara tagogi a nenaeborau au gabuna ma taunola guguini a nebelei, Tauna au orana arua apoapoena i mae ma lamnei aiwai amapo da ina tupua i vivieġai. Ma mane ġaegħena i kaukauei ana taniwaga aubaina.

¹⁷ Tauna Paul ma tauai i votaḡotaḡoiai ma i garagarara "Wei nelarai God ġeġetelarana ana taunola! E vivinolanola menanare God e vilawanansei."

¹⁸ Wei kauana i kaeui au pom biaġa da Paul i viamlo-ġaiġaini da i mae-tavrei ma arua apoapoena i riwei, "Iesu Keriso wavanei a egaegarim da wavine ma opu-tawanei!" Maratagogi arua apoapoena wavine i opu-tawanei.

¹⁹ Maranai taunola guguini ana taniwaga i aramanei da ai mane etanaina i vine-boai, taui Paul ma Sailas i vojijini ma i taina naiei au deba Gabemani awarii.

²⁰ Taui i nei ai taurauetara awarina ma i riwa, “Wei nelarai mai Jew wei dobuna ravai e vivinuarağarağai.

²¹ Taui ata rava kaua ġelaui e viviararamani ma wei ata giu e teretereğairei.”

²² Ma patara i rui Paul ma Sailas vunuai aubaina. Ma gabemani Paul ma Sailas, ai gara i sikai ma wipie i kwapui.

²³ I vunu-kauei ma i tawana-ruei au panipani numana. Ma numana badana i egari da ita paina-kauei da eğä ita ruba.

²⁴ Anina ma Panipani badana taui i tawana-ruei, panipani numana au orana ma aei, ai vivitainei au orana i rağita-jijini.

²⁵ Nubautuvai Paul ma Sailas i raraupari ma i welawela God awarina ma panipani ġelaui i rareautanigana.

²⁶ Nanare ma lolo ġaegaeotana dobuna i gui. Ma maratagogi pani numana metaetana i wana-tawatawananei ma panipani anatapui ai sein i dabarara.

²⁷ Pani numana badana i vomairi ma ita inanai da metaeta wanatawanana ma i notai da panipani i ruba ma lamna aubaina ana sod i lavui da ita virağena-melei.

²⁸ Wate Paul i garara, “Eğä ma vunu-melem! Tauai anatapuai weka!”

²⁹ Pani numana badana ana taunola i ġorei da lalalaina ita neiae ma i ruba-rui ma ana sisisisina i mae-peu Paul ma Sailas au naoi.

³⁰ Ma i opunei au doa ma i paridadanei, “Babada aiwai ana kuae da ana lawana?”

³¹ Taui i paribelei, “BADA Iesu Keriso ma vitumağanei ma ma lawana, am numa ravai maiteni.”

³² Ma God riwana i raugugulei tauna ma ana numa ravai awari.

³³ Nai maranaina avena da waguvvarai, pani numana badana Paul ma Sailas i naiei ma keroi i oğai, Ma maratagogi tauna, ana numa ravai maiteni i babataito.

³⁴ Paul ma Sailas i ġaiei ana au numa da i viambagibagi. Tauna ana numa ravai maiteni i vinuaiai kaua da marina God i vitumağanei.

³⁵ Ma marana i tom ma tauetara ana taunola* i paritawanei pani numana badana awarina ma i egari i pa, “Nelara ma voterei da ina nae.”

³⁶ Pani numana badana Paul i riwei, “Taurauetara i egariu da ana voteremi da ona nae. Marina ana nuaubami ona nae.”

³⁷ Wate Paul, taurauetara i riwei, “Tauai eğä ita rauetarelai ma i vunu-kuelai pattrata au matai. Ma avena da tauai mai †Rome, wate marina i ġoei da govagovağanei ina paritawanelai bo? Eğateni kaua! Ona voterei da taurauetara ina nei weka da ina naielai.”

³⁸ Taui wei babanina i naiana-melei da babada i riwei ma taui i rovo kaukaua maranai riwana i nonori da Paul ma Sailas lamna mai Rome.

³⁹ Ma i nei au pani numana ma i riwa, “Tauai a kauana-boai, ai ġo'apoapoe ona nota-tawanei.” Ma i tere-opunei ma i vibağ-a-guratei da dobuna ita oputawanei.

* **16:35:** vs. 20 ma inana. † **16:37:** Mai Rome ai tarawatu lamna, “Eğä rava Romei ma kwapu labalababai bo ma pani da au naona ma rauetarei.” Rome Israel i vibadei Iesu ana au mara.

⁴⁰ Ma Paul ma Sailas pani numana i opu-tawanei ma i nae Lidia ana au numa ma kampa kerisiana maiteni i viboruboru ma i vovai-virewapani. Anina ma taui dobuna i netawanei.

17

Au Thesalonika

¹ Paul ma Sailas Amphipolis taon ma Apolonia taon i voterei da i nae au Thesalonika taon. Weka mai Jew ai boru numana i mamae.

² Ma i rui au boru numana au Sabate me mara patapatai i kaukuae nanare, kampa Sabate tonuāga rava awari God riwana i viararamani.

³ Ma God riwanei i viararamana da Keriso ina vinuapoapoe ma irāgelei ina vomairi me, "Wei ravana a bababaniei awarimi, tauna Iesu Keriso."

⁴ Mai Jew ġelaui orai i taini ma taui i votaġotaġoi. Ma nanare Jentail nelara maġamaġagaui God taurauduneleina ma waivine wawai naenaei maġamaġau.

⁵ Wate mai Jew i unura ma rava ora-potapotai maġamaġau i etanai i tami ma au taon vikaruwaġawaġa i vikarei. Ma oroto wavana Jason ana numa i ruini Paul ma Sailas i baibaei da ita opunei patara awari.

⁶ Wate maranai eġa ita nelaġai taui Jason ma kerisiana ġelaui i taina-naiei taon babadai awari, ma i garara, "Wei ravai dobu au anatapuna apoapoe maġamaġau i kaei, marina i ġetai ata au dobu."

⁷ Ma Jason, Paul ma Sailas i taravaini ana au numa. Taui Caesar ana tarawatu e viviaigai ma e ririwa da gulau ġelauna e mamae wavana Iesu.

⁸ Maranai patara ma taon babadai wei babanina i nonori taui amlo i ġaġai kaua,

⁹ ma Jason i egari da mane ġaeġaena i vimaiei da eġa mae boaboa ġelauna ina vitupui. Ma taui Jason i voterei da i nae.

Au Berea

¹⁰ Ma waguvvarai tauvitumaġana Paul ma Sailas i paritawanei au Berea. Maranai kampa i ġeta, ma i rui au boru numana.

¹¹ Mai Berea i viaiai, eġa me mai Thesalonika. Taui i rautaniġana ma i votelatela ma marana patapatana God ana buka i 'aiavi da ita aramanei da Paul aiwai i bababaniei lamna riwa kaua.

¹² Ma lamnei mai Jew maġamaġau i vitumaġana, ma nanare mai Greek waivinei wawai naenaei ma nelara.

¹³ Maranai mai Jew au Thesalonika paratana i nonori da Paul God riwana i raraugugulei au Berea, taui maiteni i nae kampa, ma rava i rauegari da ġavia ita vikarei.

¹⁴ Maratagogi kerisiana Paul i paritawanei au gera wate Sailas ma Timothy au Berea provins i mae.

¹⁵ Ma nelara Paul i tauvigwanigwanie da au Athens, ma Paul nelarai i riwei ma i paritawanei au Berea da Sailas ma Timothy ita riwei da lagilagħina ita nei awarina.

Paul au Athens i raugugula

¹⁶ Ma Paul au Athens ana rava i paipaini, ma i 'nanai da kampa kokoitau i maġa kaua ma i vinuabola kaua.

¹⁷ Mai Jew ma mai Greek God tauviborumeina awari i jima guratana au pari numana ma nanare au deba, aiai da i ġeta ma i rautaniġana.

¹⁸ Ma rava ġelaui nuaulaulai i ġetai ma maiteni i vitarapiri, taui e ġoreġorei mai Epicure ma mai Stoic*, taui lawana ai kaua tauviararamanai. Ma ai rava ġelaui i paridadana, "Wei ravana aiwai e voġavoganei?" Ġelaui i riwa, "Mepa da tauna dobu ġelaui ai god e bababaniei." Taui wenanare i babani aubaina Paul Iesu Riwana Aiaina ma ana iraġe ma ana vomairi me, i raugugulei.

¹⁹ Ma i taravaini ma i naiei ai au boru e ġoreġorei Areopagus ma i riwei, "Ma nei ma a ġoei da am viararamanana vouna e bababaniei, ata aramanei.

²⁰ Kaua ġelaui e babaniei tauai a vivinuanainei, ma a ġoei da ana aramanei anona aiwai?"

²¹ (Taumana ma mai Athens marana patapatai ai nola eġa aiwai, da kaua voui ina virarautuei ma ina nononori.)

²² Ma Paul babadai au naoi i mairi ma i riwa:

Dogadogara mai Athens! A inana da taumi vipatupatutumi ami god awarii,

²³ A bababara ma ami pulo aniapunana a inainanai, ma tagogi a inanai au tepana i giruma, "Wei God eġa ata araramaneia aubaina." Wei Godna o viviborumei wate eġa ota aramanei. Tau ana riwemi nai Godna aiai.

²⁴ *Tauna God mara ma dobu ma aiwai anatapuna au orana i kauei. Ma tauna mara ma dobu badana, ma numa rava uranei e voavoai au orana eġa ita mamae.

²⁵ Ma eġa rava ai agu ita paipaini, tauna agu eġa ita ġoegoei. Aubaina tauna rava lawana ma lavutu ma anatapuna e vereverei.

²⁶ Au karena rava tagogi i kauei ma nai ravanei dam patarai i vitupua ma dobu i maeni. Tauna ainelana rava ai mara i terei da ina mae ma ina iraġe ma animae paratana i aiterei.

²⁷ God wenanare i kauei da rava tauna ina baiei da mepa ina nelaġai. Wate tauna au ġereġereta, eġa au uama.

²⁸ Taugiruma ġelauna Greeki i riwai pa, "Taunei ta mamae ma ta bababara ma anatapuna ta kaukauei."[†] Ma wate ami taugiruma ġelauna i girumi i pa, "Tauai nanare tauna natunatuna."[‡]

²⁹ Ma tauta God natunatuna, eġa tana notai da God lamna me kokoitau, goldei bo silvei i kauei. Rava uraiei ma ana nuaulaulaei i kauei.

³⁰ Wariaġa rava God eġa ita aramanei wate God taui i 'nana-tawanei, wate marina anataputa egaegarita da tana rupena ma tana mae-tavireta awarina.

³¹ Aubaina mara i vinei maranai rava anatapui aiainei ma jijimninei ina kovoġi. Rava i vinei da taunei ina kovoġa. God wei ravana iraġelei i vovaimairini lamna ina vimataira rava awari da ravana ənina tauna.

³² Maranai Paul iraġelei vomairina i babaniei, rava i nonori ma ġelaui tauna i vinamei wate ġelaui i riwa, "Tauai a ġoei da muriai wei babanina ma babaniana-melei."

³³ Ma Paul ai boru i opu-tawanei ma boru i gudu.

* **17:18:** Mai Epicure rava wavana Epicurus ana viararamana i votaġotagoi. I viararamana da lawana ana ano lamna nuaiaii. Da taui aiwai da tupuai ma matai ana rauoġara, e vivinuaiae. Ma aiwai da e virovorovoi bo iniviara e vereverei. Taui wei lamna e ġedugueduaiei. Taui e ririwa da God rava eġa ita vinuvainei Stoic rava wavana Zeno ana viararamana e votaġotagoi. I viararamana da rava ma ai maiteni au ririvata ta mamae (nature) ita vivrei, Taui ai ġoana ma ai erawa ita teretawanei ma ita vinuanotanota kaua ma avena rava ġelaui ai agu ita raunenelei. Taui e ririwa, "Nuaiaii lamna kaua e vovoterei da mena ina tupua nei nanare ina tupua." † **17:24:** 1Ki 8:27; Act 7:48 ‡ **17:28:** Epimenides Ciritei au 6 century BC. ‡ **17:28:** Aratus Silisiei 3 century BC.

34 Wate ġelaui i vitumaġana ma Paul i votaġoġtaġoi. Tagogi lamna Dionisius, Areopagus boruna au orana, ma wavine wavana Damaris, ma rava ġelaui.

18

Paul i nae au Corinth da rava awari Iesu ita jimei

¹ Paul Athens i netawanei ma i nae au Corinth.

² Kampa Akwila tauna Jew au Pontus i tupua, marinaota au Italy* da i nei awana Prisila maiteni. Aubaina Rome ai gulau Claudius mai Jew anatapui i viāgāgei da Rome i opu-tawanei. Paul i nae da taui ita inanai.

³ Paul taui maiteni i mae, taui tauampopo, (ġamoġamo opina ma gara i popopoi numa aubaina ma i gimajimarei) me Paul ai nola tagogina.

⁴ Sabate patapatana au pari numana tauna mai Jew ma Jentail awari i jima guratana da orai ita sinavirai.

⁵ Maranai Sailas ma Timothy au Masedonia da i ġetai, Marina Paul BADA riwana ava i raugugulei mai Jew awarii da Iesu tauna anina God ana Vinevine Keriso.

⁶ Wate mai Jew Paul i viġavie i ma riwa apoapoenei i ririwei. Ma tauna ana gara i rauabuabui ma awari i riwa, “Mepa da o kwako, lamna ona viwavu-melemi, eġa tau ona viwavui! Marina da e nena, ana nae Jentail awari.”

⁷ Ma taui i voterei ma i nae Jentail wavana Titus Justus ana au numa i mae, tauna God tauviborumeina ma ana numa pari numana au ġereġerena.

⁸ Crispus, pari numana ai bada, BADA i vitumaġanei ana numa ravai maiteni, ma mai Corinth maġamaġaui Paul i rautaniġanei, i vitumaġana ma i babataito.

⁹ Waguvvara tagogi BADA Paul ana au inana i babani i pa, “Eġa ma rovo, ma babani ma eġa ma genuana.”

¹⁰ Aubaina Tau tam maiteni. Ma rava eġa ina rau-iviapoapoem aubaina au tauvotaġoġi i maġa wei au dobuna.

¹¹ Ma Paul kampa i mae madeġa tagogi ma nawaravi six, ma God riwana i jimei.

¹² Wate maranai Galio i vi-Gavena au Akaia provins, mai Jew kampa i vitagogiei ma Paul i vojijini ma i nae Gavena awarina da ita rauetarei.

¹³ Ma taui i viwavui 'pa, “Wei orotona ana moruei rava orai e taitaini da God e viviborumei ma ata tarawatu e viviaigai.”†

¹⁴ Ma Paul gamona i laġi da ita babani ma Galio i babani mai Jew awari i pa, “Mepa da taumi wei ravana o viviwavui da kaua ġaegħaei bo kaua apoapoe aubaina, lamna tau au nola da ata rau-taniġanemi.

¹⁵ Wate wei taumi ami babani ami wava ma ami tarawatu, ana voterei au urami. Tau eġa wei kauai ana rauetarei.”

¹⁶ Ma etara numanei i viāgāgħana-opunei.

* **18:2:** *Rome taon lamna taon ġaegħaena au Italy ma ai kapital AD. 49 au orana kampa viġaġġaiawa ġaegħaena da wavalatona Claudius mai Jew i rīwei da dobuna i netawanei.* † **18:13:** Mai Jew e ririwa da Paul eġa taui ai vitumaġana oina ita viararamani ma wei Rome ai tarawatu i vianinei, wate e ririwa da Paul rava taparoro vouna e viararamani ma wei Rome ana tarawatu e viviaigai, lamna aubaina taui i ġoġi da Rome ai bada Paul ina kovoġi. Ma inanai Act 16:20-21 ma 17:7.

¹⁷ Taui anatapui pari numana ai bada Sothenis i vojjini ma i vunuui etara numana au naona wate Galio taui i 'nana-tawanei.

Paul i nae me au Antiok au Syria

¹⁸ Paul i mae mara aburuna tauvitumağana maiteni au Corinth ma wagei i nae au ġereġere au Cenkirej waga ai au animae. Prisila ma Akwila maiteni. Ma kampa Paul ana parivainuağana aubaina aparana i ġari, ma anatapui i nae au Syria

¹⁹ Taui au Ephesus i ġeta ma Paul, Prisila ma Akwila i voterei. Ma i nae au boru numana Mai Jew awari i jima.

²⁰ Rava i vibaġai da ita mae mara aburuna wate tauna eġa ita vianina.

²¹ Wate maranai i opu da ita nae ma taui i riwei, "Ana nememei mepa da God ana ġoana, ma Ephesus i netawanei ma wagei i damana."

²² Maranai i ġeta au Caesarea ma i nae au Jerusalem da kerisiana i raugenari ma i nae au Antiok.

²³ Au Antiok i mae mara aburuna ma Galatia provins ma Pirijja provins i naeni ma kerisiana i vovai-virewapani.

Apolos mai Ephesus awari i raugugula

²⁴ Wei marana Apolos tauna Jew, au Alexandria da Egypt da i nei au Ephesus. Tauna BADA riwana ma ana giruma i aramana-kauei ma rava bababanina.

²⁵ Rava ġelaui, Apolos BADA ana etanai babanina, i viararamani, ma ana tepatorana i jima ma Iesu ana kaua ma ana lawana i viararamana-kauei. Wate tauna John Taubabataito ana babataito babani ava i aramanei.

²⁶ Ma i vikarei da ana tepatorana i raugugula au boru-numana. Wate maranai Prisila ma Akwila tauna ana babani i nonori. Ma i ġorei da maiteni i nae ai au numa ma BADA ana etanai ana babani i viaramana-kauei.

²⁷ Maranai Apolos i nenaue au Akaia, kerisiana Apolos i vovai-virewapani. Ma kerisiana au Akaia ai pepa i giruma da ita pariverei da tauna ita nebelei. Maranai au Akaia i ġeta ma taui God ana aguei i vivitumağana, agu ġaegħena i verei.

²⁸ Tauna ana babaniei au deba mai Jew i vovaiubai. Ma God riwana i vaia ma lamnei rava i viararamani da Iesu anina Keriso.

19

Paul au Ephesus

¹ Apolos au Corinth taon Akaia provins i mae, ma Paul ola i taġoni da au Ephesus i ġeta. Kerisiana ġelaui kampa

² ma i paridadanei i pa, "Arua vivivireina o vaia bo eġa maranai o babataito?"

Taui i paribelei i pa, "Eġa, Tauai eġa ata aramanei da Arua vivivireina e mamae."

³ Ma Paul i paridadana, "Aiwai babaitona o vaia?"

Taui i paribelana, "John ana babataito a vaia."

4 *Paul i riwa, “John ana babataito lamna mataira da taui ai ġo’apoapoelei i mae-tavirei; ma mai Israel i riwei da Tauna au muriu e nenei ona vitumaġanei lamna Iesu.”

5 Maranai wei i nonori ma i aramanei taui i babataito BADA Iesu wavanei.

6 Ma Paul urana au kolai i terei ma Arua vivivireina au orai i rui. Ma i vikarei da pona tapunei i bababani ma God riwana i raugugulei.

7 Taui nelara iavana twelve.

8 Paul i nae au boru-numana ma kampa nawaravi tonuġa au orana ana tepotorana mai Jew awarii i bababani. Da rava orai ita sinavirai da BADA ana vigulau ita vitumaġanei.

9 Wate ġelaui kampa orai i bagibagi ma eġa ita ġoei da ita vitumaġana, ma patara au matai Iesu ana etanai i vijibogħi. Ma Paul taui i voterei ma kerisiana i taravaini ma i nae Tairanus ana au numa, ma kampa i viararamana ma i giugiu pompom.

10 Ma nanare i mae madęga ruāga i kwa, da mai Jew ma Jentail ravai maġamaġau i Eisia provins maemaei BADA riwana i nonori.

Sceva natunatuna

11 Ma God ana rewapanei Paul kaua ġaēgħaei ma aniba i kaukauei,

12 lamna avena wate rava ai agesi da ai nola garai i naiei Paul awarina da i vodadani ma i naei da rava doridoriai i vodadani, ma arua apoapoei i opu-tawanei ma i lawana.

13 Mai Jew ġelaui dobuna i naeni ma arua apoapoei i viviaġana-opunei ma i raudadana Iesu wavanei da arua apoapoei i viviaġaġei. Taui arua apoapoei i riwei i pa, “Iesu wavanei, taunei Paul e raraugugula, Tau a egarim da ma opu.”

14 Skeva, pirisi ai bada natunatuna nelarai seven wei kauana i kaukauei.

15 Wate mara tagogi arua apoapoeni i paribelei, “Iesu a aramanei ma Paul a aramanei ma taumi aiavoi?”

16 Ma rava au orana arua apoapoeni maemaeña i auepai ma taui i vunui da eġa ita vikalokaloei. Ai gara i sika-naei ma ana kovakovai ma tararatai numei i viopuopuana ma i viruberubei.

17 Mai Jew ma Jentail ravai au Ephesus maemaei wei riwana i nonori ma rovo orai i ġaeni ma Iesu wavana i vivirana-kauei.

18 Maġamaġau i vitumaġana ma i nae kerisiana awarii ma ai ġo’apoapoei rupeni.

19 Tauvitumaġana voui maġamaġau i paraparaumai,* ai buka i vidamni au deba ma i apui. Maranai bukai ai maia i ‘avi da silver 50,000†.

20 Kaua babai me wei, Iesu riwana i vibabarai nai au dobuna ma rava maġamaġau i vitumaġana.

21 Wei anatapuna au murina Paul au orana i vinua-notanota da au Masedonia da Akaia ita verautuini da ita damana au Jerusalem ma i riwa, “Ana nae au Jerusalem ma muriai ana nae da Rome ana inanai.”

22 Ma Paul ana tauagu ruāga Timothy ma Erastus i aiparitawanei au Masedonia provins, ma tauna kampa i mae mara aburuna au Eisia provins.

Vigaiġaiawa au Ephesus

* 19:4: Mrk 1:4, 7-8 * 19:19: Au Deu 18:10-14 God ana rava e viviġaei da eġa ina parauma.

† 19:19: Dracma coin tagogi lamna tau-vobagibagi ana maia au pom tagogi aubaina. Marina lamna million biäga.

²³ Iesu ana babani ma ana kaua vouna aubaina, ma vīgaīgaiawa ġaeġaena i tupua au Ephesus.

²⁴ Silver taunoleina wavana Demetrius, mai Greek ai god wavinena ana numa taparoro kokoitaui i raraū-ġaroġaroei da i gimaginearei, ma wei nolana mane ġaeġaena e neineiai silver taunoleina nai au dobuna aubaii.

²⁵ Ma taui anatapui ai rava nolana tagogina e kaukuae maiteni i rauġoreiā ma i riwa, “Au rava, o aramanei da ata maura wei nolanei ta vaivaia.

²⁶ Ma o inanai ma o nonori menanare wei ravana Paul e kaukuae, Rava ai nota i sinavirai da maġamaġaui god Artemis raudunena i voterei au Ephesus ma dobu Eisia paratana anatapuna. Ma e ririwa da ‘rava god i rauġaroġaroei, lamna eġa god.’

²⁷ Tauta tana inana kaua da wavata ma ata mane ani kauana eġa ina apoapoe. Ma ata god ġetelarana Artemis ana numa taparoro ma wavana eġa ina vijibogħi, eġa au Eisia provins ava ma dobu au anatapuna.”

²⁸ Maranai patara wei babanina i nonori taui i meji kaua ma i vigaragarei, “Artemis mai Ephesus ai god i ġetelera!”

²⁹ Ma taui i garagarara rava nai au dobuna i nonori ma taui maiteni i garara labalababa. Anina ma patara Gaius ma Aristakas i vojjini taui ruāgai mai Masedonia Paul ana tauvigwanigwaniana, ma i rubana-naiei nai dobuna ana boru gabuna.‡

³⁰ Paul i ġoiei da patara au naoi ita rui da ita babani wate kerisiana eġa ita vianinei.

³¹ Wate nanare Paul ana rava ġelaui au gabemani tauna i viġaei da eġa ina nae au boru.

³² Patara i vinuanaina, i logologoi ma i garagarara labalababa ma eġa ita aramanei aiwai aubaina weka i nei.

³³ Mai Jew oroto tagogi i dudu-opunei au naoi wavana Alexander ma patara ġelaui i garara awarina da ita babani. Alexander urana i voepai da taui ita genuana ma tauna ana rava aubai ita babani.

³⁴ Wate maranai i aramanei da tauna Jew. Taui anatapui pona tagoginei wenanare i garagarara, “Tauta mai Ephesus ata god Artemis i ġetelera!” da hour ruāga i kwa.

³⁵ Ma taon badana patara i riwei da i genuana ma i riwa, “Au rava mai Ephesus, rava anatapui au dobu i aramanei da tauta tauvipaipai mai Ephesus ai god ġeġetelarana Artemis ana numa taparoro ma ana ġaima vivireina marei i peuai aubaina.

³⁶ Eġa aiai wei ina vikaua-moruei. Lamna aubaina orami ina rauei ma eġa aiwai apoapoena ona kaei.

³⁷ Wei ravai o neiae weka wate taui eġa au numa taparoro aiwai ita danenei bo ata god ita riwana-boei.

³⁸ Mepa da Demetrius ana rava maiteni e viviwavui taui ina nae ina rauetara ma ami viwawu ona naei kampa taurauetara awarina.

³⁹ Ma mepa da ami nuabola ġelaui e mamae lamna taon babadai ai au boru ona babaniei ma ona tere-jijimani.

‡ **19:29:** Dobuna ana boru gabuna lamna numa ġaeġaena. Eġa poewana, ma inanana me nawarav i gebona. Rava maġamaġaui 26,000, nanare ina kiala **meeting place**. Rava e nenae kampa da kalo tapuna ma e raraubiġa.

⁴⁰ Ma amadodo aiwai i tupua, tau a rovo da ina viwavuita mae-boaboa aubaina. Wei vikaruwağawağana anona eğä, ma mepa da Rome ina paridadana ma tauta menanare tana paribelananei.

⁴¹ Anina ma boru i guduī ma rava i vilamonei."

20

Paul i nae au Masedonia ma Greece

¹ Vikaruwağawağana au Ephesus taon i kwa ma au murina Paul kerisiana i raukwatueiai da i vinua-terenei, i viegualaei ma i netawanei da i nae au Masedonia provins.

² Ma dobuna ġaeğäenana i naeni ma kaua mağamağauí kerisiana i vinua-terenei. Anina ma au Akaiā* i ġeta.

³ Kampa nawaravi tonuğä i mae. Tauna i vokaukaua da ita nae au Syria ma wate i nelägai da mai Jew ġelauí virağenana i viviogatarei lamna aubaina da i nae me au Masedonia.

⁴ Nelara ġelauí i votağotağō taui lamna Piras natuna Sopater ana dobu Berea; Aristakas ma Sekundus, mai Thesalonika, ma Gaius tauna ana dobu Derbi; ma Tijikus ma Trophimus ai dobu Eisia provins; ma Timothy.

⁵ Taui wagei i ainae au Troas ma kampa i painiai.

⁶ Ma palawa bagibagina torelana au murina, wagei Philipai taon au Masedonia provins a netawanei. Ma aupom 5 au murina au Troas a ġeta ai rava awari, kampa aupom 7 a mae.

Au Troas, Paul Eutikus irağelei i vovaimairini

⁷ Wiki au karena - Sunday tauai a vitagogielai voepaepa ma BADA ana amgogona aubaina, ma kampa Paul i jima da nubautuva, aubaina maratomna da ita nae.

⁸ Numa vatavatara au tepana a vitagogielai, ma kampa rampa mağamağauí i ararata.

⁹ Orotu laragana wavana Eutikus au windo i kiakiala ma Paul i raraugugula, ma tauna matana i pota kaua da i raunuavuru, ma kampa au tepe dewadewana i peu-ğaira da au doa i rauie. Maranai taui i ğaira da ita voepai, tauna irairağena.

¹⁰ Paul i ğaira, i matave-tepani ma i rapai ma rava i riwei i pa, "Eğä ona vinuabola, tauna lawalawaina!"

¹¹ Anina ma Paul i ġae me au numa ma kerisiana maiteni BADA ana amgogona amna i ani ma awari i babani maratom. Ma Paul nai dobuna i netawanei.

¹² Taui laragana lawalawaina i naiei au numa ma rava orai i rauie.

Paul i amkuka au Miletus

¹³ Paul aenei i nae au Assos ma tauai i riwelai da wagei ana nae au Assos da tauna kampa ana vigerui.

¹⁴ Ma au Assos a vigerui ma a nae au Miletus

¹⁵ Maratomna bonabona Kios au ġereğeren a nae. Ma marana i tom au Samos a ġeta, ma maratom ġela au Miletus a ġota.

* **20:2:** Marina e ġoreğorei Greek.

¹⁶ Paul i ġoei da jijimanina ina nae ma avena ita rui au Ephesus, eġa ita ġoei da au Eisia provins ina mae-guratana. Tauna i vipaparana ma mepa da tagotagogina au Jerusalem ina ġeta muriai da Pentecost torelana.

Paul kerisiana au Ephesus i netawanei

¹⁷ Au Miletus Paul riwa i paritawanei au Ephesus taon kerisiana babadai awari da ita nebelei.

¹⁸ Maranai au Ephesus taon i ġetai ma taui i riwei i pa:

O aramanei au lawana menanare maranai vovounai weka au Eisia provins a ġetai.

¹⁹ Mai Jew i ġoei da ita rau-iviapoapoeleu wate tau a vilamolamona ma ana toutou BADA awarina a vivitaunola.

²⁰ O aramanei da maranai God Riwana Aiaina awarimi a raugugulei, riwa aiaina aniguimi eġa ata tajjini. Au deba a raraugugula rava maġamaġgau i naoi, ma ami au numa a viararamanimi

²¹ Riwa bagibagina mai Jew ma Jentail a verei, A riwei da ita rupena ma ita mae-tavirei God awarina ma Iesu ita vitumaġanei.

²² Ma marina Arua Vivivireina i riweu da ana nae au Jerusalem. Eġa ata aramanei kampa aiwai awariu ina tupua.

²³ Wate taon nununai awari a nena ma Arua Vivivireina e vivieġeu da amapo ina paniu ma au deri ina tereu ma ina rau-iviapoapoeleu.

²⁴ Ma mepa da ina viraġeniu, weilamna eġa kaua ġaeġaena tau awariu. Wate kaua ġaeġaena lamna BADA Iesu nola i verevereu da ana vikwai. Wei nolana lamna, God ana iviaiai maemaena, riwana ana raugugulei.

²⁵ Maġamaġgumi awarimi a nei ma God ana vigulau a raugugulei wate marina a aramanei da amadodo da i nena, naou eġa ona inana-melei.

²⁶⁻²⁷ God ana vilawana ogatarana rava aubaii eġa ata govaġi awarimi lamna aubaina riwa bagibaginei a ririwemi da mepa da rava au babin i ġeġa ina vitumaġanei ma ana lawana maemae-nonoana ina vine-boai, lamna eġa tau au wavu.

²⁸ Taumi babada ma ona paina-melemi, nanare tauvitumaġana taui aiavoi da Arua vivivireina au urami i teretereria. Ona inana-vaitetei me sipu taupainana ana sipu e paipaini. Taui lamna God ana vinevine taranei i gimarai.

²⁹ A aramanei da ana nae ma au muriu tauraugugula morumorui ina nei awarimi ma rava ai tumaġana ina viapoapoeni, me auou moduei sipu au boruna viraġena aubaina.

³⁰ Ma rava ġelau ami au dam oina ina vomairi ma ina viararamana ma moruei rava orai ina taini da taui ina votaġotaġoi.

³¹ Lamna aubaina matami ina kala ma ona aramanei da madeġa tonuġa marai ma waguvvarai a notanotaimi ma ana toutou a viararamanimi.

³² Ma marina God au urana a tereremi. Ana agu e verevereoimi ona vivitumaġanei. Wei aguina e vovaivrewapanimi, ma ami pulo ina veremi, aubaina taumi God natunatuna viaiainai.

³³ Ma tau eġa rava ana mane bo ana purapura ata rauoġarei

³⁴ Taumi o aramana-kauei da tau nimauei a nola da mane a vaia da tau au taubagibagi turau aubaiai.

³⁵ Nanare, a viatataiemi da ona nola guratana da mane ona vaia ma molaka ona voagui. Iesu ana babani ega nuanuami ina vuru, Tauna i riwa i pa, "Verena i ai kaua ega me vainana."

³⁶ Paul i babani vorovei ma anatapui i mae gaira au doa ma i raupari.

³⁷⁻³⁸ I vinolanola i pa, "Amapo ega naou ona inana-melei." Wei riwana i vinuabolai da i vitouana, Paul i taragwabai ma i vigia-la-gola-gonei. Ma i naiei da au waga i vigeruei.

21

Paul ana vaigai au Jerusalem

¹ Ephesus kerisiana babadai a viegualaei ma wagei jijimanina a nae au Cous bonabonana ma ubaubanai a nae au Roudes bonabonana, kampa da a damana au Patara taon.

² Weka waga gelauna i nenea au Phonisia a gerui,

³ da au Saipras bonabonana a rubatawanei, au kelakelauai da a nae au Taia au Syria provins a gota, da purapura ita viopuni.

⁴ Kampa tauvituma-gana a baiei ma aupom 7 maiteni a mae. Arua Vivivireina kerisiana i riwei da Paul awarina aiwai ina tupua, ma lamna aubaina Paul i viigaei da ega ina nae au Jerusalem.

⁵ Ma mara i getai da ata vomairi, kerisiana awawai maiteni da natunatui taon i voterei ma anatapuiai a gaira au gera, a raupari gogona.

⁶ A viegualau da tauai au waga a geru ma taui i nae-me ai au numa.

⁷ Au Taia ma a nae au Tolemais taon a geta. Tauvituma-gana kampa a nebelei ma aupom tagogi maiteni a mae.

⁸* Ma marana i tom ma dobuna a voterei ma a nae au Caesarea, kampa God riwana taujimeina Philip ana au numa a mae, tauna oroto vi-7-na au Jerusalem i vinevinei da lam taupainina.

⁹ Tauna natunatuna waivinei 4 ega tavitavinei, taui God ana riwa i vivie-gai rava awari.

¹⁰* Aupom vomagaui i kwa, kerisiana wavana Agabas, tauna nanare God riwana i vivie-gai, Judeaei i gairai au Caesarea.

¹¹ Ma i nei awariai da Paul ana tairoro i vaia ma tauna urana ma aena i ragina-melei ma i riwa i pa, "Arua Vivivireina e ririwa, da Jew babadai wei tairorona taniwigana wenanare ina ragini, ma Jentail au urai ina terei."

¹² Maranai wei riwana a nonori, tauai kerisiana gelaui maiteni Paul a vibagana-guratei, da avena ita nae au Jerusalem.

¹³ Wate i pa, "Aiwai aubaina o vivitouana ma orau o viviapoapoeni! Tau a vokaukaua nonoa da ina raginiu, wate ega lamna ava ma ina virageniu au Jerusalem, BADA Iesu a vovota-gota-goi aubaina."

¹⁴ Tauai a vivigaei ma ega tagotagogina da nuanuana ata sinavirai lamna aubaina riwanana a voterei ma a riwa a pa, "BADA ana goanei nanare ina tupua."

¹⁵ Wei au murina a vokaukaua ma a vomairi au Jerusalem.

¹⁶ Kerisiana gelaui mai Caesarea I naielai Nason ana au numa ma kampa a mae. Tauna oroto Saiprasie, ma Iesu vota-gona i vikaren maranaina rava vovounai i vikarei da Iesu Riwana Aiaina i rarau-gugulei.

Paul, James i raugenari

¹⁷ Maranai au Jerusalem a ġeta kerisiana ana nuaiaii i nebelelai.

¹⁸ Maratom ġela Paul maiteni a nae da* James a raugenari,[†] dogadogara anatapui kampa.

¹⁹ Paul taui i viegualaei ma ana au vaġai God aiwai i kaukauei Jentail awari anatapuna taui i pariverei.

²⁰ Maranaina wei riwai i nonori, taui God i voepaepai ma Paul i riwa i pa, “Turaiai u aramanei mai Jew ai maġa tausan nanare weka Iesu e vivitumaġanei, ma God ana tarawatu e vovotaġo-kaei.

²¹ Wate rava Jew kerisiana weka au Jerusalem am kaua i vibenabenaei, da tam Jew Jentail maiteni e mamae e viararamani da Moses ana tarawatu ina gedugeduaiei. Ma u riwei da natunatui ini eġa ina bori ma ai kaua ġelaui eġa ina votaġotagoi.

²² Taui i aramanei da tam u ġetai, Marina aiwai tana kaei?

²³ Aiwai a ririwemi ona kaei. Au nelara 4, taui parivainuaġana bagibagina God awarina i kaei.

²⁴ Ma taravaini ma ona nae au Tempol ma ona viaiaina-melemi ma ma vimaia da taui ai viaiaina pulona ina kaei. Anina ma taui kolai ina ġari ma rava anatapui ina aramanei da tam Moses ana tarawatu anina e vovotaġotagoi, ma babani au naona lamna anatapuna moru kaua.

²⁵* Ma Jentail marina i vivitumaġana aubaii pepa a girumi ma wenanare a riwei, sia e pulopuloei kokoitau awarii eġa ina ani, Tara eġa ina umai, Rava ġamoġamo uai e kikiki tarai eġa ita toi-tawanana, eġa ona ani. Eġa ona viawawana labalababa.”‡

²⁶ Anina ma marana i tom Paul nai nelarai 4 maiteni i viaina-melei God au matana. Muriai Paul i rui Tempol au orana ma i vinolanola pirisi awarii da mara aiwai taui ai viaiaina ina voterei. Ma maranaina pulo ita terei taui tagtagogi ava aubai.

Paul i pani.

²⁷⁻²⁹* Ma aupom 7 aburuna ava da ita kwa ma Jew ġelaui au Eisia provins maemae taui Paul i 'nanai Tempol au orana. Au naonei taui Paul i 'nanai oroto Ephesusei wavana Trophimus maiteni, au taon i bababara ma i notai da tauna Trophimus i ruiei Tempol au orana. Taui Paul i vojjini ma i garara i pa, “Nelara mai Israel ona nei, ona voaguiai! Wei orotona dobu anatapuna e nenaeni ma rava anatapui e viviararamani da mai Jew ma ata tarawatu ma Tempol i parivirevirei. Tauna Jentail i neiai gabuna au vivivireina ma i tuvaidoedoi God au matana!”

³⁰ Ma rava anatapui i nonori da au Tempol viġaiġaiawa i tupua ma anatapui kampa i ruba. Ma Paul i vojjini ma i taina-opunei au doa ma Tempol metaetana i gudui.

* **21:18:** Wei lamna Iesu ana tevera. Act 12:17; 15:13 ma Mrk 6:3 † **21:18:** Mane anatapui ai au vaġai i tami bo rava i puloi i verei damanai mane taupainina i verei * **21:25:** Act 15:29 ‡ **21:25:** Viawawana labalababa wei anatapuna e vaivaipai: Rava ġela awana oroto bo wavine maiteni e viawawana (Exo 20:14, Deu 5:18); Rava ġela maiteni e viawawana mane bo purapura aubaina (Lev 19:29, 1 Cor 6:15); Natuim maiteni e viawawana, me oroto natuna wavinena maiteni bo wavine natuna orotona maiteni (Lev 18:6); Oroti ma oroto bo wavine ma wavine e viawawana (Lev 18:22, Rom 1:26-27); Rava ma ġamoġamo e viviawawana (Lev 18:23); Rava ġela, eġa awaoim maiteni e viawawana (Eph 5:3); Rava ġelaui e gaegari da maiteni ma viawawana. (Gen 34:7, Deu 22:25-28). * **21:27-29:** Act 20:4

31 Maranai taui Paul viraġenana i kaukauei, Mai Rome sorodia ai bada ġaeġaena i nonori da viġaġaiawa ġaeġaena i tupua au Tempol.

32 Tauna laġilagina ana sorodia ma ai babada i vaini ma i ruba kampa, maranai rava taui i 'nanai, Taui Paul vunuana i voterei.

33 Sorodia ai bada i nei Paul awarina da i vojjini ma ana sorodia ruāga i riwei da seinei Paul urana au urai i pani jijini. Anina ma tauna patara i vitara-virevirei i pa, "Wei aiai orotona? Aiwai i kauei?"

34 Patara au orana rava ġelaui babani tagogi i gararei, ma rava ġelaui babani tapuna i gararei. Rava were da nare i garagarara da sorodia ai bada menanare ita nelāgai gaiawa karena aiwai, lamna aubaina ana sorodia i egari da Paul ita naiei, ai au bareki.

35 Maranai Paul bareki tetena i tutuġereġerei, patara i ġaiawa guratana aubaina sorodia Paul i voepai da i avarai da ita gagaloei.

36 Patara amapo da taui i vovotaġoġoi ma i garagarara i pa, "Ona viraġeni, ona viraġeni!"

Paul patara awarii i babani.

37 Maranai taui aburuna ava da au bareki ita rui, Paul Greeki sorodia ai bada i riwei i pa, "Anina bo eġa da awarim ata babani?"

Ma tauna i auepai ma i riwa i pa, "Tam Greek u aramanei bo?"

38 Tau a notai da tam Egyptei, rorova ai babada u viġavie, Ma rava 4,000 orai potapotai u opunei au mutulua, Tam nai ravana bo?"

39 Paul i paribelana i pa, "Eġa! Tau Jew ei, au taon Tarsus a tupua, au Silisia provins, a vivibägaim da rava awari ana babani."

40 Tauna i vianina ma Paul au tete i mairi. Tauna urana i voepai da patara garara i voterei. Maranai taui i genuana, Paul taui awarii ai ponanei i babani i pa.

22

1 "Amamau ma varevareiu, ona rautaniġaneu ma ana viatataiemi da tau eġa aiwai ata kauana-boai."

2 Maranai patarana Paul i nonori da taui ai ponei i bababani, taui i genuana ma i rautaniġana.

3 *I riwa:

Tau Jew ei, Tarsus au Silisia provins a tupua wate weka au Jerusalem a rata ma a giruma. Amamata ai tarawatu a girumei ma au tauviararamana Gamaliel.^{*} A ġoana-guratei da God ata voepaepa-kauei me taumi anatapumi nanare.

4 *Tau Iesu ana etanai tauvotaġoġoina a rau-iviapoapoelei da ġelaui i'rāġe. Nelara ma waivine a pani ma au numa panipani a tawana-ruiei.

5 Pirisi ġeġetelarana ana boru ġeġetelarana[†] maiteni i aramanei da tau a ririwa kaua. Taui ai vianina pepana i vereu da ai rava au Damaskas ata verei ma a nae au Damaskas da kerisiana ata pani ma a neiae da kovoġa ita viaia weka au Jerusalem.

6 Aubenai Damaskas a tuġereġerei ma maratagogi lalaina gamrina ġaġaena marei i ġairai da i tunuiai.

7 A peu au doa ma pona a nonori i pa, "Saul! Saul! Aiwai aubaina e raraū-iviapoapoeleu?"

* 22:3: Act 5:34-39 * 22:3: Gamaliel tauna tauviararamana ma rava aiaina Paul ana au mara. Tauna Pharisi ma boru ġetelarana (Sanhedrin) au orana. † 22:4: Act 8:3; 26:9-11 † 22:5: Sanhedrin

⁸Tau a paribelei, "Bada tam aiai?"

Tauna i paribelei, "Iesu Nasaretei e rarau-iviapoapoelei."

⁹Rava maiteni a nenaе lalalaina i 'nanai wate babani ega ita nonori.

¹⁰A paridadana a pa, "Bada Aiwai ana kuae?" Ma Tauna i riwa i pa, "Ma vomairi ma nae au Damaskas. Kampa rava am nola ina pariverem."

¹¹Lalalaina gamrina i rata guratana ma matau i kamoi da ega ata inainana. Ma tauvigwanigwaniana au urai i voa ma i naieu au Damaskas.

¹²Oroto wavana Ananias kampa i mae tauna God i voepaepai ma ana tarawatu i vovojijina-nonoei. Mai Jew tauna i vivirana-kauei.

¹³I nei da au ririvau i mairi ma i riwa, "Vareiu Saul ma inana me!" Nai marana a inana me.

¹⁴Anina ma i riwa, "Amamata ai God i rautanim, da ana goana ma aramanei, ana Taunola Jijimanina[‡] - matamei ma inanai, ma riwana taniгamei ma nonori.

¹⁵Aiwai u inainanai ma u nononori ma vimatematei rava anatapui awarii.

¹⁶Marina aiwai e paipaini! Tauai ana babataitoim ma BADA awarina ma raupari da am go'apoapoei ina oga-tawanei."

¹⁷Anina ma a nae au Jerusalem. Au Tempol a raraupari ma matauei kaua a inanai.

¹⁸A inanai BADA awariu i bababani i pa, "Rava weka am jima tau aubaiu ega nonorana ita goegoei. Laгilaгina Jerusalem ma opu-tawanei."

¹⁹Wate tau a paribelei, "BADA wei ravai i aramanei da pari numai a nepai da kerisiana a vunui ma a pani-naiei.

²⁰*Ma maranai am peroveta Stephen tarana i toi, tau kampa a maimairi ma ana irage a vianinei ma gaima tautawanai ai gara a paipaini."

²¹Ma BADA i riweu, "Ma nae a paripari-tawanem ueia Jentail awarii."

Paul e ririwa da tauna Romei

²²Patarana Paul i rarautaniгanei ma maranai wei babanina i kuae tau i meji guratana ma i vigaragararei i pa, "Ona viraгena-tawanei, ega ina mae!"

²³Tau i vigaragararei, ai kwama i kwajikwajie i ma pokau i tawatawanei awarina.

²⁴Ma sorodia ai bada sorodia i egari da Paul i naiei ai au bareki. Ma i riwei da Paul ita wipi da ita viega aiwai aubaina ana rava amloi i gaигai ma awarina i garagara.

²⁵Ma urana ruaga i terepai au aidamo ma i ragiraгini da ita wipi ma Paul sorodia ai bada i riwei i pa, "Tau Rome-ei, Ega ota etareu ma o vunuvunu-labalababai. Lamna menanare?"

²⁶Maranai sorodia ai bada wei i nonori ma i nae da ai bada гaeгаena i pariverei. Ma tauna i vitara-virevirei i pa, "Aiwai e kaukauei? Wei ravana Rome-ei!"

²⁷Sorodia ai bada i nae Paul awarina ma i paridadanei, "Ma riweu! Riwa kaua da tam Rome-ei bo?"

Ma Paul i paribelei, "Ee, lamna riwa kaua!"

²⁸Sorodia ai bada Paul i riwei, "Tau mane гaeгаena Rome gabemanina a verei da a vimai Rome."

Paul tauna i riwei, "Tau a tupua da Rome-ei."

[‡] **22:14:** Rava Jijimanina bo bulobulona, lamna Iesu wavana. Paul ega Iesu wavana ita latoni mepa da taurautaniгана mai Jew ita viamloгaiгaini. ^{*} **22:20:** Act 7:58

²⁹ Sorodia i ġoei da Paul ita etarei wate maratagogi ita ġori-melei. Ai bada ita ġori ma i rovo-kaukau maranai i aramanei da i kauana-boai da Paul, Rome-ei seinei i pani.

Paul Jew ai boru ġetelarana§ au naoi i mairi.

³⁰ Au maratomna sorodia ai bada i ġoei da ita aramana-kauei mai Jew ai viwawu aiwai Paul awarina. Ma lamna aubaina Paul ana seini i votawatawanei ma i opunei boru ġetelarana au naona i vimairini.

23

¹ Paul boru ġeġetelarana i 'nana-jijini ma i riwa, "Varevareiu tau au nola God awarina i jijimana ma orau aiaina da wei paratana."

² Ma Pirisi ġeġetelarana Ananias rava ġelauna Paul au ririvana i maimairi i egari da Paul i raunavanavai.

³ Ma Paul Ananias i riwei, "God ina raunavanavaim, tam morumorom! Moses ana tarawatuei e rarauetareu wate maranai am rava u riwei da i raunavanavai tam tarawatu u viaigai."

⁴ Taui Paul au ġereġerena i maimairi Paul i riwei, "Aiwai aubaina God ana Pirisi Ġetelarana e vivijibogi?"

⁵ Paul i paribelei, "Varevareiu eġa ata aramanei da tauna God ana Pirisi ġeġetelarana. Au buka i terei da *Eġa God ana taunola ma parivai-apoapoeni.*" (*Exodus 22:27*)

⁶ ♦Anina ma Paul i 'nanai da Sadusi ma Pharisi ġelaui kampa ma ponana i rata ma i riwa, "Varevareiu tau Pharisi, amau maiteni Pharisi. A vivitumaġana da God rava iraġelei ina vovaimairini wei lamna aubaina taumi O etaetareu!"

⁷ Maranai wei i latoni Pharisi ma Sadusi vipariparinigai i raukarei ma boru i kai da ruāga.

⁸ ♦Aubaina Sadusi e ririwa da rava e irairaġe lamna eġa ita vovomairi me, ma anela da aruarua eġa ita vivitumaġanei, wate Pharisi wei anatapui e vivitumaġanei.

⁹ Ĝaiawa ġaeġaena i tupua ma tarawatu babadai ġelaui taui Pharisi, i vomairi ma i babani guratana i pa, "Tauai eġa aiwai apoapoeni ata inanai wei ravana awarina! Mepa da anela bo Bada Aruana tauna awarina i babani?"

¹⁰ Viġaġaiawa ġaeġaena i tupua ma sorodia ai bada i rovo mepa da rava Paul ina viaiskasikai ma sorodia i egari da i rui ma Paul i taravaina-opunei ma ina naieiau bareki.

¹¹ Ma waguvvarai ġelauna, BADA Paul au ririvana i mairi ma i riwei, "Tepam ina tora! Me aubaiu u jima au Jerusalem nanare aubaiu au Rome ma jima."

Mai Jew i vioga da Paul ina viraġeni

¹² Ubaubanai mai Jew ġelaui i vitagogiei ma i viogatara ma i parivainuaġana da eġa ina am bo ina uma da Paul ina viraġeni.

¹³ Nelara 40 nanare i vianina da Paul ina viraġeni.

¹⁴ Taui i nae pirisi babadai ma dogadogara awarii ma i riwei, "Tauai parivainuaġana bagibagina a kauei da eġa ana am da Paul ana viraġeni."

¹⁵ Taumi Boru ġeġetelarana maiteni ona moru ma riwa ona pari-tawanei sorodia badana awarina da Paul ina neiae ma ona vitara-virevirei da riwa kaua ona vaia. Tauai ana vipaipai da ana viraġeni muriai da weka ina ġetai.

¹⁶ Wate maranai Paul avuna wei ogatarana i nonori ma i nae sorodia ai au bareki ma Paul i pariverei.

¹⁷ Ma Paul sorodia badana i ġoreiā ma i riwei, "Wei laragana laġilaġina ma naiei ami bada awarina da ana riwa ina riwei."

¹⁸ Ma i naiei ai bada ġaegħena awarina ma i riwei, "Panipani wavana Paul riwa i paritawanei awariu ma i riweu da wei laragana ata neiae awarim aubaina am riwa awarina."

¹⁹ Sorodia ai bada ġaegħena laraga i vinimavoai ma i maeria ma i paridadanei, "Am riwa aiwai ma riweu?"

²⁰ I riwa, "Mai Jew i riwa da ita vibaġaim da au maratom Paul uta naiei ai au Boru ġeġetelarana, Wei anatapuna moru.

²¹ Wate eġa ma rautaniġanei aubaina rava 40 nanare pota e paipaini da ina viraġeni. Taui i vioga da eġa ina am da Paul ina viraġeni. Taui i vokaukaua ma am vianina ava e paipaini."

²² Ma bada laraga i riwei da eġa aiai ina riwei ma i paritawanei.

Taui Paul i paritawanei Gavena Felix awarina.

²³ Anina ma sorodia ai bada ġaegħena babada ruāġa i ġoreiā ma i riwei, i pa, "Sorodia sod ravai 200, aiera ravai 200 ma hos ravai 70 ma vaia ma ona vokaukaua da wagħuvarai 9 oklok ona vomairi.

²⁴ Hos biaġa ona vaia Paul aubaina da aiaina ona naiei gavera Felix awarina au Caesarea."

²⁵ Ma sorodia ai bada pepa wenanare i girumi:

²⁶ Tau Claudius Lisias, a girugiruma awarim au bada vinualaulau-nam, Gavera Felix.

Egualau.

²⁷ Mai Jew wei orotona i vojjini ma ita viraġeni, wate maranai a nonori da tauna Rome-ei ma lamna aubaina au sorodia maiteni a opu da au urai a vaitawanei.

²⁸ A ġoiei da ata aramanei ana apoapoe aiwai, da ata naiei ai Boru ġeġetelerana awarina.

²⁹ Ma a nelāġai da viwavuna lamna tauiava ai tumaġħana kauai ma Rome ana tarawatuei lamna tauna eġa aiwai apoapoena ita kaei da ata viraġeni bo ata pani.

³⁰ Maranai riwana a vaia da mai Jew i ġoiei da govagħoġanei tauna ita vunui. Lamna maratagogi a paritawanei awarim, ma nanare tauvi-wavu a riwana-guratei da kampa ina ġetai da ai viwawu ina kaei.

³¹ Ma sorodia ai babada i ririweia nanare i kaei ma wagħuvarai Paul i taravaini ma i naiei da au taon Antipatris i ġeta.

³² Au maratomna aiera ma sod sorodjai i naeme au Jerusalem ma hosi sorodia Paul i naei au Caesarea.

³³ Maranai hosi sorodjai au Caesarea i ġeta pepana ma Paul gavera i veredamanei au urana.

³⁴ Gavera pepa i 'avi ma Paul i paridadanei metauna provins-na u tupua ma i riwa, "Silisia."

³⁵ Gavera i riwa i pa, "Am etara ana nonori maranai am tauviwawu ina ġetai." Ma sorodia i naiei Herod numa i voavoiana da ita inana-vaitetei.

24

Paul Gavena Felix au naona i mairi

¹ Aupom 5 au murina Pirisi ġegetelarana Ananias ma dogadogara i ġaira au Caesarea ai taurauetara wavana Tertelus maiteni.

² Ma Paul i ġoreiai gabemani au naona. Ma Tertelus i vomairi ma viwavuna i vikarei:

Au bada Felix* vinualaulaunam, Am vibadanei ta mae ubauba ma ata nota eġa aiwai. Ma kaua vouii ma aiaii u kaukauei ata dobu voana aubaina i voagu-kaueta.

³ Anatapuiai mepamepa a mamae a vinuaiai kaua tam awarim.

⁴ Wate eġa ata ġoei da ana visina-viraviraim. Ma lamna aubaina a ġoegħoei da uta rautaniġaneu mara aburuna ava.

⁵ Tauai a nelāġai da wei ravana lamna orana potapotana ma viġaġiawwa tauvikareina mai Jew awarii dobu au anatapuna. Tauna boru vouna e ġoegħorei mai Nasaret† ai bada.

⁶ Taui i ġoei da Tempol maiteni ita tuvaidoedoei ma lamna aubaina a pani.

⁷‡

⁸ Ma rauetarei ma ma nelāġai da ai viwavu lamna anatapui riwa kaua.

⁹ Ma mai Jew Tertelus au murina i mairi ma i riwa, “Wei babani anata-pui riwa kaua!”

¹⁰ Anina ma Gavena Felix Paul i raumotemotei da ita babani. Paul babani i vikarei i pa:

Au bada vinualaulaunam, a aramanei da tam madeġa biaġa wei dobuna ai taurauetara lamna aubaina tau ana nuaubau ana babani aubaiu.

¹¹ Am rava ina riwem da tau pom ota aupom 12 nanare a ġeta memei au Jerusalem da BADA ata voepaepai.

¹² Au tauviwawu eġa ita nelāġaiu ata viġaġiawwa au Tempol bo au boru-numana bo mepa nanare au Jerusalem.

¹³ Ma ai viwawu tau awariu menanare tana aramanei da lamna riwa kaua?

¹⁴ Wate riwa kaua da tau amamata ai God a voepaepai ma BADA Iesu ana etanai, a votaġoġoġi ma taui e ririwa da wei lamna taparoro morumoruna. Wate nanare Moses tarawatu i girugirumi ma God ana peroveta nununai i girugirumia anatapuna a vivitumaġħanei.

¹⁵ Tau God awarina a vitumaġħana guratana me ravai nanare, da tauna muriai rava anatapui iraġelei ina vilawana-melei, ravai aiaii ma rava apoapoei.

¹⁶ Lamna aubaina a kaukauana guratei da orau ina ai rava ma BADA awarii.

* **24:2:** *Felix ana au vibadana lamna eġa ita ai. Tertelus lamna Felix i gwalagħalamerui da Paul ita viwawui ma ita pani. Felix rava vita gaġgaci i verei da madeġa ruaqha i kwa Sisaei Nero wei ravana i viopuni. Ĝavia gaġġaena i tupua ma Jew Rome i viġavie i ma taui Jerusalem irikid da eġa aiwaina ita mae.*

† **24:5:** *Wawa Nazarene lamna Iesu ana tauvo tagoġgo i babaniei aubaina tauna Nasareti. Maranai Tertelus taui e ġorei Nazarene Lamna Kerisiana e viviġibogħi. Jew Jerusalem ei ma Judea Provinς anatapuna mai Galliċi provins ravai e inainana ġairei, (John 1:46 ma iavi). Tauna wate e ririwa da menanare Paul e tapatparoro nei lamna mai Rome ai tarawatu e viviaigai.* ‡ **24:7:** *Verse 7 lamna buka waduwaduboi biaġava au orana e mamae, wate buka Greek ponanei i girugirumi maġħamaġħau wei ves-na au orana eġa.*

17 [✧]Jerusalem a netawanei madeğā biağā i kwa ma pom ota a nememei da molamolakai ata puloi ma pulo ata kaei God awarina. §

18 Tau aiaiu, maranaina i nelägaiu au Tempol viaina pulona a kaukauei. Eğä patara maiteni ma eğä visinaviravira.

19 Wate mai Jew ġelaui Eisia provinsei i nei kampa. Taui mepa marina! Ita nei au naom da ai viwatu ita terei.

20 Bo babada weka ita riweta au apoapoe aiwai maranai boru ġegetelarana au naona a mairi.

21 [✧]Wate mepa da maratagogi awarii a garara a pa, “A vitumağana da God rava anatapui irağelei ina vovaimairini! Lamna aubaina tau weka a maimairi.”

22 Felix tauna BADA Iesu ana Etanai riwana i aramana-kauei, boru i gudui ma i riwa, “Maranai sorodia ai bada Claudius Lisiás ina nei, ma ina paribelem.”

23 Ma sorodia ai bada i egari da Paul ita inana-vaitetei ma ita voterei da ita bababara ma ana rava ita nei da ita raraugenari.

Paul Felix i viararamani

24 Aupom biağā au murina Felix awana Drusila maiteni i nei. Drusila lamna wavyne Jew ei. Ma riwa i paritawanei da Paul i neiai, ma rava ai tumağana Iesu Keriso awarina i babaniei ma Felix i rautaniğana. *

25 Wate maranai Paul babani i vikarei da God ana ġoana, da rava lawana aiaina ma jijimanina ina maeni, ma erawa kauai ma ġo'apoapoe ina geduaiei, aubaina mara e nenei maranai rava anatapui ina etarei. Felix wei babanina i nonori tauna i rovo ma Paul i riwei, “Ma nae! Ma maranai ana ġoem lamna ana kwatuem.”

26 Ma Felix i ġoegħoei da Paul tauna manelei ita għalai ma lamna aubaina mara i maġa i raukwatuei ma awarina i babani.

27 Madeğā ruağā au murina Felix i rautom ma ana gabu Posias Festus i vaia. Felix i ġoiei da wavyne ita ai mai Jew awarii lamna aubaina Paul au numa panipani i votere-tawanei.

25

Paul i vibağā da Sisa au naona ita mairi

1 Festus i ġeta au Caesarea da ana nola ita vikarei ma aupom vitonuina i ġae au Jerusalem.

2 Weka pirisi ġegetelarana ma dogadogara Festus i nebelei ma ai viwatu Paul awarina tauna i verei.

3 Ma Festus i vibağai da ita voagui da Paul ita paritawanei au Jerusalem. Taui ava i vioga da Paul au etanai ita viraġeni.

4 Wate Festus i paribelei i pa, “Paul au deri au Caesarea ma tau a ġaiġaira me kampa aupom ruağā au murina.

5 Mepa da Paul aiwai i kauana-boai lamna ami Babada maiteni ana ġaira da kampa ami viwatu ina terei.”

[✧] 24:17: Act 21:17-28 § 24:17: Madeğā 5 i kwa ma Paul i nememei au Jerusalem da ita mae mara aburuna da tauvitumağana ita vovaivrewapani ma ana babara ma nolana aiaina ita virarautuei. (Act 18.22) [✧] 24:21: Act 23:6 * 24:24: Mepa da Drusila Jew wavinena awarinei Felix wei ravai e ġoegħorei tauvitumağana i aramanei. Drusila lamna Herod Agrippa natuna guguinina umauna ana madeğā 20. Tauna wavalatona Siriei i ravaġi wate i voterei maranai ana madeğā 16 da Felix i ravaġi. Wei lamna ana tavine viruiaina ma Felix ana tavine vitonuina.

6 Aupom 8 da 10 nanare au murina Festus i ġaira me au Caesarea ma maratomna au numae tara i kiala ma ana sorodia i eġara da Paul ita ruieiai au naona.

7 Maranai Paul i ruieiai, ma Jew babadai Jerusalem ei i ġairai i nei awari ma ina viwavu, kaua maġamaġau apoapoei aubaii. Wate taui ai viwatu anatapui anona eġa.

8 Paul wei *viwavui i vinua-nainei ma i pa, “Tau eġa aiwai apoapoena ata kaei mai Jew ai tarawatu awarina bo ai Tempol awarina bo Caesar awarina.”

9 Wate Festus i ġoei da mai Jew ita vinuaaini lamna aubaina Paul i paridadanei i pa, “E ġoēoei bo eġa da tana ġae au Jerusalem ma etara?”

10 Paul i riwa, “Tau marina Caesar ana au etara gabuna a maimairi, weka ina etareu. Tam u aramana-kaei da tau eġa aiwai apoapoena ata kaei mai Jew awarii.

11 Wate mepa da aiwai apoapoena a kaei lamna ma viraġeniu. Tau eġa iraġe ata rovoei. Wate mepa da wei lamna viwatu moru lamna eġa aiai ana rewapani ita mamae da ina veredamaneu. Tau a vivibaġa Caesar awarina!”

12 Festus Caesar ana dogadogara ai nota i vaia ma i paribelana i pa, “Tam u vibabāga Caesar awarina, Anina Caesar awarina ma nae.”

Festus Paul ana babani gulau Agrippa i pariverei

13 Aupom biaġa au murina gulau Agrippa† novuna Benisi maiteni i nei au Caesarea da gavena vouna Festus i raugenari da ita viegualuei.

14 Ma i mae aupom vomagauna ma Festus Paul i rarauetara gulau i pariverei i pa, “Felix panipani tagogi weka i voterei.

15 Ma maranai a nae au Jerusalem mai Jew ai pirisi babadai ma dogadogara ai viwatu i neiae awarii ma i vibabāgiu da Paul ata viraġeni.

16 –Ma a riwei da tauai mai Rome ai tarawatu e ririwa da eġa rava ana kovoġa labalababai da au naona ana rauetarei. Taui ina ġetai da ai viwatu rauetara au naona ina mairi da ina gagaloana-melei.

17 Maranai tauviwatu maiteni weka a ġetai. Tau eġa ata vipaipai ma maratomna a egara da ravana i neiae da ita etara.

18 Tauviwatu i vomairi ma a notai da aiwai apoapoena aubaina ita viwavui wate eġa.

19 Anina kaua biaġa ava ai taparoro kauaii, ma rava tagogi irairaġena wavana Iesu i vitarapiriei. Wate Paul e ririwa da Iesu lawalawaina.

20 Tau nuuanuu i raġaraġa menanare riwa kaua ana vainei ma Paul a paridadanei da i vianina da maiteni ata ġae au Jerusalem da kampa ata etarei.

21 Wate Paul i vibabāga da Caesar ana viwatu ina rautaniġanei. Ma sorodia a egari da au numu panipani ina paini da ana paritawanei Caesar awarina.”

22 Ma Agrippa Festus i riwei, “A ġoei da ravana ana babani ana rautaniġanei.”

Ma Festus i paribelei, “Anina, au maratom ma rautaniġanei.”

Gulau Agrippa Paul i rautaniġanei

* 25:8: Paul au Tarsus i tupua wate tauna wavana Rome gabemanina awarina. Lamna aubaina tauna ana rewapani e mamae da ana nuabolha ina naiei au Rome da Caesar ina rauetarei. † 25:13: Wei lamna Herod Agrippa 11, Herod Agrippa 1 natuna.

²³ Au maratomna gulau Agrippa ma Benisi gulau garai i oteni ma ana gabemani babadai ġaeġae maiteni, i arana-ruei au boru numana. Festus ana sorodia i egari da Paul i ruieiai.

²⁴ Festus i riwa, "Gulau Agrippa ma anatapumi o rieiai weka, wei ravana o inainanai! Tauna mai Jew au Jerusalem ma weka au Caesarea e ġoegoei da ina iraġe.

²⁵ Wate tau a nelaġai da tauna eġa aiwai ita kauana-boai da ina iraġe. Wate i vibaġa da Caesar tauna ina rauetarei. Lamna aubaina a pariparitawanei Caesar awarina.

²⁶ Wate Caesar aiwai ana riwei, eġa ata aramanei aiwai ana girumi? Lamna aubaina a neiai awarimi ma tam gulau Agrippa maiteni da tana babaniei da nota ona vereu da aiwai ana girumi.

²⁷ Aubaina eġa ita ai da panipani ana paritawanei Caesar awarina ma ana viwavuna eġa!"

26

Paul ana gudu i tarai

¹ Ma Agrippa Paul i riwei, "A vianinem da ma babani." Ma Paul urana i voepai ma ana gudu tarana i vikarei

² i pa:

I ai kaua gulau Agrippa da amadodo tam au etara e rautaniġanei da Jew babadai ai viwavu awariu ana tere-vajijimani.

³ Tau aramanei da tam mai Jew ai giu ma ai paripariġai u aramanana-kauei. Lamna aubaina a vivibāġaim da au paribelana ma rautaniġanana-kauei.

⁴ Mai Jew anatapui au lawana i aramanei, aburu da marina, au dobu oina da au Jerusalem.

⁵ [◊]Tau rorova ava i aramaneu ma ina riwem da tau ai boru bagibagina ma piripirina, Pharisi au orana a rui ma tarawatu anatapuna a vojjinakauei.

⁶ Ma marina a vivitumaġana da God aiwai noinoita i parivainuagañi ina kauei. Ma lamna aubaina tau weka a maimairi.

⁷ Wei parivai-nuaġanana ata dam 12 e vipaipaiei da ina nei lamna aubaina ata rava i vipatutu ma marai ma waguvvarai God e viviborumei. Au gulau wei vitumaġanana aubaina mai Jew e viviwavui.

⁸ Aiwai aubaina o notanotai da God eġa tagotagogina da rava iraġelei ina yovaimairini?

⁹ [◊]Tau au naona a notai da aiwai anatapuna ata kauei da Iesu Nasaretei ata viġaviegi.

¹⁰ Ma anina lamna a kauei au Jerusalem. Pirisi ġeġetelerana babadai pepa i verei ma lamna i vovai-virewapaniu ma kerisiana vivivireii maġamaġau i numa panipani a terei, ma nanare ai iraġe a vianinei.

¹¹ Mara maġamaġau i boru numai a naeni da kerisiana a vununaiei da ai tumaġana ita boviei. Amlou i ġaiġai kaua da dobu ġelaui a naeni kerisiana a baibaei.

¹² Mara tagogi pirisi babadai au Jerusalem pepa i vereu da rewapani i vereu ma a nae au Damaskos.

[◊] 26:5: Act 23:6 [◊] 26:9: Act 8:3; 22:4-5

13 Ma aubenai nanare, tau au etanai a nenea ma a inanai, lalalaina marei i ġairai ma i lalaiai, gamrina madega i ġetawanei! Au rava maiteni a bababara i lalaiai.

14 Anatapuiai a vipeuana au doa ma pona Hebrewei awariu i bababani. I riwa, “Saul, Saul aiwai aubaina e viviġavie? Tam e ġoegoei da Tau ma viapoapoeniu wate ega da tam e viviapoapoa-melem!”

15 Ma a paridadana, “Bada tam aiai?”

Ma BADA i paribelei, “Tau Iesu, ravana tauna e viviġavie.

16 Wate ma vomairi. Tau a nei awarim da vaivai ata verem da ma vitaunola Tau aubaiu, ma amadodo aiwai u inanai ma aiwai ana viatataiem, ma vimatamatei rava awarii.

17 Tau ana gagaloem am rava mai Israel awarii ma nanare Jentail ravai awari, ma ana paritawanem Jentail awarii,

18 da matai ma vikalai, da ai lawana apoapoe ina voterei ma ina nei au lalalaina, ma Satan ana rewapania ina votere-tawanei ma ina nei God awarina. Tauna ai ġo'apoapoe ina nota-tawanei, ma ina taravaini natunatuna rarautanii, ai tumaġana awariu aubaina.”

19 Lamna aubaina Gulau Agrippa, tau riwa marei au inana a inanai a voteletelei.

20 *Au naona a jima mai Jew awarii au Damaskas ma nanare au Jerusalem ma Judea anatapuna ma muriae Jentail maiteni awarii. A jima da ai ġo'apoapoe ina votere-tawanei ma ina mae-tavirei God awarina, ma ai lawana ina vimataira da ai kaua apoapoe i voterei-tawanei.

21 Wei babanii aubaina mai Jew au Tempol i vojjiniu ma i ġoei da ita viraġeniu.

22 Wate God i vilawaniu da marina, ma weka a maimairi da a vimatamata rava muomuoi ma nanare rava ġaegaei awarii. Aiwai a bababaniei lamna peroveta nununai ma Moses i ririweta ina tupua.

23 *Tau i riwa da tauvilawana Keriso ina vinuapoapoe. Ma tauna ina iraġe ma ina vinao da ina vomairi me ma wei matairana ina vinolanola da tauna God lalalaina mai Jew ma Jentail aubaii.

24 Weka Festus i vionaġi ma i garara Paul awarina, “Tam u bua! Am aramana i vibuaim!”

25 Wate Paul i paribelei, “Au bada Festus tau ega ata bua. Tau aiwai a bababaniei lamna riwa kaua ma babani anona.

26 Wei kaua ega govagovaġana ma aramanei da Gulau Agrippa anatapuna i aramanei, ma lamna aubaina ana tepatorau wei kauai ana babaniei awarina.”

27 Paul Gulau Agrippa i riwei i pa, “Peroveta e vivitumaġanei bo ega? A aramanei da nanare!”

28 Ma Agrippa i paribelei, “U notai da tau laġilaġina ma sinaviraiu da ana vikerisiana!”

29 Paul i paribelei, “Laġilaġina bo amapo, a raraupari God awarina da tam ma rava anatapui wei au boruna ina tupua-vira me tau nanare wate ega sein maiteni.”

30 Anina ma gulau ma gavena ma Benisi i vomairi ma i nae.

31 Ma anatapui i nenea ma i babani vivira ma i vianina i pa, “Wei ravana ega aiwai apoapena ita kauei da tana viraġeni bo tana pani.”

³² Ma Agrippa Festus i riwei, “Mepa da ega ita vibaaga gae Caesar awarina, lamna marina tata rupeni.”

27

Paul wagei i vaagai nae au Rome

¹ Festus mara i tereterei i getai da tauai ata nae au Rome. Paul ma tau ma panipani gelaui maiteni au waga a geru ma a vaagai Rome aubaina. Rome ai sorodia badana wavana Julius au urana i terelai. Tauna Caesar ana sorodia vinevineña.

² Waga Adaramitei i nei da a geru ma wagana i gota-nae au Eisia provins gerana. Oroto wavana Aristakas ana dobu Thesalonika au Masedonia provins tauna maiteni i geru.

³ Au maratomna au Sidon taon a gota, Julius ivina i ai Paul awarina ma i voterei da i opu au gera da ana rava ita rauenari ma ana goana aiwai ita vibaagei.

⁴ Muriai wagei a opu da a nenaive i verau-matamataniai ma lamna aubaina bonabona au Saipras ma dobu gaegeena au pouna au mulaagina ambori.

⁵ Ma boga gaegeena a bori da Silisia provins da Pamphilia provins geraii a voterei da au Maira taon a rui au Lisia provins

⁶ Au Maira taon kampa sorodia badana mai Egypt ai waga Alexandriei i nenaive au Italy kampa i vigeruiai.

⁷ Ma aupom maagmaagaui nuatauai a ruba ma a voia guratana da Cinidus taon a tugeregerei wate ive i verau-matamataniai da kampa waga a virai da Crete bonabonana ma mutu Samone au poui au mulaagina a nae.

⁸ Ma kampa nuatauai bonabona Crete gerana a naeni aubaina mara i apoapoe ma a geta dobu e goregorei U Aiaina, Lasea taon au geregrena.

⁹ Mara gaegeena a vine-boai au vaagai* ma Rupena Ujina marana boibogi i kwa,[†] marina lamna ive ma rabama ai mara ma boga babarana i vinirovoro.

¹⁰ Ma Paul i riwa, “Nelara, malana a vaivaia da ata vaagai ina apoapoe kaua ma waga ma purapura tana vine-boa-pai. Ata lawana maiteni tana vineboai.”

¹¹ Wate sorodia ai bada, kapena ana babani i rautaniagauei ma ega Paul da kampa ata mae ma ega ata nae.

¹² Wei gabuna ega ita ai wei ivena au marana ma rava maagmaagaui i goei da waganei ata nae da Phinix una, Crete au bonabonana da kampa ata mae da bodu ita kwa. Wei u gaegeena ma mutuuii lavarata ma rauanaaga e vinao-vereverei, da au mulaagina e mamae.

Kojikojira Gaegeena

¹³ Maranai rauanaaga i vikarei ma waga ravai i notai da marina mara aiaina da ita nae au Phinix una. Ma anika i taini ma Crete bonabona geraei i nae.

¹⁴ Ma ega barana ita uama ma kojikojira‡ olei iveiai.

¹⁵ Ive wagana i verau-matamatani ma waga ega tagotagogina da ita vobelei ma i voterei da ive waga i avara-opunei.

* **27:9:** Iri i parei da kojikojira ana mara ma i vaagai. † **27:9:** Eng. *Atonement* bo *Yom Kippur* marana wei lamna September bo October rabama ma ive ai mara ‡ **27:14:** Kariwabu gaegeena

16 Bonabona aburuna Kauda gerana au mulağina a ruba ma kampa a voia guratana da dingy a terepai au waga da a ragita-jijini.

17 Wei i kauana vorovei ma ġuravei waga au gabaurina da waga adana i raġita-kwaviviroi. Taui i rovo mepa da au maratete ina amġaena au Syrtis,[§] Libya au gerana. Lamna aubaina ġuravei ai da kuka, i raġita-tagogiei ma au boga i viorereni da waga ita bibi. Ma i voterei da kojikojira waga i avara-naie.

18 Maratomna kojikojirana i rareau-guratanelei da purapura ġelaui au boga a viorereni.

19 Aupom vitonuina taui waga purapurai i viorereni au boga.

20 Kojikojira i ruba da aupom biaġa da madeġa ma ubona i purui. Ravai ai nota i kwa.

21 Wei au marana rava au waga am i kauana-avei, anina ma Paul i vomairi ma taui i riwei, “Nelara ota rautaniġaneu ma Crete eġa tata oputawanei, amapo waga eġa tata viapoapoeni ma ata purapura eġa tata vineboai.

22 Wate a ririwana-guratemi da eġa orami ina peu! Aubaina avena da waga ina monu wate eġa ina iraġe.

23 God lamna tau au BADA ma ana taunola tau. Waguvvarai God ana anela i paritawaneiaw awariu.

24 Ma i riwa, ‘Eġa ma rovo! Tam anina da Caesar au naona ma etara! Ma ġelauna lamna God ana nuavaina maemaena rava anatapui maiteni e vagħavaġai ina lawana.’

25 Lamna aubaina tepami ina tora! Aubaina tau God a vivitumaġanei ma menanare i ririweia nanarena ina tupua.

26 Wate tauta au maratete tana amġaena.”

27 Kojikojira i avara-naielai au Mediteranean Bogana da aupom 14 i kwa ma nubautuva waga ravai malana i vaia da taui gera i tuġereġerei.

28 Ma barawa au giana ġaima i raġini ma au boga i tawanana-ġairei da topa ana gabinou ita aramanei. Ma i aramanei da 40 meter ma i mae aburuna ma i rauaddana-melei lamna marina 30 meter.

29 Ma taui i rovo mepa da rabama waga au kira ina viairikarikai lamna aubaina waga au ipuna anika 4 i tawana ġairei ma i vipaipai da mara ina tom tawanana.

30 Ma waga ravai ai kaua i kaukauei da ita ruba-govaġa. Ma i vioga da dingieit ita opu waga au naona da anika ita dubara-naiei, ma lamna aubaina dingy i teretere-ġairei au boga,

31 Wate Paul sorodia ai bada maiteni i riwei, “Mepa da waga ravai ina rubatawanemi lamna anatapumi ona iraġe.”

32 Ma sorodia dingy ġuravana i borituini ma dingy kwakwavina i peu au boga ma i avara-naie.

33 Ma maratomtomai Paul rava anatapui i egari da ita am, i pa, “Taumi marina aupom 14 rovo i kauemi ma eġa ota am.”

34 “Tau a vivibaġa-guratemi da ona am da ona virewapana, eġa aiai tagogi ina iraġe.”

35 Paul i babani vorovei ma au matai palawa i vaia, BADA i viegualauie i vogimai ma i ani.

36 Ma rava anatapui inanai ma orai i bagibagi ma am i vikarei.

37 Tauai anatapuiai 276 au waga.

³⁸ Ma rava anatapui i am da i am-iaua. Ma witi baikei au boga i viorereni da waga ita votelatelai da au gera ita ġota da avena ita amġaina.

Waga au maratete i amġaena

³⁹ Maranai mara i tom tawanana taui dobu i 'nanai wate gerana eġa ita aramanei, wate U inanai da gerana aiaina ma i notai da gerana aiaina da waga kampa ita viġaeni.

⁴⁰ Anina ma anika ġuravai i viaituituini, ma labilabi i tere-ġairei, ma waga au naona kuka voaburunei i votawatawanei ma gera aubaina i ruba.

⁴¹ Wate waga au maratete i amġaena da i tapaiei, ma rabama waga ipuna i viairikarikai.

⁴² Sorodia i ġoei da panipani ita virāgeni, da avena ita toa-ġaira au gera ma ita viruberubei.

⁴³ Wate sorodia ai bada i ġoei da Paul ita vilawani ma i viġaei, anina ma ai viogatara eġa ita kauei. Ma taui aiavoi toa i aramanei i egari da i viauepa au boga ma i toa-ġaira au gera.

⁴⁴ Ma ġelaui aiwai da i tenatenam i vidauei. Ma nanare anatapui lawalawaii au gera i ġota.

28

Paul au Malta bonabonana

¹ Maranai a ġota au gera ma a aramanai da tauai au Malta bonabonana.

² Dobuna, ravai i nebelelai ma ivii i ai kaua awariai. Garewa atuna i vikarei ma i ubauba, ma taui au gera ai i viviri.

³ Ma Paul ai ragorago i ġuna da ai au tepana i tereterei ma mota ġaiġaiawana ai bolana malana i vaia da i opui ma Paul nimana i ani.

⁴ Dobuna ravai i 'nanai da motana Paul au nimana i dawedawe ma i pariarava, "Wei ravana lamna tauviraġena ma eġa ita monu wate ata god*" e ririwa da tauna eġa ina lawana."

⁵ Wate Paul motana i viaikwajie da ai au menamenana i rauei ma tauna eġa ita kero.

⁶ Rava i vipaipai da Paul nimana ita dodo bo ita peu da ita iraġe. Wate maranai i vipaipai guratana ma i 'nanai da tauna anina, taui ai nota i virai ma i riwa da tauna god ġelauna.

⁷ Au gerana a ġotagħota - lana au ġereġerena lamna dobuna badana Publius ana wapu ġaġġena. Tauna i taravainiai ma i paina-kauelai da aupom tonuġa

⁸ Publius amana i doria manawa ruba ma inīġugra i vaia da i matamatave, Paul i rui inanana aubaina ma urana au tepana i terei ma i raupariei ma i vilawani.

⁹ Anina ma rava anatapui doridoriai au bonabona i nei ma i vilawani.

Paul au bonabona Malta da i nae au Rome

¹⁰⁻¹¹ Kampa mai Malta maiteni a mae nawaravi tonuġa. Ma ravai i voagu-kauelai ma maranai ata vomairi, ai ġoana vaġai aubaina anatapuna i verelai. Ma waga ġelauna a gerui lamna mai Alexandria ai waga bodu aubaina kampa i mae. Waga au naona lamna ai god ruāġa kokoitaui i tai†.

¹² Kampa ma a amkuka-nae da au Sairakius a ġota ma a mae aupom tonuġa

* **28:4:** God wavinena wawana kaua aiaina bo kaua jijimanina (Justice). † **28:10-11:** Wei lamna mai Rome ai god raġaraġa wawai Castor ma Pollux ruāġai e ġoreġore Dioscuri bo raġaraġa marei, Taui lamna god Zeus ma Leda natunatui.

13 Kampa da ambori damana au Regium ma maratomna rauanaga i wanabauni ma amkuka ma geraei a ruba da maratom ġela au Puteoli a ġota.

14 Kerisiana kampa a nelaġai ma i riwelai da maiteni a mae wiki tagogi. Anina ma a babara-nae da au Rome taon a ġeta.

15 Kerisiana au Rome riwaiai i vaia da a nenei ma i ġei da ita nebelelai, ġelau i ġei au taon e ġoreġorei Vaġavaġai Tonuġa ai Numa ma ġelau i ġae Apius ana au maket. Maranai Paul wei ravai i 'nanai, ma i vinuaiai kaua ma God i viegualuaeit.

16 Maranai au Rome taon a ġeta taui Paul numa i verei da ainelana i mae ma sorodia i terei da i 'nana-vaitetei.

Paul au Rome i raugugula

17 Ma aupom tonuġa au murina Jew babadai kampa maemaei i rauġoreiai ma awarri i babani, "Varevareiu tau eġa aiwai ata kauana-boai ata rava awarri bo amamata ai tarawatu ata viaigai. Wate au Jerusalem i paniu ma i veredamaneu Rome gavena awarina.

18 Mai Rome i etareiu ma i ġoei da ita rupeniu aubaina eġa aiwai apoapoenia ata kaei da ina viragħeniu.

19 *Wate Jew babadai wei eġa ita ġoei ma lamna aubaina Rome babadai a riwei da tau eġa ana mae wate ana ġae au ġaegħena Caesar awarina da ita rauetareiu. Wate lamna eġa au rava ata viviġavie, eġa.

20 Lamna aubaina a ġoremi weka da tata babani gogona, ma ata riwemi da tau a vianipani aubaina a vitumaġħana da mai Israel ai tauvilawana wariaġa i ririwei boibogħi i nei."

21 Taui i paribelei, "Tauai eġa pepa Judeaei ata vaia bo ai rava riwa ita neiai.

22 Tauai aramanei da ravai anatapui kerisiana boruna e paripari-virevirei. Wate tauai a ġoei da am nota ana vaia."

23 Ma taui mara i terei da Paul maiteni ita viboru, ma patara i ġetai mepa Paul i mamaelana. Ma ubaubanai Paul God ana vigulau jimana i vikarei da wagħvarai i vorovei. Moses ana tarawatu ma peroveta nununaii ai au buka i mairi ma i jima. I ġoei da orai ita taini da Iesu ita vitumaġħanei.

24 Ana babaniei ġelau orai i taini ma ġelau eġa ita vitumaġħana.

25 Ma taui ava babanina i viparipariniġaiei ma muriai da ita vilamonei Paul wei riwana tagogi i latoni i pa, "Arua Vivivireina riwa kaua Peroveta Isaiah ponanei amamami i riwei i pa:

26 *Ma nae am rava mai Israel awari da ma riwei,
ona nononora Wate eġa ona aramanei
ona inanai wate eġa anona ona aramanei.*

27 *Aubaina wei ravai orai i bado.*

Tanigħai i gudui,

Taui matai i vopotai.

Mepa da taui mataiei ita inainana,

tanigħiaeit ita nononora

oraiei ita aramanei,

ma ita mae-tavirei awariu ma ata vilawani.

(Isaiah 6:9-10)

28-29 *Lamna aubaina ona aramanei da God Riwana Aiaina vai-melana aubaina i paritawanei Jentail awarri. Taui ina rautanigħana."*

³⁰Paul kampa numa i vivimaiei ma i mae madeğā ruağā taputapuna. Ma rava mağamağau i nenei da i raraugenari ma wei i vinuaiaiei.

³¹Ana tepatorana God ana vigulau ma Iesu Keriso riwana Aiaina i jimei. Ma eğā aiai ita viğaei.

Psalm Wela ma Pari

Pariverena

Mara manamanaina i netawanana rava mağamağau taputapunei ava wela ma pari i girumi wei au bukana. Mai Israel wei welai ma pari i tami ma i teretagogie i lamnei God i viviborumei.

Wei au bukana wela ma pari tapuna ma tapuna. Ĝelaui God e viviborumei ma e vovoepaepai ma ana iviaiai aubaina e viviegualaei. Ĝelaui e vivibağ a agu ma gagalo aubaina, bo notatawanana aubaina. Wela au ĝelaui, rava e raraupari ai gulau aubaina ma god e vivibağai da ai ĝavia ita kovoği. Ma wela au ĝelaui tauamgiruma ana apoapoe ma ana nuabola aubaii God awarina i beubeura.

Ma marağela Iesu riwa wei au parii i vaia da i viararamana. Kerisiana wei welai ma parii i welewelei ai au viboruma ma i jimajima.

Wela vinevinei

Psalm 1, 10, 23, 27, 34, 51, 67, 90, 95, 1-11, 100, 103, 110, 103, 110, 119, 9-16 ma 139.

Buka Tagogi

1

Nuaiaii ririwa-kauana

¹ Rava viaiainana, lamna eğä ġo'apoapoe ravai ita votağotağoi,
ma ponai eğä ita rarautaniğanei;
ma vivijibogai eğä awarii ita kiakiala.

² Wate BADA ana tarawatu i vinuaiaiei,
aupom ma marai e notanota-vaitetei.

³ *Tauna me ai, waira au adana gogogona,
ana au mara e rarauano;
ma rugurugui eğä ita poipoi.

Wei ravanana, aiwai anatapuna e kaukauana-kauei.

⁴ Wate ġo'apoapoe ravai eğä nanare!

Taui me rugurugu, ive i kapupuana-naiei;

⁵ Lamna aubaina ġo'apoapoe taukauei BADA ana au etera ita mairi ava,
ma nanare ġoa apoapoei ta kaei rava jijimani ai au dam ita mae ava.

⁶ BADA ġoa aiaii ravai e rarauetaraveni ma e paipaini;
wate ġo'apoapoe ai etanai au damona, pupui.

23

*Bada taupainiu**

David ana wela

¹ BADA taupainiu
ma eğä aiwai ana voladağei.

² Gidagida majimajigai au tepana i vimataveniu,
ma i raveniu waira au raraunairina au adana.

³ Au rewapana e raviravivouni
ma wavana aiaina aubaina etanai jijimaninei i raveniu.

⁴ Avena da gwagwa waguwaguvareina ana naeni,

* 1:3: Jer 17:8 * 23:: Taupainiu me sipu taupainina.

wate ega aiwai apoapoenia ana rovoei.

Aubaina tam au ririvau da am kwapuei ma jigonei e gagagaloeu ma
e vivinuaubaiu.

⁵ Aubaiu torela e vokaukauei au gavia au naoi.

Oilei kolau u vola gola goi da tam u vinuavaineu,
ma au kelaka i oa-karagelai.

⁶ Ee! Riwa kaua da am iviaiai ma am raunuapoapoe maemae nonoana
awariu ina mae, da au mara au damona.
Ma BADA ana au numa ana mae-nonoa.

27

Voepaepa parina

David ana wela

¹ BADA au lalalaina ma au tauvilawana,
aiwai ana rovoei!

BADA au taugagagalo
aiwai ana rovoei!

² Maranai go'apoapoei ravaii i getai
da ita vunuiu,
au gavia

aei ina pakana-melei da ina peu.

³ Avena da sorodia borui ina mae-gari guruviu,
tau ega ana rovo dadana.

Maranai au gavia i vomairi,
tau anina da God ana vivituma ganei.

⁴ Kaua tagogi ava aubaina a viviba ga.
Au goana gae gae na da,

BADA ana au numa, boruborumanana ana mae,
ma ana voepaepai. Au lawana au anatapuna.

⁵ Nuabola au marana
ina tere ga gariu.

Ana gabu au vivivireina, ina teregova gju.
Ma ola au tepana ina tereu
da gavia ega ina vodadaniu.

⁶ Ma au gavia i garigari kwaipipiniu, ana tuvaidoedoei.
Da au tempol ana morelanau pulo ana apui BADA awarina.

Ana vinuiaiai ma welei ma arei ma ana voepaepai.

⁷ BADA ma rautani ganeu maranai awarim a kwatukwatu,
ma raunu apoapoleu ma ma paribelevu.

⁸ Au orau u riwa, u pa, "Ma nei da ma rauduneleu."
Tau a paribelem a pa, "BADA a nenei."

⁹ Ega ma raugova gae,
ega awariu ma gaiawa.

Am taunola ega ma inana geduaiei,
au anatapuna tam, au tauagu.

Ega ma netawaneu,
au God, tam au tauvilawana.

¹⁰ Avena da amau ma alou ita teretawaneu,
wate BADA ina paina kaeu.

¹¹ BADA, ma viararamianu da am goana ana kaei.

Ma etanai au gada gadarana ma taravainiu aubaina au gavia i maga

¹² Tauri moruei ma parivairovorovoei e vunuvunuiu.

Lamna aubaina, ega ma teretawaneu awarii
 13 A 'ramanei da BADA ana viaiaina ana inanai,
 wека lawalawai ai au dobu.
 14 BADA ma vitumaѓanei,
 da ma virewapanma tepam ina tora.
 Anina BADA ma vitumaѓanei!

34

- BADA ma viborumei*
- 1 BADA ana vimaegaeѓaeni marana patapatai,
 ma ana viborumana-nonoei.
 2 Orau taputapuneiBADA ana voepaepai;
 Vilamolamonai riwau ina nonori ma ina vinuaiai.
 3 Ona nei ata BADA tana vimaegaeѓaeni
 wavana tana voepae-gogonei.
- 4 A raupari BADA awarina ma i paribelev,
 awariu rovo anatapui i vaitawanei.
 5 Aiavoi awarina e inainana,
 taui naoi ina rayilalai
 ma ega melanai ina vitepa-ubaubai.
 6 Au nota i kwa da a gorei, ma i nonori
 ma nuabola au oraui vaitawanei.
 7 Aiai da BADA e vivivirana-kauei,
 ana anela taui e inana-vaitetei, ma e vivilawani.
- 8 Taumi ona raudadani ma ona aramanei da BADA i aii.
 Taui BADA au goouna maemae nuaiai gaeѓaena awari.
 9 Taumi vivitumaѓanami ega aiwai ona voladaѓei.
 Lamna aubaina, BADA ona vivirei.
 10 Lion gauboi Mara gela am e irairage,
 wate aiavoi da BADA awarina e vitumaѓana ega ina voladaѓa.
 11 Natunatu, ona nei, ona rautaniѓana,
 ma ana viararamanimi da BADA ona vivirei.
 12 Taumi o goei da ami lawana ina aii
 ma ina manawa bo?
 13 Nanare, lamna menami ona paina-melei da ega babani apoapoe bo
 moru ona babaniei.
 14 Goa apoapoe ona geduaiei ma kaua aiaii ona kaukuae,
 ma ona voguratei da nuuba lawanana ona maeni.
 15 BADA, matana goa aiaii ravai awari e tereterei,
 ma taniѓana e tonetonei mepa da agu e toutouei.
 16 Wate tauna go'apoapoei ravai e mamae-puputei
 taui ina irage ma rava nuanuai ina vuru.
 17 Rava jijimanii agu aubaina e vivigoreBADA awarina
 tauna e rarautaniѓana ma ai vita e vaivaitawanei.
 18 Tauna rava peupeui, rovorovoi, ma vinuabolai e vivilawani,
 tauna rava orana i peu kaua e vovoepai.
- 19 Rava jijimanii ai nuabola i maga
 wate BADA taui e vovoagui ai au nuabola.
 20 E inainana-vaitetei da ega gelamina tagogi ina wanagai.

- 21 Ōga apoapoe ravai ai apoapoe ina vunumelei,
ma aiavoi da ġoa aiaii ravai e gedugueduaiei, ina kovoġi.
22 BADA ana taunola e gagagaloei,
aiai da e nenei BADA au ġouna, kovoġa ina vorei.

51

David ana rupena

Mara tagogi, Gulau David ana taunola Uriah awana Bathsheba i tavimatanei da maiteni i matave.

1 Oo God, ma raunu'apoapoeleu. Tam nuavaina maemae-nonoana amai.
Tam raraunuapoapoei amai

au ġo'apoapoe ma notatawanei.

2 Au rauaġaiġai ma oġai
ma au ġo'apoapoe ma oġa-tawanei.

3 Au rauaġaiġai a aramanei
marana patapatai a notanotai.

4 Kaua apoapoei a kaei.
Tam ainelam awarim Ōga apoapoei a kauai,

ma am viwavu lamna riwa kaua.
Amapo anina da ma kovoġiu.

5 Tau rauaġaiġai, melamelauei da marina
Au manawa da marina tau ġo'apoapoe taukaueina.

6 Wate tam u ġoei da riwa kaua au ora-dewadewau ina mae.
E viviararamaniu da nuaulaula orau ina oai.

7 Au ġo'apoapoei ma oġa-tawanei,
ma oġai da ana arapoira da gonu rovena arapoirana ana ġetawanei.

8 Ma riweu da au ġo'apoapoe u nota-tawanei
da ana vinuaiai ma ana morelana

avena *da gelamiu u viaigaigai, marina ana vinuaiai.

9 Au go'apoapoe ma inana-tawanei
ma au apoapoe mirai ma boai.

10 Oo God nuanua ma ravivouni
da ana vipatutu kaua awarim.

11 Eġa au naom ma tawana-opuneu
ma awariu eġa Aruam Vivivireina ma vaitawanei.

12 Vilawana nuaiaina ma ravivouni me au naona nanare
aruau ma viaiaini da ana voteletelem.

13 Lamnei, ġo'apoapoei taukauei am kaua ana viararamani,
da ina mae-tavirei awarim.

14 Oo God, vi'rāġena vitana awariu ma vaitawanei,
da am kaua jijimanii ana welei.

15 Oo Bada ipiriu ma votawanei da gamou ina vimaegħaġeġaenim.

16 Au pulo, ġamoġamo ata apui awarim,
wate tam pulo apuapunana eġa uta vinuaiaeie.

17 Bada, pulo e ġoegħoġi lamna vilamolamona.

BADA, eġa au vilamolamona ma au rupena ma geduaiei!

18 Am nuavaina Jerusalem ma viaiaini,
ma ana gari ma voa-melei.

* **51:8:** Au vinuabola lamna me gelamiu wanagaina

- 19** Anina ma ai polo nota aiainei ina vikarena-melei da ina kaukauei ma
ma vinuaiaeie.
Taui polo tapuna ma tapuna ina apui awarim.
Bull mağamağau am au aniamapu ina apuapui.

67*Viegualau welana*

- 1** Oo God ma raunu'apoapoelelai ma ma viaiainiai,
ma naom weka ma tereiai da ma voaguiai!
- 2** Da au dobu am kaua ina aramanei,
da rava anatapui au dobu ina aramanei da tam ai tauvilawana.
- 3** Rava ina voepaepaim Oo God,
rava anatapui ina vimaeğaeğenim.
- 4** Rava anatapui au dobu ina vinuaiae ma ana morelanai ina wela,
aubaina tam rava anatapui au dobu, kaua jijimaninei e vivibadei
ma e paipaini.
- 5** Rava ina voepaepaim Oo God.
Rava anatapui ina voepaepaim.
- 6** Anina ma doa maura ğaeğena ina vereta
ma God ina viaiaina-kaueta
- 7** Riwa kaua, God ina viaiainita
ma rava anatapui au dobu tauna ina vivrei.

90*God ana taunola Moses ana pari*

- 1** Bada ai animae
kimta wariağda marina.
- 2** Tam God maemae nonoana
muriai da ola
ma dobu uta kuae.
- 3** Tam rava e ririwei da e vipokau, ma e ririwei,
“Rava ona wanaviraimi”
- 4** Tam awarim madeğä 1,000 lamna me aupom tagogi, i tupo kaua
me raviravi, eğä ita manawa dadana.
- 5** Rava ai lawana e vaivaitawanana lağilağinei me rauboni damona.
Taui me modu, ubaubanai e raraupairei,
- 6** da e rarata ma e talatalai,
wate aubigai e ğiviğivi.
- 7** Nanare am meji tauai e lagulaguriai ma
maranai e ğaiğaiawa tauai a rovorovo kaua.
- 8** Ai gó'apoapoe anatapui au naom u lavaei,
ai gó'apoapoe govagovağana, wate anatapuna e inainanai.
- 9** Am meji ai lawana i vitupoi,
ma ai madeğä lağilağina e kwakwa, a lavutu-tawanana.
- 10** Madeğä 70 i vereta da tana mae,
mepa da tana virewapana lamna 80;
- Wate wei lamna nuabola ava ina vereta,
eğä tana mae-pora ma tana nae.
- 11** Eğä aiai am ğaiawa malana ita vai-kauei.
Mepa da am ğaiawa ata aramana-kauei, lamna tauai ata vivirana-kauem.

- 12 Ma nanare, ma viararamanai da ai lawana i tupo kaua,
ma lamna aubaina awarim nuaulaula ana vaia.
- 13 Oo BADA! Ma nememei awariai.
Ma mae-tavirem, ma vinuabolelai, tauai am taunola.
- 14 Ubaubanai marana patapatai am nuavaina maemaena ma verelai,
da ana morelanai ana logoiai ma ai au Mara anatapuna ana vinuaiai.
- 15 Madēga biāga u kovōgai, nuaiāi ma verelai
da madēgana biāga a vinuapoapoe ina kovōgi.
- 16 Tauai am taunola, am nola vivirewapanana ma viatataielai.
Ma natunatuai am boruma ma viatataiei.
- 17 Ma Bada ata God ana vianina ina viatataietā
ma ina kaei da aiwai anatapuna ta kaukauei anona ina tupua.
Nanare ai nola ma viuai.

91

God at a rawena

- 1 Aiai ravana e nenaē Aidamo Telarana awarina agu aubaina,
lamna Vivirewapanana Kaukauana au ririvana ina mae.
- 2 BADA au God awarina ana riwa ana pa, “Tam au anigagalo ma au
tauvīgavia.
Tam au God, a vivitumāganem.”
- 3 Aubaina tauna, āavia ana waro govagovāgai
ma numa raraububu awarinei ina gagaloemi.
- 4 Tauna papenenei ina teregōgimi ma papena au gabaurina
ina gagaloemi;
ana vipatutu, am rawena ma am anigagalo.
- 5 Waguvvara kauai vīni-rovorovoi ēga ona rovoei,
bo āavia madēgai e vivīgavia,
- 6 bo numa raraububu waguvvara e vivīgavia,
bo doria madēgai e vivirāgena.
- 7 Avena da rava tausān au ririvam i peu,
bo ten tausān au oiem i peu;
wate tam ita vodadana-avem.
- 8 Matamieie ona inana ma ona inanai
gōapoapoe ravai ai kovōga.
- 9 Aubaina BADA o vaia ami rawena; Getelarana ami taugagalo.
- 10 Ēga aiwai apoapoena awarimi ina tupua bo au numa ina īeta.
- 11 God ana anela ina terei da ina painimi
ma ina gagaloemi ami au babara.
- 12 Taui uraieī ina voepaim
da aem ēga īaima au tepana ma raei.
- 13 Taumi lion ma mota ona vovaiubai,
lion īāigaiawai ma mota viviwiawai ona tugwadagwadai.
- 14 God i riwa i pa, “Aiai nuanuaū e vaivainonoei, ana vilawani;
ma ana gagaloei, aubaina i aramana-kauei.
- 15 Maranai i kwatu awariu, ana paribelei.
Tau kampa ai au nuabola,
ana taravaini ma ana voepaepai.
- 16 Ai lawana ana vimanaini,
ma au vilawana mamae-nonoana ana viatataiei.”

95*BADA tana welei*

- ¹ Ona nei! Tana wela BADA awarina.
Ana nuaiata tana wela God ata tauvilawana vivirewapano awarina.
- ² Tana nei au naona ma tana viegualaei
ma welei tana voepaepai.
- ³ Aubaina BADA lamna God virewapano kaukauna,
ma god anatapui e inainana-āairei.
- ⁴ Dobi anatapuna au urana,
guba ġaeġaei doa au orana da ola ġaeġaei au tepai.
- ⁵ Boga tauna ġarinei, tauna i kauei
ma nanare tauna uranei dobu alalana i tere-kauei.
- ⁶ Ona nei ma tana raudune ma tana vimaegħaġaeni,
ae tututa tana tapeġgaroei taukaueta BADA awarina.
- ⁷ Aubaina tauna ata God.
Tauta natunatuna. Ana sипу ma e ġamoġamoita ana au wapu.

Mepa da ponana o nonori amadodo,

⁸ *E riwei i pa “Eġa orami ona gudui me amamami au Meribah;
me au mutulua au Massah.

⁹ Kampa amamami i 'nanai, kaubabai a kauei
wate eġa ita vitumäġaneu, ma i raudadaniu.

¹⁰ Madeġa 40 wei kimtana awari amlou i ġaiġai ma a riwa,
‘Wei ravai orai i bagibagi ġaġa!
Eġa ita rarautaniġaneu.’

¹¹ Ana mejiu a parivainuāġani,
‘Gabu a vokaukauei ami lauvitau aubaina wate kampa eġa melanai
ona rui!'

100*Voepaepa welana*

¹ Rava anatapumi au dobu ona logoimi BADA awarina!

² Ana nuaiaimi BADA ona voepaepaei,
ona nei au naona ma ona welei.

³ Ona aramaniei da BADA anina God.
Tauna i kaueta.

Ma tauta tauna ġarinei. Tauta tauna natunatuna. God ana sипу ma
e gagaloeta me sипу taupainina.

⁴ Ana welami ana au gari ona rui ma voepaepami
ana au aniviboru ona rui,
ma ona vimaegħaġaeni.

⁵ Aubaina BADA i aii;
natunatuna e vivinuavaina-nonoei,
ana vipatutu e mamae-nonoa, kimta au anatapui.

103*BADA ana nuavaina*

David i girumi

¹ Orau taputapunei BADA ana voepaepai.
Wavana vivivireina ana voepaepai.

² Orau taputapunei BADA ana voepaepai,

* 95:8: Exo 17:1-7; Num 20:2-13

kaua aiaii i kaeui aubaiu ega nuanuau ina vuru.

³ Au go'apoapoe anatapui e notanota-tawanei,
ma doria awarinei e vivilawaniu.

⁴ Ata irage ma i sinaepaiu
ma nuavainei ma raunuapoapoelei e vivigulaueu.

⁵ Au lawana au anatapuna
purapura aiaii avai i verevereu, au vilaraga marana i raviravivouni me
*manubada.

⁶ BADA ana kaua anatapuna jijimanina.

⁷ Ana oga Moses i viatataiei,
ma mai Israel BADA ana kaua vivirewapanai i 'nana.

⁸ BADA raraunuapoapoeni ma ivina aiaina,
Ega lagilaigina amlona ita voigaigai. Ana nuavaina maemae-nonoana.

⁹ Ega mara nonoa ina enita,
ma ana amloigai ega ita mamae-nonoa.

¹⁰ Anina da ita kovaiga-kaueta,
wate i raunu'apoapoeleta da kovoiga ega gaeigaena ita verevereta.

¹¹ Dobu weka ma mara nore au tepadewadewana.
Nanare, BADA ana nuavaina i rata guratana taui da BADA e vivivirei
awarii.

¹² Mepa madega e gogolana da mepa e gaiigairalana, lamna uama,
ma nanare ata go'apoapoe vinimalana e vaivaitawana-naiei aueia.

¹³ Me ama natunatuna e raraunuapoapoelei,
nanare BADA natunatuna e raraunuapoapoelei.

¹⁴ Aubaina i aramanei da tauta pokaei i kaueta.

¹⁵ Ata mara au dobu lamna me modu.
Ta gogogo ma ta rarata me berana moduei;

¹⁶ Anina ma ive i uvena-kapupuei,
ega ita mamae, ana gabu i kwakwava.

¹⁷ Taui da BADA e voepaepai ana nuavaina maemae-nonoana
awarii ma nanare noinooi ma ai epaepaia awarii

¹⁸ taui aiavoi da ana parivainuaigana bagibagina e vovoijini
ma ana patupatutui tarawatu e vovoijini.

¹⁹ BADA ana vigulau anikialana au mara i terei,
ma kampa ana vigulau e vivibadei.

²⁰ BADA ana anela, vivirewapanami,
BADA riwana o rarautaniiganei ma o kaukauei,
BADA ona voepaepai.

²¹ Anina BADA ana anela marei,
BADA ona voepaepai taumi ana taunola ma ana goana anatapuna
o kaukauei.

²² Taumi anatapumi BADA uranei i kauei, ana au vigulau maemaei, BADA
ona voepaepai.
Tau nanare orau taputapunei BADA ana voepaepai.

110

Gulauna vinevinena

David ana wela

¹ ^{103:5}* BADA au bada wenanare i riwei,

* **103:5:** Manubada tawarana waduboi e peupeu ma vouii e gogogo. Me manubada tawarana vouii e gogogo nanare tam au lawana e raviravivouni. ^{110:1: Mrk 12:36; Act 2:34-35}

- “Au oieu ma kiala
da am ġavia
au ae karem ana terei da ma tuvaidoedoei.”
- ² BADA, am gabemani vivirewapanana Zion* ana parata ina viratai,
da am ġavia ma vibadei.
- ³ Am laraga ana nuuai ina verena-melei da ina visorodia,
ma ona ġae BADA ana ola au tepana viġavia aubaina,
ma ami rewapanana ina ravivouni ubaubanai patapatana me ubaubanai
turuvanina.
- ⁴ BADA i parivainuaġanim ma eġa nuanuana ina virai;
“Tam pirisi maemae nonoana me Melkisedek.”
- ⁵ BADA au oiem e maimairi da e paipainim;
tauna gulagulau ina piagi maranai amlona ina ġaiġai.
- ⁶ Dobi nununai ai ġoа apoapoe ina kovoġi,
ma taubeu dobuna ina vioai
ma dobu gulagulaui anatapui kolai ina viaigwadagwadai.
- ⁷ Wate au etanai au vuvura ina uma
ma rewapanana ina verei ma ina vovaiuba.

119

- BADA ana tarawatu boruborumana*
- ⁹ Rava vouna menanare lawana aiaina ina maeni?
Tauna riwamei ina paina-melei.
- ¹⁰ Lamna aubaina a baibaiem orau taputapunei;
eġa ma votereu da riwam ana geduaiei.
- ¹¹ Riwan a iaiavi ma au nuanuau a tereterei,
da eġa ġo'apoapoei awarim ana kuae.
- ¹² BADA, a voepaepaim!
Am tarawatu ma viararamaniu.
- ¹³ Ipiriuei ana bababani ma
am tarawatu anatapui u verevereiu ana jime.
- ¹⁴ Am tarawatu votelatelana a vinuaianana-kauei,
eġa me vipurapura bo vimane.
- ¹⁵ Riwan ana iavi
ma ana vinuanotenotei.
- ¹⁶ Am tarawatu a vinuaianina-kauei,
eġa riwan ana voteretawanei.

139

- Bada anatapuna i aramanei.*
- David ana wela
- ¹ BADA orau u inanai ma au kaua anatapui u aramanei.
- ² U aramanei mara aiwai a kiala ma a vomairi.
Avena au uama wate au nota e araramanei.
- ³ E inaninanai maranai a babara bo au numa a vivilauvitau.
Anatapuna a kaukauei e araramanei.
- ⁴ Muriai da ata babani tam e araramanei aiwai ana latoni.
- ⁵ Tam e garigari-kwaipipinu,
ma uram virewapananei e paipainiu.
- ⁶ Lamna riwa kauana, awariu i aii kaua
ma i ġe-dewadewa da kolau i kwauna-kauei.
- ⁷ Mepa ana nae da Aruam ana raugovaġei?

* **110:2:** Jerusalem wavana ġelauna.

- Mepa ana ruba da ana raugovāgem?
 8 Ata īgae au mara da tam kampa;
 mepa da i 'rairaīei ai au dobu ata rauviraiu, tam kampa.
- 9 Mepa da ana lave nae au maramatanei,
 bo mepa madeīga e neneulai,
- 10 avena kampa ma uram ina raveniu,
 ma am rewapanā ina painiu.
- 11 Mepa da ana riwa, "Gimtona ina teregovāgiu
 ma lalalaina ina gimtona."
- 12 Wate avena da gimtonana amapo eīga ana raugovāgem.
 Tam awarim gimtona ina rarana me marai, aubaina tam awarim
 gimtona ma lalalaina lamna tagogina.
- 13 Tam tupuau anatapuna u voai da alou au manawana u teretagogieu.
- 14 A viviegualuem aubaina tam am nuavainei ma am borumei u voa-
 kaue! Am raugaroīgaro i aii,
 A voepaepaim aubaina a aramana-kauei.
- 15 Tam u vivinenēganu maranai a tuputupua au govagovāgana, alou au
 manawana,
 tam ainelam anatapuna u aramanei.
- 16 Tam u inanai muriai da a tupua.
 Aupom biaīga u vereu da ana mae
 lamna au buka u girumi,
 muriai da aupom naona i īgotai.
- 17 God! I piripiri guratana da am nota ana aramanei.
 Am nota kolau i kwauni, eīga aiwai īelaunei am kaua ana aramanei.
- 18 I maīga guratana eīga me bubu, iavana ana kauana-avei,
 avena da ata iava-pai, tau amapo da tam ana vivinuanainem.
- 19 Oo God! A īgoe! da īgo'apoapoei ravai uta virāgeni.
 Tauviraīgena uta viāgāīei da eīga ina nei awariu.
- 20 Aubaina e vivijibōgim,
 ma wavam eīga ita vivivirei.
- 21 BADA, rava e gedugeduaiem, tau ravai a gedugeduaiei.
 Taui eīga ita votetelelem lamna aubaina taui au īgavia.
- 22 Taui a geduaiana-kauei,
 anina taui au īgavia.
- 23 Ma tuvirevireu, ma orau ma inana-pai.
 Ma raudadaniu da nuanuau ma aramanei.
- 24 Mepa da īgoa apoapoe au orau, ma viatataieu,
 ma ma raveniu etanai e nenaue au lawana maemae-nonoana awarina.